

**ზაზა  
დაჩუასელი**

---

**უჩინარი**

---



თბილისი, „მედიონი“ 1985

ავტორი თავისი მოთხრობების ამ პირველ წიგნში მეტწილად ახალგაზრდობის ზნეობრივი ფორმირების პრობლემებს ეხება. მწერალი წარმოაჩენს ახალგაზრდობის შინაგან სამყაროს, მათ შეცდომებსა და მიღწევებს იმ გზაზე, რომლითაც ისინი ავტორს სიკეთისა და მაღალი ზნეობის გამარჯვებისაკენ მიჰყავს.

70303—167.

დ \_\_\_\_\_ 82—85

M 604(08)—85

© გამომცემლობა „მერანი“

## „ი უ ბ ი ლ ე“

სახატავი რვეულები გამოეტანათ. ბავშვისთვის მინდოდა მეყიდა. დიდხანს ვიდექი ჩივში. გვიან მივხვდი, რომ ჩეკიც უნდა ამელო. სალაროსთან ათი კაცი მაინც იდგა... და გადავიფიქრე.

ამ დროს ყველგან ასეთი ამბავია, რა გასაკვირია, პარასკევია, სამუშაო საათები დამთავრდა.

„ოჰ, ნეტავი დღეს ამ საქმეს მოვრჩენილიყავი... ორშაბათამდე ცდა არ გინდა?“

— რას ბუტბუტებ, ბიჭო, შენთვის, ხომ არ აურიე? — შემანჯღრია მიწისქვეშა გადასასვლელთან ვილაცამ.

— ააა... — მივესალმე რეზო კალანდარიშვილს.

— როგორა ხარ? თქვენები როგორ არიან... ახალი რა არის?

— ისევ ისე... ძველებურად ვართ...

— ინსტიტუტში? ექსპედიციაში როდის მიდიხართ?

— რა ვიცი, ჯერ არ არის გადაწყვეტილი.

— ჩვენებიდან ხომ არავინ შეგხვედრია?

— არა.

— იცი, ვინ შემხვდა? ნინო ლეჟავა. ოკეანოლოგი... სანაპირო ზოლის გამაგრებაზე მუშაობენ ანაკლიაში. ზღვას კიდეც ოცი სანტიმეტრით წამოუწევია წინ... მაგარი თავსატეხი ამბავია, ჰა, რას იტყვი?

— ჰოო...

— მოგიკითხა.

რეზო ერთხანს შეწუხებული მაკვირდება.

— იყავი კალათბურთზე გუშინ?

— ტელევიზორში ვნახე.

— „ცსკას“ დამარცხება როგორ მოგეწონა? რა ითამაშეს ჩვენებმა?

— მართლაც.

— შენ რა?

— რა იყო?

— მარწუხით უნდა ამოგგლიჯო სიტყვები? — ხელი ჩაიქნია: კარგადო, გადმომიგდო წყალობასავეით და წავიდა.

ოპერის თეატრთან ტროლეიბუსში ავედი.

ჩემს ბედზე, ადგილი განთავისუფლდა. ფანჯარასთან მოხერხებულად მოვკალათდი.

„ჩვენი დირექტორი სადღა დაიკარგა დღეს? მსაც ხომ აწუხებს ჩვენი ცეოლიტების ექსპედიციის ამბავი? წავიდა სამინისტროში და აღარ მობრუნებულა. ორშაბათს კი დაიწყებს ჭაჭანს, უჩემოდ არაფრის გაკეთება არ შეგიძლიათო...“

ტროლეიბუსი აძაგძაგდა. აზრი აღდა.

„ესე იგი ასე!“ — დავირტყი ხელი მუხლზე. გვერდით მჯდომმა მანდილოსანმა გაკვირვებით შემომხედა. სახე ფანჯრისკენ მივაბრუნე.

„ორშაბათს ჯერ გეოლოგიურ სამმართველოში წავალ, სანამ ფულს არ გადამირიცხავენ, ფებს არ მოვიცვლი იქიდან. მერე უკვე სამინისტროსაც მივაკითხავ, მთავარია, სახსრები გვექნეს, იქ უარს ვეღარ გვეტყვიან...“

„... თავს იმშვიდებ, არა?“

სიმწრით ჩამეცინა.

ისევ დავიჭირე მანდილოსნის გაოცებული გამოხედვა.

„ოჰ, ერთი ამ ექსპედიციასაც დაადგეს საშველი...“

ტროლეიბუსი ხალხით გაიჭედა. ძლივს დავიძვრინე თავი და უკვე დაძრული ტრანსპორტიდან ჩამოვხტი ჩემს გაჩერებასთან. თავი ვეღარ შევიმაგრე და ინერციით მოხუც კაცს მივეხალე.

— ბოდიში, ბატონო! — შევწუხდი გულწრფელად.

მოხუცმა ნატკენ მხარზე ხელი მოისვა, ერთხანს მკაცრად მიყურა და მერე ზურგი შემაქცია.

დამნაშავესავეით ვიდექი... უცებ მხარმარცხნივ ვილაცის დაუინებული შხერა ვიგრძენი.

— მიცანი? — გამიცინა ქალმა.

— ლანა?! — გული პატარა ჩიტივით შემიფრთხილდა...

— სულ არ გამოცვლილხარ... — მოვიშველიე თავში გაელვებული გაცვეთილი კომპლიმენტი.

— კარგი ერთი, ხუმრობა არ დაგვიწყებია, — გაეცინა.

— ესე იგი, არც მე გამოვცვლილვარ! — გამიხარდა.

— ჰოო?.. — წარბი შეიკრა რატომღაც...

— სხვა, — როგორა ხარ? — სასწრაფოდ შევეცვალე საუბრის თემა.

— არა გვიშავს!

— შენი მეუღლის დაწინაურების ამბავი გაზეთიდან შევიტყვე, მომილოცავს.

ლანას არაფერი უპასუხნია...

— ბავშვები?

გამოცოცხლდა.

— გოგონა მყავს. უკვე რვა წლისაა, მეორე კლასში სწავლობს. შენ?

— მეც გოგონა მყავს. მალე ხუთის გახდება...

მერე ცოტა ხანს დაბნეული ვიდექი. ფეხს მალიმალ ვინაცვლებდი.

შისი ავტობუსი ჩამოდგა.

— ნახვამდის!

— მოიცა... — ავწრიალდი, რალაცის თქმა მინდოდა...

— ნახვამდის! — გამიმეორა და ავტობუსისკენ გაემართა.

ისევ ის გამომწვევი. მიხრა-მოხრა... ოცნებით მიეაყობლებდი თვალს მის აშხვართულ ტანს, სანამ კარში არ მიიმალა. მერე გაფაციცებით ვეძებდი უკვე ავტობუსის სალონში... მწყალობელმა ღიმილმა მტრედვიით ჩაიფრინა ავტობუსთან ერთად...

კარი ჩემმა გოგონამ გამიღო.

— მამიკო მოვიდა, მამიკო მოვიდა! — შესძახა გახარებულმა.

დავიხარე და ლოყაზე ვაკოცე. სასტუმრო ოთახში შევარდა.

— ხელები დაიბანე და ისადილე, სადა ხარ აქამდე? — გამომძახა მაიამ სამზარეულოდან. სასტუმრო ოთახიდან დედამ გამოიხედა. კაბის კალთაზე თამრიკო ებლაუჭებოდა.

— გამარჯობა!

— გამარჯობა, გურამ! აი, შენ რომ გიყვარს ის ლექსი თამრიკომ ზეპირად ისწავლა, ხომ, თამრიკო?

ბავშვმა დაიმორცხვა და ბებიას ზურგს ამოეფარა.

— ყოჩაღ!

— ისადილე, გურამ, და ლექსს მერე გეტყვით!

... მაია მაგიდასთან ჩამომიჯდა.

უხმოდ ვხვრეპდი ჩიხირთმას.

- რა არის ახალი ინსტიტუტში? ხელფასი ხომ არ ყოფილა?
- არა, ორშაბათს იქნება.
- ... მაიამ მეორე კერძი მომიტანა:
- გაზეთები ამოიტანეთ?
- კი. ამ საღამოს სადმე ხომ არ გავსულიყავით? რამდენი ხანია კინოში არ ვყოფილვარ.
- ვნახოთ.
- ხასიათზე არა ხარ?
- ისე, რა...
- აბა?
- რამდენი ხანი გავიდა?..
- კინოში რაც არ ვყოფილვარ?
- გონებაში უმალ გამოვიანგარიშე.
- ათი წელი...
- ათი წელი? — ეჭვით შემომხედა მაიამ, — რაო?!  
საწერ მაგიდასთან სავარძელში ჩავჯექი. „ლიტერატურული საქართველოს“ კითხვა დავიწყე.
- ახლა კი სცენაზე ვთხოვეთ თამრიკო ჭეიშვილს! — გამოაცხადა დედაჩემმა.
- გონებაგაფანტულმა მოვიხედე. ჩემმა გოგონამ ნაწნავები უკან გადაიყარა, წელში გაიმართა და დაიწყო.
- „ენკი-ბენკი, სიკლი-სა  
ენკი-ბენკი-ბა...  
დღენი სიყმაწვილისა  
გა-ვი-და...“
- „გა-ვი-და ათი წელი... ნუთუ ამდენი ხანი გავიდა?“
- „... მოდი კვლავინდებურად  
დავუაროთ გარს.  
არა თქვან, სიჭაბუკეც...  
გა-ვი-და.“
- ცოლმა და დედაჩემმა ტაში დაუკრეს.  
ძალისძალად გავილიძე.
- მე კიდევ ვიცი, მამიკო, ახალი ლექსი, — ატიკტიკდა თამრიკო და ჩემს მუხლებზე შესკუპება მოინდომა.
- ახლა მაცალეთ. გაზეთებს წავიკითხავ და მერე!.. — ცოტა არ იყოს, უხეშად ვთქვი.

— დავასვენოთ მამა, დაღლილია, ალბათ, თამრიკო... — ირონიულად თქვა მამამ, ბავშვს ხელი მოხვია და ოთახიდან გავიდნენ. დედამ ფეხი აითრია...

— ... პოხონდრიამ მოგიარა? ცუდი ხასიათი სამსახურში უნდა დაგეტოვებინა! — თითი მუქარით დამიქნია.

განრისხებულმა ის-ის იყო პირი დავაღე და კარიც მოიკეტა.

სიგარეტს მოფუკიდე. სავარძლის საზურგეზე გადავწექი და მზერა ფანჯრისაკენ გამექცა. დღე ნელ-ნელა იწურებოდა. მკრთალ ქარვისფერ ზოლს გაერღვია მთაწმინდაზე წამოშლილი ღრუბლები...

„... დაბადების დღე (ვილაციის)...“

სუსტი, ცისფერი შუქია ოთახში. მაგნიტოფონი უკრავს და წყვილები ცეკვავენ...

პეპინო დე კაპრი... „ტამე... ტამერო-ო...“ იტალიური, ლამაზი, ქალაქის ატაცებული მელოდია...

მე და შენ...

— შეიძლება გაგაცილოთ?

— არა, მეგობრები მაცილებენ...

... უნივერსიტეტის შეხუთე კორპუსის ეზოში სამწყობრო მეცადინეობა გვაქვს სტუდენტებს. ფანჯრებიდან უცხო ენების ფაკულტეტის გოგონები გადმოგვცქერიან. იცინიან.

— ნალეე-ვო!.. ნაპრაა-ვო!..

წუთით შენი თვალებიც გამოჩნდება ფანჯარაში. ამას ველოდი დიდიდან... დერეფანში ერთმანეთს დიდი მოწინებით ვესალმებით: მიხარია, სამხედრო სწავლებაზე ყოველთვის პირგაპარსული რომ უნდა მოვიდე.

— ... გურამ, ხვალ ჩემი დაბადების დღეა... შენ და რეზოს გელოდებით, იცოდე, ხომ მოხვალთ?

— ახლავე დავურეკავ რეზოს! — აღტაცებას ვერ ვმაღავ.

შენი მეგობარი ქეთინო კი გულიანად კისკისებს ტელეფონში. ზეირიანად არც კი ვიცნობ, უნივერსიტეტის საახალწლო საღამოზე გაგვაცანი.

... ისევ სუსტი, ცისფერი შუქი ოთახში, მაგნიტოფონი და წყვილები. საოცარია, მეჩვენება თუ ნამდვილად გაჭრილი ვაშლივით ჰგავდა ის საღამოები ერთმანეთს?

მე და შენ... და პეპინო დე კაპრი. „ტამე, ტამერო-ო, — ტამე, ტამერო“.

— მამიკო, მღერი?

— რაო? — გამოვერკვიე ფიქრიდან. თამრიკოს შემოუყვია კარში თავი.

— თამრიკო, მაცალე ცოტა ხანს, ხომ ხედავ, სიგარეტს ვეწვევი. არ შემოხვიდე!

— „დედამისმა შემოაგზავნა ალბათ“, — მინდა ჩემივე თავი გავიმართლო, ბავშვს რომ ასე მკაცრად ვექცევი.

... — შეიძლება გაგაცილო?

და სანატრელი თანხმობის ნიშნად, თავის უხმოდ დაქნევა...

გზაში თოვლი წამოგვეწია და შენს სახლამდე მიგვაცილა.

მერე სულელივით პირღია მოვსრიალებდი თეთრად გადაპენტილ ტროტუარზე და მოწყურებულივით ვყლაპავდი ფანტელებს...

სახლში დედა გაბრაზებული მიღებს კარს...

— სადა ხარ, ბიჭო, აქამდე?

ტელეფონის ხმა ისმის.

— სადა ხარ, ბიჭო? — შენი გაკვირვებული კითხვა.

...პირველი კოცნა... კიროვის ბაღში ოფოფის სავარცხელივით აშლილი ნაძვის ძირას...

გაცდენილი ლექციები...

ცარიელი აუდიტორიები...

მეგობრების გაოცებული კითხვა: — „სად დაიკარგე, ბიჭო?“...

და... ეს იყო და ეს...

ვცდილობ გავიხსენო... ვერ ვიხსენებ... რატომ? რისთვის?

რა მოხდა?

„სად დაიკარგე, ბიჭო?“

მაშინ პირველად „დავიკარგე“ სამი დღით. ესე იგი, არც დამირეკავს, არც შეგხვედრივარ.

— სად იკარგები, ბიჭო?..

„უკვე ერთი კვირით „დავიკარგე“.

... იმ პირველი კოცნიდანვე ვატყობდი, როგორ იფერფლებოდა ჩემი გატაცება.

ვიტანჯებოდი, როცა შენს სითბოზე ყალბი გრძნობით უნდა შეპასუხნა.



ბოროტი არასოდეს ვყოფილვარ... პირიქით, რაც შემეძლო, ვცდილობდი, რომ გული არ ამცრუებოდა შენზე. „დამეჭირა“, „დამება“ ის... რასაც შენდამი თავიდან ვგრძნობდი... მაგრამ არაფერი გამომდიოდა.

და კვლავ...

...სად დაიკარგე, გურამ... არა გრცხვენია, სულ მე უნდა გიბრეკო?

შენს წინაშე დიდი დანაშაული მიმიძლოდა... ჩემი თავი თვითონვე მეზიზღებოდა და მინდოდა შენც შეგძულებოდი.

უბადრუკი მიზეზები:

„ყველას უნდა აკოცო, ვისაც შეხვდები?“

შენ არც ერთ ნაცნობს აღარ კოცნიდი შეხვედრისას.

„რამდენ სიგარეტს ეწევი დღეში, ქალბატონო?“

სიგარეტს თავი დაანებე. ყოველ შემთხვევაში, ჩემთან აღარ მოგიწევია. უკვე გრძნობ ჩემს სიცივეს.

„რა არის ასეთი მოკლე კაბა? ლერწამივით რატომ იხრები სიარულისას?... სულ ასეთი გამომწვევი გინდა იყო?“

მომთმინებით იტან ჩემს უხეშობას...

„გუშინ ვის „ფიატში“ იჯექი?“

(აი, ყველაზე ხელსაყრელი „მიზეზი“).

— ჩემი ძმის მეგობარია, გიზო სიხარულიძე. ეს უკვე მეორეა და, რომ მაკითხავს უნივერსიტეტში! — ნიშნის მოგებით მეუბნები. ალბათ მოგწყინდა ჩემი გაუთავებელი ბუზღუნა.

— მანქანამ გაგაგოცა?

ჩემი მწარე სიტყვები უპასუხოდ რჩება.

— ბილეთები მაქვს მარინო მარინის კონცერტზე, წამოხვალ? — ამას ისე თბილად მეუბნები, რომ გული მილღვება.

— რა თქმა უნდა.

— როდის შევხვდეთ?

— სპორტის სასახლესთან, შეიდ საათზე.

— კარგი.

და მე არ მოვსულვარ... შენც უკვე თავმოყვარეობამ შეგაწუხა... ხანდახან უნივერსიტეტში თუ მოვკრავთ ერთმანეთს თვალს.

„როგორა ხარ?“ მეკითხები გაბუტული თვალებით.

„არა მიშავს. სადა ხარ, როგორ დაიკარგე, ასე უნდა?“

თავი მეზიზღება, ახლა ჩემს სიყალბეს რომ ვიხსენებ...

„დაგირეკავ ამ დღეებში“, — და ხელს ხელზე მაგრად გიჭერ, ვითომ ძველი არ დამივიწყებია.

რისი დარეკვა... როგორ მოგარიდო თვალი, სად დაგემალო, იმას ვცდილობ. სინდისი კი მქენჯნის, მქენჯნის...

... თქვენი „გაპარვის“ ამბავი რომ გავიგე — გულიდან თითქოს ღიდი სიმძიმე ჩამომეხსნა და მაინც, მეწყინა კიდეც, რატომღაც.

— ბიჭო, ამბობენ ლანა კი არ გაიპარა, მოიტაცა იმ გიზომო... — მითხრა რეზომ.

თავი იქნენულად გადავაქნიე.

— მაგრამ, არა მგონია. ძმაო, ჯერ ერთი, რას უჯღებოდა მანქანაში? მარტონი ყოფილან. თანაც, გურიაში, ამ სიშორეზე რამ წაიყვანა, ძალით რომ გაეტაცნა, რა, მახარაძემდე ჩაიყვანდა? კაცი საპქესთან იყო. მართალი ყოფილხარ, მაგის იმედი რომ არ გქონდა.

რეზომ რომ მკითხა, რა მოხდა შენსა და ლანას შორისო, ვიც-რუე. იმედი არა მაქვს, რომ ნამდვილად ვუყვარვარ-მეთქი.

დიდად არ მეპიტნავა ჩემი „სიმართლე“ ახლა.

რამდენჯერმე ვიღაც უცნობმა „მეგობარმა“ გოგონამ დამირეკა, ჩემი ჯანმრთელობის მდგომარეობას „შეეწუხებინა“ ლანას გაპარვის შემდეგ.

და ის სალამო...

„გისმენთ!“

გულმა რეჩხი მიყო.

„გურამ, არ შემძლია... — სლუკუნებ ტელეფონში. — ახლავე, ფეხს დავკრავ და შენკენ გამოვიქცევი... იცოდე, თავს მოვიკლავ... შენთან მინდა... ხომ ვიცი, რომ გიყვარვარ...“

ელდა მეცა. ყურმილი კინაღამ ხელიდან გამივარდა. რა უნდა მეთქვა... მეორე დღეს ხელს აწერდით, ქორწილი გქონდათ. წარმოვიდგინე, რა შეიძლებოდა ამას მოჰყოლოდა...

„არ მიყვარხარ! — ვთქვებ ცივად და მტკიცედ სიმართლე, — ეს მხოლოდ გატაცება იყო, გაიგე, გატაცება!“ — ახლა კი ნამდვილად უნდა დაგეჭვებინა.

სლუკუნი შეწყდა.

ყურმილი დავდე.

იერე კანტიკუნტი მითქმა-მოთქმაც შეწყდა და, როგორც ყველაფერი საერთოდ, ეს ამბავიც დავიწყებას მივცა...

ერთხანს ბოლთას ვცემდი ოთახში, მერე სამზარეულოში გავედი.  
— გვეშველა! — გამოაცხადა ჩემს დანახვაზე მაიამ.  
დედაჩემი ბავშვს ჩაის ასმევს.  
— გაგიარა პოხონდრიამ?  
— კი! — უუქნევ თავს სერიოზულად.  
ბავშვმა გაიცინა.  
წინქარში გავედი და ლაბადა ჩავეიცვი.  
— წავედი მე... მალე მოვალ! — და კარი მოვიჭახუნე.  
„როგორ დაუშვადება სახე მაიას!..“

ერთხანს ჩაფიქრებული მივხეტიალობდი.  
ბოლოს გადავწყვიტე და ორკაპიციანი ჩავეუშვი ტელეფონ-ავტო-  
მატში. ნომერიც რომ არ დამვიწყებია!

— მიცანი?  
— გიცანი.  
— რატომღაც მეგონა, რომ შინ იქნებოდი.  
— ჰო, გიზო მივლინებაშია, და...  
— როგორ ხარ? — ხმას ვერ ვიმორჩილებ, ვლელავ.

— ლანა, ერთი თხოვნა მაქვს.  
— გისმენ, გურამ.  
„გურამ... გურამ... გურამ...“  
— არ შეგიძლია, ხუთი წუთით შემხვედე?  
— არა!  
— სულ ხუთი წუთით, თუ გინდა შენს სახლთან მოვალ.  
— მე არაფერიც არ მინდა!

— ერთი წუთითაც არ შეგიძლია?  
— არა, გურამ.  
— ასე?  
— როგორ, თუ ასე?  
— კარგი მაშინ, მშვიდობით!  
— მშვიდობით!

ყურმილი არ დაკიდოს, მეშინია და ისევ ვეზღეწები:  
— რა მოხდება, სულ ერთი წუთით, ძალიან გთხოვ.  
— ბავშვები ხომ აღარა ვართ, გურამ...

„ბავშვები ხომ აღარა ვართ... ბავშვები ხომ აღარა ვართ, ბავშვები ხომ აღარა ვართ...“

— სულ ერთი წუთით, ძალიან გთხოვ, გესმის?

— რა დროს ეს არის?

— მაშინ... უბრალოდ, ფანჯარაში გამოიხედე და მე გამოვივლო, შეგხედო მინდა, მეტი არაფერი.

— ესეც დიდი ამბავია? უბრალოდ ფანჯარაში გამოიხედე... ძალიან გთხოვ...

— კარგი!

— ხუთ წუთში მანდა ვარ.

ძალზე ნაცნობი, ახლობელი ქუჩა ყოფილა ჩემთვის. ლამპიონები არ ანთია. ბნელა. ასევე ბნელოდა მაშინ პირველად... უნივერსიტეტში საახალწლო ნაძვის ხის კარნავალიდან ახალგაყვანილი ლანა რომ გამოვაცილებთ მე და რეზომ. მერე მისი ფანჯრების წინ დავდიოდით და ვმღეროდით:

„ახ, ტურფავ, ტურფავ... ნუთუ ვერა გრძნობ... გადარეული და-ვი-ა-რე-ბი“.

ძმამ გამოიხედა. ვინა ხართო, ბრაზით შემოგვეძახა.

ჩუმად გავიძურწეთ.

პირველ სართულზე შუქი არ გინთია.

და მაინც შორიდანვე, გარკვევით ვარჩევ ლანდს ღია ფანჯარაში. შორიდანვე მხედველობას ვძაბავ. სიბნელეში მიჭირს სახის დანახვა, — მერე თვალი ეჩვევა სიბნელეს...

— გამარჯობა!

— გამარჯობა!

— გმადლობთ, რომ გამოიხედე, ლანა... — ლანა ეტყობა, — ყოყმანობს, ვერ გადაუწყვეტია, მიპასუხოს თუ არა. — მას შემდეგ, რაც გაჩერებაზე გნახე... შენზე ვფიქრობდი...

— კინალამ გავგიჟდი, თურმე ათი წელი გასულა... როგორ გაირბინეს წლებმა?!...

ბოლოს მაინც გატყდა.

— აბა, — მასაც უკვირს, — თურმე, ათი წელი გასულა თვალის-  
დახამხამებაში.

— ჰო!

— ერთად რომ ვყოფილიყავით, რა ტანჯვა-წვალებით, კუს ნაბი-  
ჭით გავიდოდა ეს წლები! არა, გურამ?

— ესე იგი? — უცებ ვერ მივხვდი.

ლანამ ჩაიცინა.

— ესე იგი, მეც დიდ მადლობას გიხდი... გახსენებისათვის!

— სხვანაირად არც შეიძლებოდა. ყველაფერი ხომ რალაც კა-  
ნონებით ხდება. ათი წლისათვის დღეა დღეს — იუბილე გვაქვს.  
ამიტომაც ვერ ავცდით ერთმანეთს.

იციინის...

მეც ვიციინი...

— მშვიდობით...

— მომავალ იუბილემდე! — იხტიბარს არ ვიტეხ მე.

თავისუფლად ამოვისუნთქე.

ქუჩაში თავქვე დავეშვი.

ვილაც კაცი მოემართება ჩემს შესახვედრად, მგონი, — ნაცნობი  
უნდა იყოს.

— ოჰ, გაუმარჯოს თენგიზს! — თენგიზიც გეოლოგია, მხოლოდ  
სამშენებლო მასალათა სამმართველოში მუშაობს. შარშან ერთობ-  
ლივ ექსპედიციაში ვიყავით.

— ააა... — მესალმება თენგიზი.

— რას შერები, როგორა ხარ?

— ისე, რა...

— ტელეფონი რომ მაქვს, იმიტომ არ შირეკავ?.. ვიციინი. თენ-  
გიზი უხერხულად იშმუშნება.

— ახალი რა არის, ცოლი არ მოგიყვანია? რას აპირებ?

— რა ვიცი, აბა?

— ველზე როდის გადინხართ... ე, ბიჭო, გვიანდება... ზაფხული  
მოგვადგა კარს...

— ჯერ, ხომ იცი, ვრალიჩობთ...

— ძველებიდან ხომ არავეინ შეგხვედრია, ზურა, ლალი, თორნიკე  
ისევ ჯგუფში გყავს, თუ?

— კი,

- არ შევხვდეთ ერთმანეთს, მომენატრეთ თქვე კაი ხალხო...  
 თენგიზი შეწუხებული მიყურებს.
- უყურე გუშინ კალათბურთს? რა კარგად თამაშობდნენ ჩვე-  
 ნი ბიჭები, არა? „ცსკას“ თუ დაამარცხებდნენ, გეგონა?
- რა იყო, შე კაცო, ავად ხომ არა ხარ?
- რას მატყობ?
- აბა სიტყვა ვერ ამოგათქმევინე. ხასიათზე არა ხარ? კარგად...
- 
- მაიააა! — გახარებული შევრბივარ სახლში.
- ჩუ... დედა ბავშვს აძინებს!.. — გაბუტული, საყვარელი თვა-  
 ლებით მიყურებს მაია. — სად იყავი, გიჟივით რომ გავარდი?
- საღამოს „თბილისი“ მინდოდა მეყიდა, — გადავდივარ ჩურ-  
 ჩულზე და ვეუბნები ჭერ კიდეც გზაში მოფიქრებულ მიზეზს. კი-  
 ნოში წავიდეთ, „რუსთაველში“ ახალი ქართული ფილმი გადის,  
 „მიმინო“.
- გაზეთს ექვის თვალით დაჰყურებს და ნელ-ნელა სახე ეხ-  
 სნება.
- ლევან ნიკოლაევიჩმა დაგირეკა, მაგის ექსპედიციის საქმე  
 გავაკეთეო, ძალიან წუხდა და ახარეთ ეს ამბავიო.
- კარგია! — თითქმის ვყვირი მე და შერე მახსენდება, ბავშვი  
 რომ იძინებს. სასწრაფოდ პირზე ხელს ვიფარებ.
- მაია თავს შეწუხებული ღიმილით აქნევს აქეთ-იქით.
- რა აწეწილი კაცი ხარ, გურამ!
- რას იზამ, ძალიანაც მინდა დალაგებული ვიყო, მაგრამ...
- ქუჩაში მაია მხარზე მეკვრის და საყვედურით ჩუმად მაპა-  
 რებს: — დიდი ხნით მიდიხარ ექსპედიციაში?.. ხომ აღმოაჩინეთ ეს  
 ცეოლიტები, მეტი რაღა გინდათ?
- მეტი გვინდა, მაია, მეე-ტიი!..

## გ ა ტ ა ც ე ბ ა

შუადღეა...

ავვისტოს პაპანაქებას გაუთანგავს სოფელი.

ჰაერში თითქოს შედგებულ სიციხე დაბოროილებს და სხეულ-  
 ში ძნელად გადასაყლაპ ლუკმასავით ჩადის...

სოფლის ცენტრში უზარმაზარი მუხის ჩრდილს შეფარებიან ავტობუსის მომლოდინე მგზავრები და უინტერესოდ, სიცხისაგან ილაჭგაწყვეტილი თითო-ოროლა სიტყვას თუ გადაუგდებენ ერთ-მანეთს.

ცოტა მოშორებით, გზის გასწვრივ ჩამორიგებულან კოლმეურნეობის, სკოლის, კლუბის შენობები... პირდაპირ საავადმყოფოა..

ასიოდე მეტრს იქით ხიდის თეთრი მოაჯირი მოჩანს. აქ ანკარა ხობისწყალი მოედინება... ხიდის ქვეშ კარგი საბანაოა, მთიდან სამიოთხი კილომეტრი სულ რაგრაგით მსრბოლი ჩხერიმელა აქ ჩამოივაკებს და, თითქოს შეისვენაო, უკვე მდორედ, დაჭანკულივით მიედინება.

ორივე ნაპირიც კარგა ფართოდ შეუსილავს მდინარეს. ჰოდა, მეტი რაღა უნდათ სოფლის ბიჭებს. პატარებს და მოზრდილებსაც აქ მოუყრიათ თავი. ჭყუმპალაობენ წყალში და ნაპირზე აღარ გამოდიან.

მუხასთან კი ისევ სიჩუმეა. ავტობუსი აგვიანებს. ერთი ჩოფურა, ლოყებაფორაჯებული კაცი უკვე ნერვიულობს, ბოლთას სცემს და თავისთვის რალაცას იქაღნება. მერე შედგება, ყურს მიაპყრობს იქით, საიდანაც ავტობუსი უნდა გამოჩნდეს, მაგრამ სანუგეშო არაფერი ესმის და უკვე ხმამალა აცხადებს: — არა, ბატონო, ასე სანამ უნდა გაგრძელდეს? — მერე თითს მუქარით აქნევს: — მე, მაგას ვუჩვენებ სეირს! — ამბობს, გამწყრალ თვალს თანასოფლელებს მიმოავლებს და რატომღაც ღიღინს იწყებს.

სხვები ეჭვის თვალით შესცქერიან. ალბათ ფიქრობენ, ავტობუსი რომ მოვა, კრინტსაც არ დაძრავს და მანქანაში ასვლასაც ყველას დაგვასწრებსო...

მგზავრებს შავებში ჩაცმული ორი ქალი შემოუერთდა. კარგა მოზრდილი ტომარაც მოათრიეს. ერთ-ერთმა, რომელიც უფრო ახალგაზრდა ჩანდა, სრულიად მოუკრიდებლად და უბოდიშოდ იქვე დაიწყო წინდების სწორება. ორ-სამ მამაკაცს თვალი მისკენ გაექცა.

... უცებ, ხიდის მხრიდან მანქანის საყვირის გაბმული ხმა მოისმა. მგზავრები შეჩოჩქოლდნენ, შეიქნა მიწევ-მოწევა. ქალებმა ტომარას სტაცეს ხელი, ორმა კაცმა თითქოს მიშველიებაც დააპირა, მაგრამ მერე გადაიფიქრეს და უბრალოდ ადგილი მოინაცვლეს.

მანქანის საყვირი კი არ ჩუმდებოდა, დასაკლავი გოჭივით ჭყვიროდა.

— რას აყვირებს თუ იცი?!.. — გაბრაზდა ისევ ჩოფურა, კისრიდან ცხვირსახოცი მოიგლიჯა და გაწურა.

— ფუჰ, ფუჰ!.. — დაიჭყანა, საიდანღაც შეუმჩნეველად შემომატებული სოფლის ინტელიგენტი, რომელსაც ამ გაგანია სიცხეში ყელამდე შეკრულ პერანგს შავი ჰალსტუხი უმშვენებდა.

მგზავრების გასაკვირად, მანქანა ავტობუსი არ აღმოჩნდა. „კოლხონიკი“ სოფლის ცენტრში შემოვარდა და საავადმყოფოს წინ ღრჭიალით დაამუხრუჟა.

მანქანის ხმაურზე დაფეთებული ძაღლები აყუდუნენ, აკრიახდნენ ქათმები, აქოთქოთდნენ ინდაურები...

მანქანის ორივე კარი ერთდროულად გაიღო. პირველად მძლოლი — მაღალი, ქერა, გაფითრებული ბიჭი გადმოხტა და ასფალტზე საშინელი ღრიალით დაემხო.

ხალხი ჭერ კიდე ვერ მიმხვდარიყო ვერაფერს...

უცებ ქალის კივილმა იქაურობა შეძრა...

მანქანას წინიდან შემოუარა და მუხის ძირას გაშეშებული ადამიანებისაკენ წამოვიდა ტრუსების ამარა, სულ მთლად გასისხლიანებული ბიჭი. საცოდავად მოფარფატებდა და უაზროდ აცეცებდა თვალებს. მარჯვენა ხელის ადგილას ხორცის ნაფლეთები ეკიდა.

მერე შედგა... თვალები ხალხს მიაშტერა... და ნელ-ნელა ჩაიკეცა...

— ბეჟარ, ბეჟარ! — ეს რა დაგმართნია, ბიჭო! — პირველი გამოერკვა ჩოფურა, საზარელი ხმით აყვირდა, ბიჭისაკენ გაქანდა... ხელში ბავშვივით აიტაცა და საავადმყოფოსკენ წაიღო...

...სულ კივილ-კივილით გამოირბინა სოფლის ორღობე ბეჟარის ბებიამ და როცა საავადმყოფოსთან მიიჭრა, მის კივილს ბარე ხუთმა-ექვსმა ქალმა აუბა ხმა.

... — მზე უკვე ქვემოთ, ქალის პირს ამწვანებული ცაცხვების კენწეროებს ჩამოეკონწიალა... სოფელში ოცინდალეს მთის ნიაგმა ჩამოინვარდა და ჰაერი აკვანივით დაარწია. საავადმყოფოსთან სოფლელები შეგროვილიყვნენ და ჩურჩულით ლაპარაკობდნენ. ყველას შეწუხებული სახე ჰქონდა.

ავტობუსი უკვე რაიონული ცენტრიდან მობრუნდა.



ბევრი მგზავრი არ ჩამოუყვანია, ათიოდე კაცი თუ იქნებოდა. ყველამ უცებ საავადმყოფოსკენ ქნა პირი.

— რა იყო, რა მოხდა?

— რაიონში გავიგე, ბექარს ხელი მოწყვეტიაო, — შერიკი საავადმყოფოს ღობესთან შეკრუფულ ახალგაზრდებს მალალ-მალალი, ხმელი ბიკი.

— გუშინ ჩამოვიდა ბექარი ბებიაშისთან თბილისიდან და... ხომ იცი, მაგისი ამბავი, ანკესს დაავლო ხელი. ხობისწყალზე წასულა ნაშუადღევს, ერთი თევზი რა არის, წამლად ისიც კი ვერ დაუჭერია.

— ისე, მაგას სულ თევზები ახსოვს... მერე?

— ჰოდა, საღამოს კინოში მოვიდა. მე და მურმანი ერთად ვისხედით. დაგვიწყო აქეთურ-იქითური. ბოლოს მაინც თევზაობაზე ჩამოგვიგდო სიტყვა. ექვსი კაფსული მაქვს, მდინარის სათავისკენ წავიღეთო. მე არ მეცალა ღღეს, მექის ვაზის შეწამვლაში ვეხმარებოდი. მურმანი დაითანხმა. დილას თავმჯდომარე წაიყვანა ზუგდიდში, დათხოვია მერე და ბექართან ერთად წასულა სათავისკენ.

— ამონალი ვინ მისცათ?

— გახუს მიუცია, ცინდელიანს.

— გახუ არ ვიცი და... მურმანს ვუჩვენებ სეირს, მერამდენედ აკეთებს ამას. ხომ გახსოვს, დინამიტით თევზაობის გულისთვის კრებაზე სულ ბღღვირი რომ ავადინეთ! — ცოტა სიამაყე შეგებარა ახალმოსულს ხმაში, — ახლა დამაცადოს! — დაიქაღნა ბოლოს.

— შენი კრება კი არადა... მწარედ ჩაიციანა ამბის მომყოლმა, — მილიცია ჩამოვიდა რაიონიდან, ახლა იქა ჰყავთ, აბა, ჩემო ვახო!

ბიკები ერთხანს ჩუმად იდგნენ.

— როგორ გავარდნია? — იკითხა ისევ ვახომ.

— მოკლე პატრუქი გაუკეთებია, გვადის ხილთან რომ მორევიან, იქ უნდოდათ სროლა. კიდევე კარგი, ხელის მოქნევა მოუხსწრია, თორემ თავსაც წააცლიდა.

— ეჰ! — ამოიოხრა თოხის ტარზე დაყრდნობილმა, აქამდე ჩუმად მდგარმა ბიკმა. — საწყალი, არ გადაყვა ამ თევზებს? კოსტა ქირურგმა სულ ძირში მოხერხა მკლავი...

— მურმანის მამა იყო აქ, შენ გეძებდა, მილიციას კომკავშირის კომიტეტის დახასიათება უთხოვია.

ახალმოსულმა ხელი ჩაიქნია და საავადმყოფოს შესასვლელისაკენ გაემართა.

2. ზ. ღარასელი

— კაი მოგეცა, კაი დახასიათებას მისცემს მაგი!.. — ბოროტად გამოსცრა კბილებში თოხის ტარზე ჩამოყრდნობილმა.

ბიჭებმა მოწყენილი მზერა გააყოლეს კომკავშირის კომიტეტის მდივანს.

— ბეჟარ...

— გისმენ, ქეთინო...

— ესე იგი, მაინც მიდიხარ ამ სალამოს?

— პო, ქეთინო, უნდა წავიდე, ძალიან მომენატრა სოფელი.

— მერე, მე?

— შენ? შენც ხომ ვერ წაგიყვან?

— არა, მაგიტომ კი არ მითქვამს... რატომღაც მგონია, რომ ვე-  
ლარ ვნახავ.

— კარგი, რა ქეთი... არ გამაცინო, რაებს მეუბნები! სასიკვდი-  
ლო ჯერ არაფერი მჭირს...

— ნუ დამცინი, რა, ბეჟარ. მართლაც ცუდი წინათგრძნობა  
მაქვს, — აქეთ ჩემი ძმის მისაღები გამოცდები, იქით შენი გამგზავ-  
რება... ღმერთო, რა ცუდი სიზმარი ვნახე წუხელ!

— პა-პა-პა...

— უსინდისო!..

— დიდი მადლობა!

— გაგაცილო?

— აბა-რა!

— რომელ საათზე გადის ზუგდიდის მატარებელი?

— ათზე...

ვერ მოახერხა ბეჟარის გაცილება ქეთინომ, მთელი საღამო წვიმ-  
და თბილისში გადაულეებლად.

ბეჟარი მარტო წევს პალატაში. ფანჯრებს ღამის სიბნელე მოს-  
წოლია. ხანდახან ღრუბლებში გამოკრთება მთვარე და მკაფიოდ გა-  
მოიკვეთება მუხის ტოტები. ნიავი უბერავს და აშარიშურებს ფოთ-  
ლებს.

ბეჟარი თვალებს ხუჭავს, იმმუშნება.

— რა იყო შეილო?

ბეჟარს ბებიამისის ხმა თითქოს შორიდან ესმის.

— დავილუპე, ბებო?..

— არა, გენაცვალე, პირიქით... გადარჩი. — მოხუცი ქვითინს ველარ იკავენს და შვილიშვილის ფეხებთან საბანში რგავს თავს.

საბილიარდოში ხალხმრავლობაა. ბექარს ყველაზე ძლიერმა მოთამაშემ — გვიმ შესთავაზა პარტია. ბექარს თავის სიცოცხლეში არ უთამაშნია ალბათ ასე კარგად, მაგრამ არც გივი უდებს ტოლს. ორივეს თამაშს მთელი საბილიარდო შესცქერის. აი, ორი ბურთულა და დარჩა მაგიდაზე. ვინც ერთს ჩააგდება, მოგებულია.

გივი ურტყამს და ბურთულა ლუზაში ეჩხირება. მხოლოდ წაქარებაა საჭირო და თამაში მოგებულია... მაგრამ ეს რა არის? ბექარი მარჯვენას ვერ იმორჩილებს, წვალობს, კიას ხელშიც ვერ იღებს. მარცხენითაც ცდილობს, მაგრამ, არა... არაფერი გამოდის, მარცხენაც გაშეშება. უკვე კბილებით ცდილობს, კია აილოს, ვერ იღებს. მაგიდაზე გადაემხო, განწირული, გაფართოებული თვალები საცაა ბუდიდან ამოუვარდება... ბურთულა გაჩხერილი რჩება ლუზაში...

გივი უცნაური ხმით ხარხარებს.

უკანასკნელ ძალას იკრებს ბიკი, იქნებ... მაგრამ თავს ზემოთ ძალა არ არის...

ბექარი საწოლში ბორგავს. რაღაცას ყვირის, ვიღაცას ემუქრება. ორი ექთანს ფეხებსა და მხრებში ჩაფრენია და აკავენენ, ექიმმა რაღაც სითხე შეუშხაპუნა. ნელ-ნელა იძირება ბიქის გონება სიცარიელეში...

წყალში ყურყუმელაობს.

სისხლისფრად დაწინწკლული კალმახები ლაღად სრიალებენ მის გვერდით, თითქოს ბექარს ეჯიბრებიან სიმკვირცხლეში. ამ დროს წყლის სიღრმეში დინამიტი ეშვება შიშინით და ნაპერწკლებს ყრის. კალმახებმა არ იციან, რა საშინელებაა ეს... პირიქით, ცნობისმოყვარე თევზები გარს ეხვევიან დინამიტს, ბექარმა კი იცის, რაც შეიძლება დინამიტის აფეთქებას მოჰყვეს. პირს აღებს, უნდა კალმახები დააფრთხოს, დაიყვიროს, მაგრამ პირი წყლით ევსება და ხმის მაგივრად რაღაც ბუყბუყი ამოსდის. მაშინ ხელებით ერეკება აქეთ-იქით თევზებს, ისინი მაინც ცელქობენ... უცებ დინამიტი აფეთქდება...

ბურუსი იფანტება. კალმახები აღარ ჩანან. ცარციტ გაუთეთრე-

ბიათ ირგვლივ თითქოს ყველაფერი. ამ სითეთრეს ფხრეწს და მისკენ მიიწევს რალაც უზარმაზარი, ნახშირივით შავი... თევზის ფორმა აქვს, არა, უფრო ურჩხულის, აი, ისეთის, ზღაპრებიდან რომ ახსოვს. ურჩხული პირს ალებს და...

— ააა! — არაადამიანური ხმით ღრიალებს ბექარი და თვალებს აქყეტს.

გათენებულა...

მისთვის ფეხები შეუბორკავთ და საწოლზე დაუკრავთ.

— თევზაობა და ბილიარდი, აი, ჩემი უსაყვარლესი გასართობი, უამისოდ ძალზე მოსაწყენი იქნებოდა ჩემი ცხოვრება.

— კი, მაგრამ, სულ თევზებზე რომ ლაპარაკობ, ქამით ხომ მაინც არ ქამ? ვერაფერი გამიგია...

— ქეთი, იცი რა? უბრალოდ, თევზაობა მონადირული ყინია. ბილიარდი — სპორტული... ორივეს დიდი ნებისყოფა სჭირდება. თევზს რომ დავიჭერ, ხელში რომ ამისხმარტალდება... ან შორიდან ბურთულას მარჯვედ რომ ჩავაგდებ ლუზაში, თითქოს სიცოცხლის წლები მემატება.

— შენს საკონკურსო ქანდაკებას როდის ამთავრებ?

— აი, სახელოსნოს მოვაწესრიგებ და... მთავარია, შთავგონება მოვიდეს. ჩემი ხელების იმედი მაქვს.

— მეც მაქვს შენი იმედი... — თმობს ქეთინო პოზიციებს. მას არც ბექარის დაჭერილი კალმახი უნახავს და არც ლუზაში ჩაგდებული ბურთულა. ახალგაზრდა შემოქმედთა გამოფენაზე კი ბექარის ქანდაკებებით მოჯადოებული დარჩა...

— შინმოუსვლელთა ძეგლს ამთავრებდა ელენეს შვილიშვილი, თურმე ჩვენი სოფლის კოლმეურნეობის თავმჯდომარეს უთხოვია, — ჩურჩულებენ ერთმანეთში საავადმყოფოს ექთნები.

— უსასყიდლოდ გვიკეთებდა, თუ?..

— კითხულობს პირველი.

— უსასყიდლოდ. ბაბუამისიცი ომში არ დაიღუპა, შე ქალო?! — უდასტურებს მეორე.

— მაშინ კი...

— საწყალი ბიჭი. რა უნდა აკეთოს ახლა მაგან ცალი ხელით?

— რატომ, ხელოვნურ პროთეზს ხომ გავუკეთებენ? — გულუბრყვილოდ კითხულობს მესამე ექთანი.

— სულელია ეს უპატრონო: ხის ხელით რა უნდა აკეთო?! — დამამცირებლად უხსნის პირველი ექთანი, — წადი, საქმეს მიხედვ. ორნი რჩებიან.

— ნეტა დედ-მამამ თუ გაიგო თბილისში?

— შეატყობინებდნენ!

— საცოდავები...

— აბა... ეს ერთი ბიჭი ჰყავთ.

— რას შერება ახლა, გამოვიდა მდგომარეობიდან?

— კოსტამ ახლახან შეუხვია კრილობა. მორთი გავუკეთე. სძინავს ალბათ...

— ახსენით მაინც?

— კი!

გახუ ცინდელიანს ჩაუქინდრავს თავი ბექარის საწოლთან და ნაწყვეტ-ნაწყვეტად ლულუღებს.

— ჩემი ბრალია. მე საცოდავს მინდოდა, წამოგყოლოდი. იმის-თანა სათევზაო ადგილები ვიცი ხობის წყალში, რომ... რად გვინდოდა დინამიტი?!. რა ვქნა, რა პასუხი გავცე თქვენებს?..

— გახუ... — უცნაურად უციმციმებს თვალები ბექარს. — თუ ძმა ხარ, ერთი კალმახი დამიჭირე და მომიყვანე, ეხლავე, ცოცხლად მომიყვანე!

— დედა! რად გინდა, ბიჭო, ერთიანად გამწყდარა ყველა.

— გახუ, შენი ჭირიმე, მომიყვანე!..

— ბექარ, ხომ არ გაგყუდი... გინდა ჩამქოლოს სოფელმა?..

— გახუ, გეხვეწები!..

ბექარი მთლად მიღეულა საწოლში. ცრემლები ახრჩობს.

მეორე დღეს რაიონულ გაზეთ „კოლმეურნის ცისკარში“ დაიბეჭდა პატარა წერილი. აი მისი შინაარსი:

„გუშინწინ ორი „მეგობარი“, მურმან კ. და თბილისელი ბექარ ნ. დინამიტებით „შეიარაღებულნი“ ხობის წყალზე უმწეო თევზებს დასახოცად ეკვეთნენ. ბრაკონიერებს, როგორც იტყვიან, კოკა წყალზე გაუტყდათ. ბექარ ნ-ს დინამიტი ხელში აუფეთქდა და მარჯვენა წააგლიჯა. იგი მძიმე მდგომარეობაში მიიყვანეს სოფლის“

საავადმყოფოში. ხოლო მურმან ნ. დაელოდება მეგობრის გამოჯანმრთელებას იქ, „სადაც ჯერ არს“ და ერთად წარსდებიან სახალხო სასამართლოს წინაშე. სწორედ ამაზეა ნათქვამი: „რაც მოგივა, დავითაო, ყველა შენი თავითაო“.

## ცუდი სიზმარი

- ნანკა! იცი, ვინ იქნება დღეს ჩემთან?
- ვინა?
- აბა, თუ გამოიცნობ.
- ააა!..
- ჰოო...
- როგორც იქნა, ძლივს არ გავიცნობთ შენს ნიკუშას?
- ჯერჯერობით არც ჩემია და...
- არც ჩემი! — გადაიციკისა ნანამ.
- იცი, რა ბიჭია!
- აზრზე ვარ... მალალი, სიმპათიური, გიტარაზეც კარგად უკრავს...
- მოკლედ, ბიჭია ბიჭური. ნახავ, რა...
- ბევრი ხალხი გეყოლება?
- ისე, რა, მარტო ახლობლები...
- რომელზე ვიკრიბებით?
- შვიდისთვის წვეისადილებით და დაღამდება კიდევ... მერე ვიცეკვოთ... შენ რა, ისევ ზაფხული ხომ არ გგონია. სექტემბერი თავდება. იცოდე, არ დაგვიანო. ყველა გავაფრთხილე — ზუსტად შეიღ საათზე ვსხდებით.
- ცოტას დავიგვიანებ, რაა...
- არავითარი... იცოდე არ შემოგიშვებ!
- კარგი.
- ნახვამდის.
  
- თამუნა ხარ?
- აბა, არა?!

— შე უსინდისო, სულ მე უნდა გირეკავდე?

— ხო იცი, არა...

— კარგი, კარგი. დღეს შეიდ საათზე ჩემთან ვიკრიბებით.

— ბლომად ხალხია?

— ჩვენები... და ნიკუშა...

— აჰ! ნი-კუ-შა? ძლივს დაგვაყენე საშველი!

— არც მე მინახავს ბიჭვინთის მერე. გუშინ დამირეკა. მოსკოვ-ში ყოფილა თავის პროფესორთან და...

— კაი ტიპია, არა!

— გლი-ჯავს!

— რამდენი წლისაა?

— შარშან დაამთავრა სამედიცინო...

— ოცდართხის იქნება?

— ჰო, რა, ეგრე იქნება.

— ვნახოთ, ვნახოთ...

\* \* \* \* \*

— სალომე, შე „სალომე“, შენა... როგორა ხარ?

— ძა-ლი-ან მოწყენილი...

— აბა, იცოდე, დღეს ეგ არ გამაგონო, იცი, ვინ იქნება ჩემთან?

— ვინა?

— აი, რომ გეუბნებოდი, ბიჭვინთაში გავიცანი-მეთქი... ექიმი.  
:მოსკოვში რომ დაამთავრა.

— რა ჰქვია?

— ნიკუშა... არ გახსოვს, რომ გიყვებოდი?

— ჰოო, მახსოვს. გადარეული რომ იყავი, მაგარი ბიჭიაო...

— ოო!..

-

— წავედი, დედა!

პრიალა ვარდისფერ ხალათში გამოწყობილი, წითლად თმაშე-  
ღებილი, მსუქანი, ჯერ კიდევ ახალგაზრდა ეთქმოდა, ისეთი ქალი,  
ოქროსფერი ქოშების ბაკუნით გამოგოგმანდა შემოსასვლელში.

— ნიკა, დამენახვე ერთი, რა გაცვია?

ნიკას ჭინსის პერანგი და ჭინსისავე შარვალი ეცვა. სარკეში თმას  
ისწორებდა.

— აბა, შენ იცი, ნიკუშა, — ქალმა ყურადღებით აათვალიერ-  
ჩაათვალიერა ბიჭი. — ხომ იცი, პროფესორ ცოტნიაშვილს ოჯახია.

ყველა შენ დაგაკვირდება, თავი ისე დაიჭირე, რომ...

— კარგი, კარგი... — გააწყვეტინა ბიჭმა. — ვიცი, როგორც უნდა მოვიქცე. არ დამიწყო ახლა...

— ნუ უხეშობ, ნიკა! — ქალმა თითი მუქარით დაუქნია. — მანქანას გამოიყვან?

ნიკამ მხრები შეიშმუნა...

ნიკა მიდიოდა და მოწყენილი შესტკეროდა გამვლელებს. ბიჭებიც და გოგონებიც, ქალებიც და მამაკაცებიც ყურადღებას აქცევდნენ მაღალ, სიმპათიურ ახალგაზრდას, რომელსაც ეფექტური ჩაცმულობა კიდევ უფრო შესამჩნევს ხდიდა. ნიკა კი, ვითომც აქ არაფერიო, დაიპერდა თუ არა ვინმეს დაკვირვებულ, ზოგჯერ დაუფარავად ალტაცებულ მზერას, იქვე გულგრილად თვალს აარიდებდა, თავის უპირატესობაში დარწმუნებული.

ფეხით ჩაუყვავა ვარაზის ხეეს. შორს არც მიდიოდა, თერთმეტსართულიანი სახლისკენ ჰქონდა გეზი აღებული.

ვარაზის ხეეში ხალხი, საერთოდ, არ ჩანდა: მოპირდაპირე მხარეს მოჰკრა თვალი ორიოდღე წყვილს და ცოტა ეწყინა კიდევ, ყურადღება რომ მოისაკლისა.

ნაბიჯს აუჩქარა... თბილისს მოკრიალებული ზეცა ეფარა. ირგვლივ ჩიტების ყრიაშლისაგან ყურთასმენა აღარ იყო.

— მეგობარო! — შემოესმა უცებ.

ტანმა რაღაც ცუდი უაზრა, ვითომც ვერ გაიგო, ნაბიჯი არ შეუნელებია.

— მეგობარო! — დაუძახეს ისევ, უკვე ახლოდან.

შედგა.

მისკენ დაბალი, გაწრიპული ბიჭი მოდიოდა.

— გამარჯობა! — გაუცინა ბიჭმა.

— გაგიმარჯოს!

ისევ ცუდი უგრძნო ტანმა.

იმ ბიჭს მიტკლისფერი ედო, თვალის უბეები ჩაშავებოდა, საოცრად არამეტყველი სახე ჰქონდა.

„კაცი არ ვიყო, თუ პირველად არ ვხედავდე“.

— როგორა ხარ? — დაცინვით, ხრინწიანი ხმით შეეკითხა ბიჭი....

„არავის არ მაგონებს... ჩემზე უმცროსიც ჩანს... ვინ უნდა იყოს? არ ვიცნობ...“



— როგორა ხარ-მეთქი? — ისევ გაუმეორა ბიჭმა და ჯერ ცხვირი მოიქაეა, მერე კი თმაზე ჩამოისვა აკანკალებული ხელი.

„კაეფშია?“

— არა მიშავს, შენ როგორა ხარ? — თავისი დაჭიმული და მთრთოლვარე ხმის გაგონებამ კიდევ უფრო აანერვიულა ნიკა.

— უყურე შენ... მიცანი? — ისევ დაცინვით გაიკვირვა ბიჭმა და გაიკრიჭა. წინ ერთი კბილი აკლდა.

ნიკამ დაძაბულად, მაგრამ მაინც მოახერხა გაღიმება.

უცებ ბიჭმა ძალიან სერიოზული სახე მიიღო:

— ვერა, ძმაკაც, ვერ მიცანი. ძა-ლიან ცუდია... ერთი, აქეთ მაი-წი! — სკვერში შეიწვია უესტიო.

ნიკას ბიჭი მხრებამდეც ვერ სწვდებოდა. ცოტა გული მოიცა.

— რა იყო! — ჰკითხა და, ასე თუ ისე, თვალი გაუსწორა ბიჭს.

— არაფერი. წამო, დავსხდეთ! — პატარა სკვერის სიღრმეში სკამზე მიუთითა და იქითკენ გასწია.

ნიკამ იხტიბარი აღარ გაიტეხა.

ბიჭი მოტრიალდა. ნიკას დაუცადა და მერე ხელმკლავი გამოს-დო.

ნიკამ ხელის განთავისუფლება სცადა.

იმან კი ჯიბიდან სწრაფად ამოიღო გაშლილი დანა და მუცელზე მიაჭირა.

— წამო... ნუ ჯიუტობ!

გააცია.

— რა გინდა? — ძლივს ამოიღულულულა ნიკამ.

— წამო, კაცო, აგერ ჩამოვსხდეთ, ვილაპარაკოთ... არაფერი არ მინდა, რა უნდა მინდოდეს? — ისევ მშვიდობიან კილოზე გადავიდა ბიჭი.

ჩამოსხდნენ.

ბიჭმა დანა დამალა.

— აი, ასე... რა გქვია, მეგობარო?

სასოწარკვეთილს, ლაპარაკის უნარიც დაეკარგა.

— რა გვარი ხარ? — ჩაესმა ისე, თითქოს ძილში ყოფილიყო.

— მილორაგა! — ამოღერდა.

— ვაჰ! მეგრელი ხარ?

— ჰო!

— ჰო კი არა, დიახ! — გაუსწორა.

— სიგარეტი გაქვს?

— მაქვს! — ჯიბეზე მოისვა ხელი და გაუშეშდა, იქ მასაც დანა უღო.

— ჰა, ამოიღე, რაღა! — შეუტია ბიჭმა.

ნიკამ სწრაფად ამოიღო „მარლბორო“ და გაუწოდა.

— შენ ისეთი ბიჭი ჩანხარ, „ზაუიგალკაც“ გექნება.

ნიკამ სანთებელაც ამოიღო.

ბიჭმა ორივე გამოართვა. სიგარეტს მოუყიდა. მერე კოლოფიც და სანთებელაც ხალათის გულის ჯიბეში ჩაიტენა და ბოროტად მოწყურა თვალები.

— სად გავჩერდით! — შეეკითხა მასწავლებელივით, — ჰო, სად მიდიხარ?!

— ამხანაგთან.

— რა გინდოდა?

— ისე, რა, არაფერი.

— მოიცა, ერთი არ გამაგიჟო! — ცოტა გამოცოცხლდა ბიჭი, — ამხელა კაცი ხარ და არაფერი არ გინდა, ისე მიღიხარ ამხანაგთან?

— არ მინახავს დიდი ხანია.

— ეგრე თქვი, შე კაცო...

— თუ ძმა ხარ, აგერ ოცდახუთი მანეთი მაქვს... — ნიკამ ფული ამოიღო და ხელში მიაჩეჩა.

იმას, თქვენც არ მომიკვდეთ, წარბიც არ შეუხრია. აუღელვებლად, დინჯად ჩაიდო ფული გულის ჯიბეში და მერე მოულოდნელად სტკიცა სილა ლოყაში.

ნიკას წამოხტომა უნდოდა, მაგრამ დანის აპრიალებული პირი დაინახა და კისერმოწყვეტილივით უიმედოდ ჩაქინდრა თავი.

— რა მოხდა, ძმაო, დაგიშავე, რამე? — ნიკას უკვე მუხლებიც უქანკალებდა.

— არა, არა გენაცვალე! — გაუღიმა.

— აბა?

— სონი ექ? — ჰკითხა უცებ მეგრულად.

— მარგალური გიჩქუნო? — გაუხარდა ნიკას.

— ააა! ალაპარაკდი?! — უხეშად, სიძულვილით შეაწყვეტინა. — ახლა რომ გამოგფაშვო, დღისით-მზისით, რას იზამ?

ნიკამ მხოლოდ მხრების შეშმუშნა შეძლო.

— გეშინია, თუ არა?

- მეშინია! — გამოტყდა მაინც.
- მშიშარა! — გველურად გაიცინა. — სხვანაირად, ხომ იცი, რაცა ხარ?
- არა!
- გითხრა თუ დაგანებო თავი? — დაინტერესდა ცინიკურად.
- შემეშვი, თუ ძმა ხარ! — ისევ ცოტათი გამოცოცხლდა იმედ-მოცემული, — ჩემი გაჭირვება მეყოფა.
- შენი გაჭირვება? — დასცინა ბიჭმა. — რა გაჭირვება, ვიყოთ აქ ცოტა ხანს, ვისაუბროთ.
- „უპ, შენი“, — გულში ამოიკენესა ნიკამ. უკვე დაკარგა თავის დახსნის იმედი და ბედს დაემორჩილა.
- ბიჭმა სულ აუშვა აღვირი. თმაზე ხელი გადაუსვა.
- ეს ჭინსები სად „დაიაღე?“
- რაო?
- ჭინსები მომწონს!.. — ჩაფიქრებით თქვა და დადუმდა. მერე თითქოს სულ დაავიწყდა თავისი მსხვერპლი, ფეხით მიწას დაუწყო ჩიჩქნა.
- ნიკა! — დაიძახა ვიღაცამ ქუჩიდან.
- გონებადატუნტულმა გაიხედა. სკვერში ზურა ჭანჭლავა იხედებოდა და ხელს უქნევდა.
- მოიცა, — უბრძანა ბიჭმა. — ხმა არ გასცე!
- ზურა სკვერში შემოვიდა და მათკენ გამოემართა.
- რა იყო, ბიჭო, ხმას რომ არ იღებ?
- შეეკითხა მოახლოებული ნიკას და ბიჭს ექვიანად გადახედა. შეეტყო, არ მოეწონა.
- რა ვიცი! — როგორც იყო, წამოდგა ნიკა და გამოწვდილი ხელი ჩამოართვა.
- ბიჭიც ადგა.
- ვინ არის ეს? — ჰკითხა ჩუმად ზურამ.
- ჩემი ამხანაგია.
- ზურა გაცეხებული შეჰყურებდა.
- ვერ გაიარე შენთვის? — ბოროტად გამოსცრა კბილებში უცებ ბიჭმა.
- რაო? — გაიკვირვა ზურამ ასეთი უცერემონიო მომართვა.
- რაო და, ის! მოუსვი აქედან! — მთლად ჩაეხრინწა ბიჭს ხმა და ჭიბისკენ გააქანა ხელი.

ზურამ უცებ მოწყვეტით გაიქნია მარჯვენა და ნიკაპში სთხლიშა-  
ბიკი სკამზე გადემხო.

— ზურა, ფრთხილად, დანა აქვს!

— ამისი დანაც და ამისი!... — მიაყოლა ზურამ შეიღსართული-  
ნი, ბიკის ადგომას დაელოდა და დანაგაშიშვლებულს ფეხი ჩააზი-  
ლა მუცელში.

ბიკი ახლა უკვე მიწაზე „წამოწვა“; ყველაფერზე ეტყობოდა,  
კარგა ხანს აღარ აპირებდა ადგომას.

— წამო, წავიდეთ აქედან... თუ დარჩები? შენს „ამხანაგს“ ექი-  
მი სჭირდება.

ზურამ ყოყმანით გადახედა ნაძირალას, რომელიც მუხლზე წა-  
მოჩოქებას ლამობდა...

— შენ რა, რა გგონია... ამის დედაც!, — ნიკამაც უცებ ფეხი  
ჩააქრა მუცელში.

— წამო, წამო, ბიკო, არ მოკლა!..

— სად მიდიხარ?

— ღამის ცელაში ვმუშაობ...

— სწავლა?

— მე ხომ დაუსწრებელზე ვარ... წელს ვამთავრებ...

— ძაან გაგგრძელებია, აი?!

— რას იზამ, ძმაო, თან ვმუშაობ, თან ვსწავლობ. ორივე ერთად,  
ხომ იცი, ცოტა ძნელია.

— შრომა აკეთილშობილებს ადამიანს! ხომ გაგიგონია, — ნიკას  
უკვე რიხი მისცემოდა ხმაში, თავსაც უფრო მსუბუქად გრძნობდა.

— ასეა — გაიცინა ზურამ. — ისე, მე რომ არ გიკითხო, არც კი  
გაგახსენდები.

— აბა, ჯადოქარი ხომ არა ვარ, მოსკოვიდან უცებ, როცა შენ  
მოგენატრები, აქ გავჩნდე.

— შე კაცო, — ეწყინა ზურას. — ყოველ არდადეგებზე თბილის-  
ში ჩამოდიხარ. ორი წელია სულ არ გიკითხივარ.

— დედაჩემი მეუბნებოდა შენს ამბავს!

— ისიც კი არ იცი, ინსტიტუტი რომ არ დამიმთავრებია და...

— კარგი, კარგი, — შემწყნარებელი ღიმილით დაეთანხმა ნი-  
კა, — წავედი, თორემ... მიცდიან, ჰო, მართლა, — გაახსენდა უცებ, —  
როგორ მომაგენი?

— დედაშენმა მითხრა, ჯერ ვარაზისხევი ჩავლილი არ ექნებაო და... გამოვიქეცი.

„რომ არ გამოქცეულიყო?“ — გაუელვა ნიკას და ისევე შიშმა მოიცვა.

— ჰა, შე ძველო, რა მოგივიდა? — შეაჯანჯლარა ზურამ.

ნიკა გამოერკვა. გაიცინა.

— „ქაროჩე“, ცოტაც და, მივასიკვდილებდი იმ ნაბიჭვარს, შენ უშველე.

— უჰ, მაგის!.. ეგრევე უნდა გეგლიჯა.

— ცოტა ვაცადე, შემეცოდა მაინც, სული ძლივს ედგა... — საკმაოდ დამაჯერებლად იცრუა ნიკამ.

ზურამ მეგობრულად ჩაიკრა გულში.

— აბა, შენ იცი! დაგირეკავ ხვალ.

— ხვალ? ხვალ შეიძლება შინ არ ვიყო... ხომ იცი, ნათესავეები... მერე ჩემი მოსკოველი ქართველებიც მელოდებიან, მანქანაც ვერა მაქვს წესრიგში. რალაც-რალაცები მოსაჭერია...

— ზეგ დაგირეკავ!

— ზეგ? მაშინ დილას დარეკე, სალამოს კათედრის გამგესთან ვარ... სალაპარაკო გვაქვს. გნახავ რა, მოკლედ!

— კარგი, კარგი... ვიცი შენი ნახვა...

— არა გრცხვენია, სიმონ?

ზურამ მეგობარი გადაკოცნა და ჩამომდგარი ავტობუსისკენ გაიქცა. დაბალი, გამხდარი, ნადრევად გამელოტებული ბიჭი იყო თეთრი უბრალო პერანგი და პოლონური ჭინსი ეცვა.

— ლიკა, შენმა ნიკუშამ დახურა!

— რას გეუბნებოდი!

— როგორ უხდება გიტარაზე დაკვრა. კაი სიმღერებიც სცოდნია...

— მოკლედ, ბიჭია ბიჭური.

— სალომე! როგორა ხარ შე „სალომე“, შენა!

— ძა-ლი-ან მოწყენილი.

— ბიჭი როგორ მოგეწონა?

— სიმპათიურია, მაგრამ „ჩერესჩურ“ ხომ არ იჭიმება?

— იცი, ამ დროს რა უბრალოა?!

— მე მგონი, ცოტას წაიძველებიჭებს კიდეც...

— რა ვიცი, აბა!

ნიკა იმ ღამეს და მეორე ღამესაც ყვირილით წამოახტუნა ფეხზე კოშმარულმა სიზმარმა. დედამ სედუქსენი დააღვეინა.

მესამე ღამეს უკვე მშვიდად დაეძინა.

მერე კიდევე ერთხელ დაესიზმრა ცუდი სიზმარი, მაგრამ აღარ წამომხტარა.

ისევ დაუბრუნდა მშვიდი ძილი.

ეს იყო, ვარაზის ხევი შეიძულა.

მანქანით რომ ჩაივლიდა, შეშფოთებით, მალულად გააპარებდა ხოლმე თვალს სკვერისკენ.

ორიოდე თვეში ის შემთხვევაც გადაივიწყა.

ერთ საღამოს ტელევიზიის გადაცემას უყურებდა.

რამდენიმე ფოტო ანახეს.

ნიკამ ერთ-ერთში „ის“ ბიჭი იცნო.

„ოთხი წელი მიუსჯიათ“.

ნიკას უკვე საბოლოოდ მოეფონა გულს.

### გავშვოვიღან...

— გადაშალეთ დედა-ენა. მონახეთ ასო „თ“... მონახეთ?

— დიი-ახ!

— ძალიან კარგი. აბა, თითი გააყოლეთ პირველ სტრიქონს. აი, თი-თი!

— აი, თი-თი!

წამოვდექი და სულ უკანა მერხზე მჯდომ გია სულაძესთან მივედი. გიამ გაოცებულმა ამომხედა.

— დღეს, გაკვეთილების მერე შტაბის შეკრება გვაქვს. იცოდე, დათოს და ვანიკოს არაფერი გააგებინო, — ჩაეჩურჩულე, — ახალი ამბებია...

— მართლა მტრის ბანაკში გადავიდნენ? — მკითხა მანაც ჩურჩულით.

— დღეს ყველაფერი გაირკვევა.

— ზაზა! — მომმართა უცებ მასწავლებელმა. — რას აკეთებ მანდ?

დაბნეულმა კლასს გადაეხედე. ყველა მე შემომცქეროდა. ვერა მასწავლებელმა კვლავ გამიმეორა შეკითხვა.

— რალაც საქმე მაქვს გიასთან, პატივცემულო მასწავლებელო!

— დაბრუნდი ახლავე შენს ადგილზე! — ღიმილის შეკავენას ცდილობდა მასწავლებელი, — გაკვეთილის დროს ასე მოქცევა არ შეიძლება.

— აწი მეცოდინება, პატივცემულო მასწავლებელო.

— ჩურჩულიც არ შეიძლება საზოგადოებაში! — ალერსიანად დამიყვავა ჩემმა პირველმა მასწავლებელმა.

## პეტრე

ჩემი დედუღეთელი ნათესავი პეტრე სამოცდაათ წელს გადაცილებული კაცია. თავისი დღე და მოსწრება სოფელში გაატარა. ბებიჩემს ყანის გათოხენაშიც ეხმარება, ვენახის შეწამლვაშიც და სხვა კაცურ საქმეებში.

დღეს, სიბინდის ყანას ეთოხნით მე და პეტრე ბიძია. საოცარი კაცია, ამდენი ხანია ვიცნობ და მისგან ერთი ხმამალალი სიტყვაც კი არ გამიგია. ისედაც სიტყვაძვირმა თითქმის ჩურჩულით იცის ლაპარაკი, ზოგჯერ ტუჩების ცმაცუნზე თუ შეატყობ, რომ რალაცას ამბობს.

— რა იყო, პეტრე ბიძია?

— შევისვენოთ?

იქვე, ყანის შუაგულში ვეება წაბლის ხის ქვეშ სპილენძის თუნგში ცივი წყალი გვაქვს. პეტრე ბიძია ხარბად სვამს პირდაპირ თუნგიდან წყალს და მერე მე მაწვდის... ცოტა ხანს ჩუმად ვსხედვართ ხის ძირში. მზით გაბდღვიალებულ ცას შევცქერით.

— რამდენი ხნით ხარ ჩამოსული?

— ორი თვით, პირველ სექტემბრამდე.

— მეათეში ხარ უკვე, ხომ?!

— დიახ, გაისად ამდენი ხნით ველარ ჩამოვალ. უნივერსიტეტში მინდა ჩავაბარო, ფილოლოგიურზე.

— აბა, შენ იცი. არ დაგვივიწყო, მაინც...

— თქვენს თავს რა დამავიწყებს, პეტრე ბიძია.

ის თავს ნლობით მიქნევს და ტუჩებს ამოძრავებს. ნაწყვეტ-ნაწყვეტ თუ მოვკრავ ყურს სიტყვებს, თორემ...

„— როდესმე ხომ უნდა ვკითხო?“

— პეტრე ბიძია, სულ ასე ჩუმაღ რატომ ლაპარაკობთ? რამდენი ხანია გიცნობთ, და...

იგი დაკვირვებით მიყურებს:

— განა ეს ცუდია?

— არა, მაგრამ...

— ხმამალა ლაპარაკი, ყვირილი, არ ვარგა, შვილო. ისედაც ხმაურიანია ეს დუნია, ისედაც გამაღიზიანებელი.

— ჰოდა, სწორედ ამას მიჩვეული ყურისთვის უცხოა თქვენი ჩუმი ხმა.

— ასე მირჩევნია, — დაბეჯითებით მეუბნება იგი, — ასე მიჯობს და შენც გირჩევ, ნურასდროს დაუყვირებ ვინმეს, არც ხმამალა ილაპარაკო.

აღარ ვაბეზრებ თავს კითხვებით. „ბებიას გამოეტეხავ, რაც იქნება-იქნება“...

... ადესის ყურძენს კრეფდა სოფელი. პეტრეს და მის ახლად-შერთულ ცოლს ლიდიკოს კარგი ვაზი ჰქონდათ. პეტრე თუთის ხეზე გასულიყო. გიდელი გაავსო გიშერივით ადესით და თოკით ძირს ჩამოუშვა.

— ლიდიკო, ჩქარა დამიცალე გიდელი! — დაუყვირა ცოლს.

ის კი, თურმე იქვე, ძალიან მაღალი ბლის ხის თითქმის კენწე-როში ჩამოკონწილებული თვითონაც კრეფდა ყურძენს.

— ცოტა ხანს მაცალე, პეტრე!

— ქალო, შენ ვინ დაგავალა ეგ საქმე. ჩამოდი ახლავე, გიდელი გამიცალე! — გაბრაზდა პეტრე.

— ნუ მიყვირი. რა მოხდა, მეც მიხარია ყურძენის კრეფა.

პეტრე გაცეცხლდა.

— ჩამოდი ახლავე, ქალო, არ ჩამომიყვანო აქედან!

ლიდიკო აკისკისდა.

— ჩამოდი-მეთქი! — ბოლმისგან ხმა ჩაეხრინწა პეტრეს.



ქალი გაყუჩდა. მერე სასოწარკვეთილმა წარმოსთქვა:

— პეტრე, ნუ მიყვირი, თორემ...

— თორემ, რა?

— ჩამოვხტები, იცოდე!

— ჩამოდი ახლავე! — რაც ძალა და ღონე ჰქონდა დაიდრიალა პეტრემ და სწრაფად დაიწყო ჩამოსვლა ხიდან. ლიდიკომ დაასწრო. ხიდან გადმოფრენილი პაერში ორჯერ გადატრიალდა და კისრით დაასკდა ხორკლიან მიწას. ერთი თვის მოყვანილი ჰყავდა ოჯახში ცქრიალა ლიდიკო.

— ნუ იყვირებ, პეტრე!.. — ეს იყო მისი უკანასკნელი თხოვნა.

## სიუჟარული

მზის პირველმა სხივმა შემოანათა ოთახში და წამსვე ლოგინიდან წამომახტუნა. უჩვეულოდ განაბულიყო ქალაქი. მაგრამ ეს მხოლოდ ერთი გაელვება გახლდათ... აი, ჩაიხრიალა სატვირთო მანქანამ, ტრადიციულად აქოთქოთდნენ ქუთით მეეზოვე დედაკაცები. სწრაფად ჩავიცივი. ფეხაკრეფით გავედი დერეფანში, რომ დედა არ გამეღვიძებინა. კარიც უხმაუროდ გამოვიკეტე.

ერთი გოგონას სიყვარული აღმურივით მქონდა მოდებული. მთელი ღამე ფიქრში გავატარე. ვერ ვიტყვი, რომ უძილობას უსიამოვნება მოენიჭებინოს. არა, პირიქით, სულ უფრო სასიამოვნო საწვალებელი ხდებოდა ყოველი წუთი, ჩემს გონებაში სულ უფრო მტკიცდებოდა გადაწყვეტილება; დილას, ინსტიტუტში წასვლამდე სახლთან დაეხვდები და... გამთენიისას ჩამძინებოდა.

ქუჩაში მივრბოდი. მივრბოდი თავგანწირული იმედით რომ მიმესწრო, არა, უფრო სწორედ დამესწრო საკუთარი მეორე გრძნობისათვის, რომელიც აუცილებლად სადმე მაინც გამაჩერებდა, შემაყოყმანებდა და განმეორდებოდა იგივე ისტორია, — მთელი წლის ისტორია ჩემი გაუშხელებელი სიყვარულისა.

საბედნიეროდ; ძალიან კაშკაშა მაისის მზე იყო ამოგორებული პორიზონტზე და მისი სინათლე ანდამატივით მიზიდავდა. გოგონას სახლი სწორედ მზის მიმართულებით იყო.

... ადგილზე გავეშვი. გული ამოვარდნას ლამობდა, ჩემს წინ მისი სახლი იდგა. მეოთხე სართულზე ფანჯრები ღია იყო. ნიავიც არ იძვროდა. ამ დროს ერთ-ერთ ფანჯარაში ფარდა შეირხა. არ ვიცი რამდენ წამს ვიყავი გაშეშებული.

მისმა ხმამ გამომარკვია.

— დილა მშვიდობის!

სადარბაზოს კარებთან იდგა. თეთრ ქათქათა პირსახოცის ხალათში და ოქროსფერი გაშლილი თმებით ზღაპრულ ფერიას ჰგავდა.

— მაია! — გაუბედავი ნაბიჯი გადავდგი მისკენ.

— ამ დილაუთენია რამ წამოგახტუნა? — ღიმილით მკითხა.

— მე?..

## ჯარისკაცი და კალლი

ჯარისკაცი ბერლინიდან სახლში ბრუნდებოდა.

ზურგჩანთიდან ჩვილივით ამოეყო ყურებდაცქვეტილი თავი ლეკვს და გაკვირებული შეჰყურებდა უცხო ქალაქის ქუჩას. გამვლელნი ალერსიან მზერას გადაჰკრავდნენ ხოლმე.

ჯარისკაცი კი ნაღვლიანი სახით მიაბიჯებდა მშობლიურ ქალაქში. მერე მთავარი ქუჩიდან ვიწრო ასახვევს შეუდგა. ერთსართულიან პატარა სახლთან შეჩერდა. ჯიბიდან გასაღები ამოიღო, მიიხედ-მოიხედა. ახლო-მახლო არაფერ ჩანდა. არც უნდოდა ვინმეს დაენახა და ეცნო. სწრაფად გააღო კარი და ჩაბნელებულ დერეფანში შევიდა. ჩამრთველი გადაატრიალა. სინათლე არ აინთო. ოთახში შევიდა, იქ მეტად ბნელოდა... ჩაკეტილი დარაბები გამოაღო. სინათლე უცებ შემოიჭრა.

ლეკვმა თვალები აახამხამა.

ჯარისკაცმა ზურგჩანთას თავი მოხსნა და ლეკვი ამოიყვანა. იატაკზე დასვა. მიეფერა. ზურგჩანთიდან შავი პური ამოიღო, ყუა მოტეხა და ლეკვს დაუგდო. ერთხანს დაჰყურებდა, როგორ გამალებით ღრღნიდა ლეკვი გაქვავებულ პურს, მერე ნელ-ნელა, მძიმედ გადაიტანა მზერა ბუხართან დაკიდებულ შავჩარჩოიან სურათზე. დედას ვერ უყურა დიდხანს. ჩანაცრებულ ბუხარს დააშტერდა.

თითქოს, უცებ გაახსენდაო, იქვე დაყრილ ნაფოტებს დაავლო ხელი და ბუხარში შეყარა. მერე ძველი, გაყვითლებული გაზეთი დაჭმუჭნა, ასანთს გაჰკრა, გაზეთს მოუკიდა და ისიც ბუხარში შეაგდო. დაბალ სკამზე მიჯდა და თავი ხელებში ჩარგო.

ცეცხლი ატკაცუნდა ბუხარში.

ლექვმა პურის ღრღნას თავი მყისვე დაანება. დიდი შიში ჩაუდგა თვალებში. საბრალოდ აწყმუტუნდა და წამოვარდა ადგილიდან. პანიკური წრიალი დაიწყო ოთახში.

რკინის საწოლის ქვეშ მიაგნო თითქოს ყველაზე უსაფრთხო ადგილს. შეძვრა და თავი თათებში ჩარგო.

გერმანული სუფთა სისხლის ნაგაზის ლექვი მაინც ვერ დამშვიდდა.

გამოვარდა საწოლს ქვემოდან და ჯარისკაცს კალთაში ჩაუხტა.

ჯარისკაცი გამოერკვა.

ლექვს ცრემლიან თვალებში ჩახედა. ამოიოხრა. ცალი ხელით გულში ჩაიკრა ლექვი. სურათთან მივიდა და ფრთხილად გადასწმინდა მტვერი.

„მპატიე, დედა!“ — გაბზარული ხმით წარმოსთქვა. ბუხართან მივიდა და ჩექმით, უხეშად ჩააქრო ცეცხლი.

## უჩინარი

გელას სამსახურში ისევ დააგვიანდა. რას იზამ, აწი ამ საქმეს არაფერი ეშველებო, გაიფიქრა და ნელი ნაბიჯით გაუყვა რუსთაველის გამზირს.

გაზეთების კიოსკოში „ლელო“ იყიდა. სახელდახელოდ გადაათვალიერა. მხოლოდ ფეხბურთის ამბები ჩაიკითხა დაწვრილებით. მერე ზანტი თვალი მიმოავლო იქაურობას. ხალხი შეთხელებულიყო ქუჩაში. უსაქმურები ჯერ არ გამოლალულიყვნენ, მაღაზიების გაღებამდე კიდევ ნახევარი საათი რჩებოდა. მოკლედ, საინტერესოს აქ ვერაფერს იპოვიდა.

— მეგობარო!

გელამ მოიხედა და გაოცებულმა აღმოაჩინა, რომ მის გვერდით

საშუალო სიმაღლის, ჭაღარათმიანი, მიტკალივით სახეთეთრი, შავებში ჩაცმული კაცი იდგა. იგი იღიმებოდა. გელამაც ძალაუნებურად გაუღიმა:

— გისმენთ, ბატონო.

კაცმა საკმაოდ დაიმორცხვა.

— იცით, ისე მიჭირს ამის თქმა...

გელამ, მიგიხვდიო, გაიფიქრა.

— არაა! — გადაჭრით გადაიქნია თავი კაცმა. — როგორ გეკადრებათ... მე სულ სხვანაირი თხოვნა მაქვს თქვენთან, თუკი, რა თქმა უნდა, ეს დაგაინტერესებთ...

გელას უცნობის დაშაქრული ლაპარაკი, რატომღაც აღარ ესიამოვნა.

— იცით, სამსახურში მაგვიანდება. — ჩამომდგარი ტროლეიბუსისკენ გაიწია, მაგრამ რაღაც უხილავმა ძალამ უკან დაქაჩა.

კაცი ისევ მორცხვად უღიმოდა.

— სამსახურში ხომ მაინც დაგვიანებული ხართ?!

— რა გნებავთ?

— თქვენ ისე ადვილად ღიზიანდებით...

— მეჩქარება-მეთქი... — ანერვიულდა უკვე გელა.

— ჰო, კარგით, კარგით... მაშინ პირდაპირ გეტყვით. მე შემძღვია უჩინარი გაგხადოთ, გინდათ?

— რაო?

— ფილმი ხომ გინახავთ „უჩინარი კაცი“, უელსი ხომ წაგიკითხავთ?.. — უცნობი ცდილობდა როგორმე მიეხვედრებინა.

„დარეხვილია“, — გაიფიქრა გელამ.

უცნობი ამ აზრსაც მიუხვდა, ალბათ, მაგრამ არ ცდილა გადაერწმუნებია და სწრაფად გააგრძელა:

— დიახ, დიახ, შემძღვია უჩინარი გაგხადოთ, თუკი მოისურვებთ... ეს ხომ ძალიან მიმზიდველია — იყოთ რამდენიმე ხნით უჩინარი... — დამარცვლა უცნობმა.

— კარგად, ბიძიკო, კარგად! — ხელი აუქნია გელამ და ადგილს, რომელზეც მილურსმულივით იდგა, როგორც იქნა, მოსცილდა.

უცნობს მოწყალებდ გაუღიმა.

ხუთიოდე ნაბიჯი გაიარა და უკან მოიხედა. გაჩერებაზე აღარავინ იდგა.

— მე აქ ვარ! — თქვა უცნობმა.

ელდამ კინლამ წააქცია გელა.

— ეხლაც არ გჯერათ?

გელამ ჭადარს ახედა. ნიავე ნაზად ელამუნებოდა ფოთლებს. ხმადაბლა ლაპარაკით ჩაიარეს; ოფიცრებმა.

უცნობი მოთმინებით უცდილა.

— გადაწყვიტეთ... ასეთი უანსი მეორედ აღარ გექნებათ.

— არ მჯერა მაინც... — ყურები მოისრისა გელამ.

— შემახეთ ხელი!

გელამ მისი მხრისკენ მექანიკურად წაიღო ხელი და... ჰოი, საკვირველებავ, ხელი ჰაერში დაკიდებული შერჩა პანტომიმის მსახიობივით.

— ხელი სწრაფად დააბრუნა საწყის მდგომარეობაში. მიმოიხედა. თავი სიზმარში ეგონა.

— არა, სიზმარში არა ხართ, მე აქ ვარ. — თქვა უცნობმა, თითქოს ციდან ჩამოფრინდაო, მის წინ გაჩნდა, ხელი მაგრად ჩაჰკიდა.

კინოთეატრ „სპარტაკის“ შესასვლელთან ამერიკული ფილმის „დომინოს პრინციპის“ დიდი სარეკლამო პლაკატი გამოექრათ. ქუჩის გამყოფ თეთრ ხაზზე მილიციელი დასეირნობდა გულარხეინად.

— კი მაგრამ... მაინცდამაინც მე რატომ ამომირჩიეთ?

— ამას კი ვერ აგიხსნით. რატომღაც ვიგრძენი, რომ თქვენ ეს შეიძლება დაგპირდეთ... — უცნობმა აზრი აღარ დაასრულა.

— კარგით, ვთქვათ გამაუჩინარეთ, შერე?

— შერე... დავთქვათ შეხვედრის დრო და ადგილი... წამსვე უწინდელ მდგომარეობაში დაგაბრუნებთ საღ-სალამათს.

— კი, მაგრამ...

— ვგრძნობ, რომ ყოყმანობთ, შეიძლება გეშინიათ კიდევ... მე ხომ მხოლოდ თქვენთვის ვაკეთებ ამას, აბა რა მრჯის?

უცნობი გულწრფელი იყო. ძალზედ კეთილი, მშვიდი თვალები ჰქონდა.

გელა რაღაც უჩვეულოს მოლოდინმა შეაჩქვიფა, სასწრაფოდ მოუნდა გაუჩინარება. შეეშინდა კიდევ, ამ კაცმა არ გადაიფიქროსო.

— მაშინ ჩქარა, თუ შეიძლება, ჩქარა!..

— არა, თავიდან უნდა შევთანხმდეთ! — მტკიცედ მოუჭრა უცნობმა. — თქვენ საღამოს შვიდ საათზე აუცილებლად მოხვალთ, აი, ამ მალაზიის ვიტრინასთან. მალაზია უკვე დაკეტილი იქნება. მეც აქ

ვიდგები. მოხვალთ და მეტყვიით:— მე ვარ გელა სანიძე. მე მოვედ-  
დი....

— საიდან იცით ჩემი სახელი და გვარი?

— ნუთუ გიკვირთ, ეს?

— არა, არა! — ისევ აჩქარდა გელა.

— მოხვალთ და მეტყვიით...

— გასაგებია! — გააწყვეტინა გელამ.

— მოხვალთ და მეტყვიით, — დაჟინებით გააგრძელა უცნობ-  
მა. — მე ვარ გელა სანიძე. მე მოვედი!

— კარგი.

— ესე იგი 7 საათზე მოხვალთ. ათ, თხუთმეტ წუთს თუ დააგ-  
ვიანებთ არაფერია, დაგელოდებით. ვიცი, გიყვართ დაგვიანება.

გელა უხერხულად შეიშმუშნა.

— არა უშავს. მე მგონი არ დააგვიანებთ. არა მგონია, ვინმეს  
ხელს აძლევდეს მთელი ცხოვრება უჩინრად დარჩენა. მოკლედ,  
შევთანხმდით?

— შევთანხმდით, ოღონდ ერთი პირობით.

— გისშენთ.

— მაინც, ყოველი შემთხვევისათვის, თუ შეიძლება, ჯერ საც-  
დელად გამაუჩინარეთ...

უცნობმა გაიცინა.

— კარგი.

გელა დაიძაბა.

— თქვენ უჩინარი ხართ.

გელამ ხელებით ტანი მოისინჯა.

— რანაირად, მე ხომ ვგრძნობ ჩემს ტანს...

— მაგრამ ვერ ხედავთ მას...

— ვერა...

— აი, ეს არის თქვენი გაუჩინარების მთავარი პლუსი...

გელა იქვე ვიტრინასთან მივიდა. თავისი სხეულის ანარეკლი  
რომ ვერ შეამჩნია, სიხარულით აცმუყდა. ვიტრინასთან ქალი შე-  
ჩერდა. გამოფენილ ბროლის ჭურჭელს ათვალიერებდა.

— ქალბატონო!

ქალმა მიმოიხედა.

— ქალბატონო!

ქალი შეცბა.

— ღმერთო დიდებულო, — თქვა და სასწრაფოდ მოშორდა იქა-  
ურობას. უკან-უკან იხედებოდა და პირჯვარს იწერდა.

უცნობი გამწყვრალი ჩანდა.

— იცოდეთ, ასეთი რამ მეორედ აღარ გაიმეოროთ! მაძლევთ  
პირობას?

— ეს ისე, უბრალოდ, საცდელად...

— არავითარი ამდაგვარი არ გაიმეოროთ. ნუ აშინებთ ხალხს.  
ისინი თავისთვის დადიან. იმათთან რა ხელი გაქვთ.

— ნახვამდის.

— ნახვამდის.

ხიდების კონსტრუქციების განყოფილების თანამშრომლებს თა-  
ვიანთი უფროსისაგან ხის მოაჯირი ჰყოფდა. მაგიდა, სახაზავი დაფა  
და ორი სავარძელი იყო შემოღობილი. მაგიდასთან პატიმარეით  
იჯდა უფროსი და მთელი დღე გამუდმებით ტელეფონზე ლაპარა-  
კობდა. თუკი თანამშრომლები ახმაურდებოდნენ, თან საქმეო, შეს-  
ძახებდა ხოლმე. ეს იყო და ეს. „საქმის მკეთებლები“ ორიოდ  
წუთს მიყუჩდებოდნენ და...

... და მაინც ჰადრაკს აქ მხოლოდ შესვენების საათებში თამა-  
შობდნენ.

გელა განყოფილების ოთახში ფეხაკრეფით შეიპარა. რვა სახა-  
ზავ დაფასთან ერთი ადგილი — თავისი — თავისუფალი დახვდა.  
დაწყებულ სამუშაოს დახედა. გული ეტკინა, უკვე მეოთხე თვეა,  
რაც ხიდის პროექტზე მუშაობდა. არ აინტერესებდა, თორემ ერთ  
კვირაში მორჩებოდა საქმეს. მაგრამ... თუნდაც დაემთავრებინა... ეს  
რა ხიდი იყო. ხიდი, აი, ის იყო, პირველი, რომელიც უსინდისოდ  
შინისაკუთრეს მისმა განყოფილების გამგემ და საპროექტო ინსტი-  
ტუტის დირექტორმა. მხოლოდ ნახევარი წლის შემდეგ გაიგო, რომ  
დაკიდული ხიდის პროექტი, კოლეგიის მიერ დაწუნებული, „შეა-  
ლამაზა“; „შეაფასადა“... ორმა ცნობილმა პროფესორმა და საკაე-  
შირო ინსტიტუტის პრემიაც „დაიმსახურა“. პირში წყალი ჩაიგუბა  
მაშინ გელამ; ამათ, აბა, როგორ ვებრძოლო, ეს ადგილიც არ დაე-  
კარგოო. მითუმეტეს, პროექტი რომ ნახა?!... ისე ოსტატურად შე-  
ეცვალათ. მისი „გარეგნობა“, რომ პლასტიკური ქირურგიის გან-  
თქმულ კორიფეებსაც კი შეშურდებოდათ... მოკლედ, ბიჭი იყავი  
და რამეში შეედავებოდი.

ორი ძმაკაცი დაკარგა მაშინ გელამ... ზაზა და ვახტანგი. მეგობრებმა მის მაგივრად დაიწყეს „ჩალიჩი“, მაგრამ ჯერი როდესაც გელაზე მიდგა... გელამ ილაჩრა. ყველაფერი წყალში ჩაყარა.

ფიქრებიდან უფროსის ხმამ გამოარკვია.

— თან საქმე! — დაიძახა განყოფილების „მამამ და მარჩენალმა“ და ტელეფონზე ნომერი აკრიფა.

„მამა და მარჩენალი“ განყოფილებაში შეარქვეს. მას მართლაც უნაგაროდ, ყოველთვიურად, თანამშრომლებისათვის ე. წ. „ლევი“, ადვილზე-ადვილი სამხაზველო სამუშაო მოჰქონდა და ფულს აკეთებინებდა. ასე რომ, მადლიერი იყვნენ მისი ხელქვეითნი.

„მამა და მარჩენალი“ ამ წუთას ტელეფონის ყურმილში ვიღაცას გამწარებული უყვიროდა.

გელას ლოდინი მოსწყინდა. წამოდგა, სკამი გასწია, ფანჯარს დასწვდა და... სწრაფად თავის ადგილზე დააბრუნა. ჩაიცინა... მის გვერდით, სახაზავ დაფასთან დახრილმა ქალიშვილმა გაკვირვებულმა გამოიხედა.

ერთ წამს თავში გაელვებული აზრი „ხომ არ გავაგიჟო“, თავიდან ამოიგდო. ნელი ნაბიჯით უფროსისკენ გასწია.

— სანიძე არ გამოჩენილა, სანდრო ბატონო? — ჰკითხა ხმადაბლა მოაჯირს აქედან. უფროსს თავი არ მოუტრიალებია.

— ანიკო, დამავიწყდა რას გეუბნებოდი?

გელამ ხმას აუწია.

— სანიძე არ გამოჩენილა, დღეს, სანდრო ბატონო? ისევ დაავიანა?

უფროსმა მოიხედა. ვერავენ რომ ვერ დაინახა, გაოცდა. ყურმილი დაავდო და წამოდგა.

თანამშრომლებმა კამათს თავი ანებეს და სახაზავ დაფებს მიუბრუნდნენ.

— გოგი, სანიძე არ გამოჩენილა?

პირველ დაფასთან ნაადრევად გაჭალარავებულმა კაცმა თავი ასწია.

— არა, ბატონო სანდრო...

— ძალიან აიშვა, აი... — ჩაილაპარაკა თავისთვის. — მე ღირეჟტორი მეძახის... — თქვა ოდნავ გასაგონად და მოაჯირის ქარი გამოალო.

უფროსი ჩაფიქრებული მიაბიჯებდა დერეფნის ბოლოსაკენ.



— „შენ დიდი გაიძვერა ხარ!“ — ჩასჩურჩულა უცებ ყურში გელამ. უფროსი გაოცებისაგან შეხტა.

— „გახსოვს, სანიძეს როგორ მოჰპარათ ხიდის პროექტი, გახსოვს?... — გველივით უწიოდა გელა დერეფანში უკვე ძუნძულით მიმავალ უფროსს, რომელსაც ყურები თითებით დაეცო. — პასუხი უნდა აგოთ, პა-სუ-ხი!

უფროსი დირექტორის კაბინეტში შურდულივით შევარდა. გელაც შეყვა. დირექტორი კეცს იღეჭებოდა და ლაქუციტ შესციცინებდა თვალეზში პიკანტური გარეგნობის ქალიშვილს. სანდროს დანახვაზე გულმოსული ფეხზე წამოიჭრა.

— სანდრო, ასე უცერემონიოდ რატომ მივარდები კაბინეტში? სანდრო აქოშინებული მიიჭრა დირექტორთან და ყურში რაღაცა ჩასჩურჩულა. გელა მოთმინებით უცდიდა ორი პროფესორის ჩურჩულის დამთავრებას.

— შენ გიყი ხომ არა ხარ? — გადაიხარხარა დირექტორმა. — ბლომად დაგილევია გუშინ...

სანდროს დირექტორის სიტყვებმა თითქოს ცივი წყალი გადაასხა.

„მომეჩვენა, აბა რა?! სულელი ვარ?!“ — დაიმშვიდა თავი.

დირექტორი ქალიშვილს მიუბრუნდა.

— შენი ჭირიმე, მადონა, ერთ წუთს გარეთ დამიცადე...

ქალიშვილმა მხრები აიჩეჩა, პრანჭვით წამოდგა და კარები გაიხურა.

დირექტორმა მკაცრი სახე მიიღო.

— იცი, რას გეტყვი? შენ აქ ძალად პანიკას ნუ ქმნი, თორემ...

„ახლა კი დროა, ჩავერიო“. — გაიფიქრა გელამ.

— სანდრო სწორია!

— რა? — ამოიხავლა საქციელწამხდარმა დირექტორმა.

— აი, ბატონო... — დირექტორის ზურგს ამოეფარა სანდრო.

— სანდრო სწორია! თქვენ ორივემ უსინდისოდ მოპარათ გელა სანიძეს პროექტი, თქვენს სახელს კიდევ მეტი დიდება, პრემიაც შემატეთ, ახლა კი პასუხი უნდა აგოთ! — გელა ცდილობდა რაც შეიძლება მეტი მრისხანება ჩაექსოვა ხმაში.

— ვინ არის აქ? — გაფითრდა დირექტორი.

— ვინც ადრე უნდა ყოფილიყო, ვისაც ადრე უნდა აღმოეფხვრა თქვენი ბოროტება!

დირექტორმა მდივნის გამოსაძახებელი ზარისკენ წაიღო ხელი.

— ხელი უშვი! — დასკვივლა გელამ.

დირექტორს ხელი მოკვეთილივით ჩამოუვარდა.

— განგებაა!.. — თქვა სანდრომ.

— მოკლედ, დაუბრუნებთ სანიძეს თავის პროექტს, თქვენ თავს თვითონვე ამხელთ, გასაგებია!

— ეს შეუძლებელია! — დირექტორი სავარძელში მოწყვეტით ჩაეშვა და თავი სასოწარკვეთით ჩაჰკიდა.

— რა არის შეუძლებელი! — სკექდა გელა.

— ყველაფერი ეს... რაც ხდება და რასაც თქვენ გვთხოვთ...

— შეუძლებელი არაფერია ქვეყანაზე!

დირექტორმა უცებ თავი მაღლა ასწია, თითქოს რაღაცას მიხვდაო... წამოიჭრა.

— სანდრო, სანდრო. ეს ალბათ მაგნიტოფონია, ჩქარა, მოვძებნოთ...

— რისი მაგნიტოფონი, თქვენი!.. — დასკვივლა გელამ და რაც ძალი და ღონე ჰქონდა მუშტი პირდაპირ ცხვირში გლიჯა დირექტორს.

დირექტორს სისხლი წასკდა.

გელამ ახლა სანდროს უთავაზა კეფაში.

— ესეც მაგნიტოფონია?..

სანდრო მაგიდის ქვეშ შეძვრა და ნაცემი ძალღვივით აწკმუტუნდა. დირექტორი ცხვირსახოცით სისხლს იწმენდდა. ხელი ციებინივით უკანკალვდა.

— კი, ბატონო, კი... — უცებ ნაწყვეტ-ნაწყვეტ წარმოსთქვა მან. — დღესვე განვაცხადებთ, რომ პრემია დაუმსახურებლად მივიღეთ... რომ, იგი სანიძეს ეკუთვნის... რომ...

— მხოლოდ ერთი დღის ვადას გაძლევთ... ხვალ სანიძე სამსახურში რომ მოვა, ყველაფერს დამსახურებისამებრ მიუზღავთ. თორემ მე ვიცი, თქვენი...

— მაინც ვინ ბრძანდებით, ბატონო... დაგვენახეთ!.. — სთხოვა დირექტორმა.

გელა ერთ წამს შეყოყმანდა.

— მე თქვენი გაღვიძებული სინდისი ვარ! სირცხვილით ვიწვი, ვერ გამოვიჩნდები. — მერე კმაყოფილმა, რომ ასეთი განმარტება გამონახა, სწრაფად დატოვა დირექტორის კაბინეტი.

სახტად დარჩენილი დირექტორი ამ სცენის კიდევ ერთ მოწმეს ღია ფანჯარაში შემომპიროდა, უტყვ ალვის ხეს მიშტერებოდა.

მაგიდის ქვეშ კი „მამა და მარჩენალი“, განყოფილების უფროსი სანდრო წკმუტუნებდა ნაცემი ძაღლივით.

სამსახურის კარებში გამოსვლისას კიდევ ერთ კაცს მიაგო თავისი. ეს მეტაბელე გახლდათ, რომელიც ზშირად უშლიდა ნერვებს.

— ვინ არ მოსულა დღეს სამსახურში? — ჰკითხა ღვარძლიანად.

— ვინ და?! — მეტაბელემ ვერავენ ვერ დაინახა, მაგრამ მაინც უპასუხა:

— გელა სანიძე!

აი, მაშინ წამოართყა გელამ თავში. ქუჩაში გამოსულმა კი მწარედ გაიფიქრა, სამსახურში მხოლოდ მეტაბელეს ვახსოვარო.

„ვის ვეხსომები ყველაზე უფრო?“

ახალგაზრდა, ლამაზმა ქალმა გაღეღილი ხალათის დილები შეიკრა, ქერა თმა გაისწორა, თავი კიდევ ერთხელ შეათვალიერა სარკეში და კარი გამოაღო.

არავინ ჩანდა.

გაოცებულმა ერთხანს ყური მიუგდო სადარბაზოში გამეფებულ სიჩუმეს. მერე დერეფანში გამოვიდა და კიბეს ჩახედა. არავინ ჩანდა. ყრუდ ისმოდა მხოლოდ ქუჩის გუგუნი. მომეყურაო, გაიფიქრა და შინ შებრუნდა.

ხალათზე დილები ისევ შეიხსნა. ლიფი არ ეცვა და მკვრივი, ქათქათა ძუძუები ბურთებივით გამოუხტა ხალათიდან. უდარდელი მოძრაობით და ლილინით ისევ სარკესთან მივიდა. ერთხანს გამომწვევად უცქერდა საკუთარ გამოსახულებას.

გელამ ზვირთივით მოწოლილი ვნებისაგან თავი ველარ შეიკავა და ქალს უბეში ხელი ჩაუყუ. ძუძუებზე მიეაღერსა.

ქალი ნეტარებისაგან აკრუტუნდა. ერთხანს გაირინდნენ ორივენი, მერე ქალს ეუცხოვა. სარკეს განზე გაუხტა. გამოუხიზლდა. აქეთ-იქით დამფრთხალი თვალებით მიმოიხედა და, საეჭვო რომ ვერაფერი შენიშნა, დამშვიდდა.

— რა მემართება ამ ბოლო ხანს? — გაიფიქრა და ტანი აიწურა ფეხის წვერებზე.

— ოჰჰ!.. ამოიკენესა. საწოლ ოთახში გაგოგმანდა. აულაგებელ,

თეთრი ხის ფართო საწოლზე ნებიერად შეცურდა. ხალათი იქვე იატაკზე დააგდო. გადაშლილ წიგნს მისწვდა და შეწყვეტილი კითხვა განაგრძო.

„კონსულა“ — ამოიკითხა გელამ წიგნის ყდაზე რუსული წარწერა. ცდილობდა, თვალი აერიდებინა ლამაზი, თითქმის შიშველი ქალისათვის, გულს ბაგა-ბუგი ნელ-ნელა უცხრებოდა. ანგარიშმიუცემლად იქვე ქალის ფეხებთან ჩამოჯდა. საწოლის კიდე ჩაიწია...

ანიკო ჭერ კიდეც სკოლიდან უყვარდა. ინსტიტუტი რომ დაამთავრა, ხელიც სთხოვა. ქალიშვილი თითქოს ეთამაშებოდა, არც ჰოს ამბობდა, არც არას. პაემანზე რამდენჯერ შეხვედრიან ერთმანეთს, უკოცნია კიდეც. მაგრამ რა... უღალატა ქალიშვილმა. მინისტრის შვილი, ფუფუნებაში ცხოვრება და ყველაფერი მზამზარეული ამჟობინა, მისი მშობლების აზრით ჭერ კიდეც გზაზე დაუმდგარი ვაჟის სიყვარულს. თუმცა... ზაზამ და ვახტანგმა ერთხელ მაინც დაიყოლიეს... მშობლებს ყურს ნუ უგდებო... წაიყვანე, ხომ მოგდევსო... ანიკო მაშინ მართლაც თანახმა იყო... მშობლები მერე მაინც შეგვირიგდებიანო... გელამ იფიქრა, აწონ-დაწონა და იუარა... მე, მართლაც ჭერ გზაზე არა ვდგავარო.

ჰოდა, ზუსტად ორ დღეში მოაწერა ანიკომ ხელი მინისტრის შეილთან. კმ!..

ვისი ბრალია და შენიო, შეუტიეს დეპრესიაში ჩავარდნილ გელას ძმაკაცებმა. მაგრამ მერე შეეცოდათ და ასე თუ ისე დაეხმარნენ მდგომარეობიდან გამოსვლაში. გვერდიდან არ მოშორებიან, ზღვაზე ერთად დაისვენეს, სამსახურის შოვნაში დაეხმარნენ...

ქალმა წიგნის კითხვას თავი ანება და ოცნებით სავსე თვალები ჰერს მიაპყრო. ჰერზე მდინარის ტალღებივით ლივლივებდნენ ბროლის ჭაღიდან არეკლილი ათინათები.

— რა გინდა? — ჰკითხა გელამ.

ქალმა თვალები მილულა.

— რა გინდა? — გაუმეორა კითხვა და ხმაში იღუმალემა ჩააქსოვა.

— რა მინდა? მე თვითონ არ ვიცი რა მინდა...

— არც არასოდეს გცოდნია რა გინდოდა?

— ალბათ...

— ინსტიტუტი ხომ დაამთავრე?

— კი, აუცილებელი იყო.

— ხომ გათხოვდი, ისე როგორც შენს მშობლებს უნდოდათ?

— რატომ მარტო მშობლებს, მეც მინდოდა...

— ყოველთვის?

— არა, ყოველთვის არა... მე ხომ სხვა მიყვარდა...

— ქმარს რა, სიყვარულით არ გაყოლიხარ?

— არა, მაგრამ ახლა მიყვარს...

— სტყუი!

— რატომ ვსტყუი... კარგ თანამდებობაზეა, ჩემდენი სამკაული თბილისში ორს არა აქვს, ბინაც შესანიშნავია, რაც მომესურვება ყველაფერი მაქვს. რატომ არ უნდა მიყვარდეს?

— გელა აღარ გახსოვს?

— იშვიათად მახსენდება. მივხვდი, რომ მხოლოდ ერთი სიყვარულით ვერ გაძლება ადამიანი.

— რატომ?

— სიყვარული გადაგივლის აუცილებლად, დრო გავა და მოგწყინდება... მითუმეტეს თუ მატერიალური მხარდაჭერა არ ექნა...

— ნუთუ ასე უფრო ბედნიერი ხარ? შენ ხომ ქმარი ნამდვილი სიყვარულით არ გიყვარს. ეს ხომ ლალატია საკუთარი თავისაც და ქმრისაც.

— რატომღა ლალატი? რა უცნაური და უხეში სიტყვაა „ლალატი“. მე არასოდეს ვულალატებ ქმარს...

— შენ ძალიან გამოიცვალე, ანიკო. მამაკაცებს ეპრანჭები წვეულებებზე, იმათ ყურადღებას იქცევ...

— შერე რა?.. ისინიც იქცევენ ჩემს ყურადღებას. მე ძალიან ახალგაზრდა ვარ იმისათვის, რომ ჩემი ლამაზი ქალობა დაევიწყო. ქალი მაშინ არის ნამდვილი ქალი, როცა ყველას მოსწონს, გამომწვევია, ყველა ოცნებობს — ნეტა ჩემი იყოსო... მეც ვეპრანჭები...

— შერე, ეს რა, ლალატი არ არის? განა ეხლავე არ ულალატე ქმარს, როცა მამაკაცის ხელი იგრძენი ძუძუებზე და კინაღამ დადნი? ასეთი რამ ხომ შეიძლება ცხადშიც მოგივიდეს?

— ყველა ქალი ასეთია... მთლად პატიოსანი ქალი არ არსებობს...

— შენ ასეთი არ იყავი.

— როდის?

— ყმაწვილქალობაში.

ქალს ეწყინა.

— მე ჯერ ოცდახუთისა ვარ მხოლოდ.  
— გაიხსენე, როგორი იყავი ამ სამიოდე წლის წინ?  
— არც მინდა გავიხსენო.  
— რატომ?  
— რა გასახსენებელია... ტუტრუცანა გოგო ვიყავი. მშობლებს არ ვუჯერებდი.

— მაშინ შენ გელას უყვარდი.

— თუნდაც...

— რომ გაყოლოდი გელას?

— კინალამ მიექარე, ბავშვი ვიყავი.

გელამ მკერდში მწარე ჩხვლეტა იგრძნო.

წამოდგა.

საწოლი აქრიალდა.

ქალი შეეფოთდა. ახლა კი იკადრა ჭერისათვის თვალის მოცი-  
ლება და საბანი კისრამდე აიწია.

— აქ ვინ არის? — იკითხა ათრთოლებული ხმით.

გელამ ხმა არ გასცა.

ერთხანს ზიზლით დასცქეროდა...

... ჩქარი ნაბიჯით გავიდა წინკარში. ახალგაზრდა, ლამაზი, ქე-  
რათმიანი ქალი კარის ჯახუნმა შეაკრთო. თვალეები გაახილა. კარგა  
ხანს ვერ შეძლო თავს დაუფლებოდა...

... — ალო!

— მე ვარ!

— როდის მოხვალ?

— შესვენებაზე გამოდი, რა, უკვე დროა!

— ძალიან გთხოვ, სასწრაფოდ წამოდი, რაღაც კარგად არა  
ვარ...

— გელოდები!

... გელას ბინა ახლოს იყო. აველ, ცოტას დავისვენებო, გადაწყ-  
ვიტა. თუმცა რა, ბოლო დროს ყოველდღე ასე არ აკეთებდა?! შეს-

ვენებაზე სამსახურიდან სახლში მოდიოდა და იძინებდა. რეფლექსი-  
გამოუშვებდა. ზუსტად 3 საათზე იღვიძებდა. ისევ მიდიოდა სამ-  
სახურში და გამოძინებული სამუშაო საათებს უკვე უმტკივნეულოდ  
და ყოველგვარი განცდის გარეშე ჩაათავებდა.

უჩინარი სხელი ქალღმერთით მსუბუქი ეჩვენებოდა, შიმშილს  
ვერ გრძნობდა, მაგრამ... ჰო, დაღლაზე რას იტყვის? სული ეტყო-  
ბოდა იგივე დარჩენოდა და სწორედ აი, ეს — სული გადაეღალა,  
გადაეტვირთა, დაუმძიმდა...

ხედავდა, ესმოდა, დადიოდა, ხელით ეხებოდა...

არც თვალი, არც ყური; არც ფეხი, არც ხელი არ დაღლია...

აი, სული კი...

ამ აღმოჩენის დროს, გელა უკვე თავისი სახლის კიბეზე ადიოდა.  
კარი დამ გაუღო.

უკვე ნაცადი ხერხით შეიპარა სახლში. დამ, მომეყურაო, გა-  
დაწყვიტა. თავის ოთახში შევიდა და ღივიანზე წამოგორდა. მერე  
ჩათვლიდა. რომ გამოეღვიძა, კარადის თავზე მოტიკტიკე საათს შე-  
ხედა სამს ათი წუთი აკლდა. ოთახის ღია კარიდან სიძის ხმა შე-  
მოესმა.

— როგორ მოხდა, ნუთუ დღეს არ მობრძანებულა დასაძინებ-  
ლად ის უსაქმური?

და სამზარეულოში საქმიანობდა.

— რა გინდა, რას გიშლის ხელს? არ მოვიდა, რა მერე... ისევ  
იწყებ?

— მე რაც ამ სახლში ვარ, მგონი პირველი შემთხვევაა.

— შეიძლება სამსახურში დააკავეს. ან ვინმე ამხანაგმა დაპატი-  
ყა სადმე.

— ღვინოს მაგი არა სვამს, — გაღიზიანებული პასუხობდა სი-  
ძე, — სამსახურში საქმეს ვერ მოაბა თავი... კაცო, სიგარეტსაც არ  
ეწევა! — ბოლო ფრაზა ისე დიდმნიშვნელოვნად გამოაცხადა, თით-  
ქოს უბედურება სწორედ ამ სიგარეტის არმწველობაში იყო.

— დაანებე თავი, ჩემი ძმა ბოლოსდაბოლოს! — საწყლად თქვა  
დამ.

— ბოლოს-და-ბოლოს, — გამოაჯავრა სიძემ, — როდის მოეღე-  
ბა ბოლოსდაბოლოს ბოლო მაგის კოტრიალს?.. ანდა, ნუთუ იმას  
ვერ ხვდებ, რომ ზედმეტია ამ სახლში? მაგის გულისთვის ბავშვე-  
ბი „ზალაში“ წვანან, თავიანთი კუთხეც კი არა აქვთ.

— ჩემი ძმისაა მთელი ეს ბინა და ერთი ოთახიც აღარ ეკუთვნის?

— კი ბატონო, წაიღოს მერე ეს ერთი ოთახი!..

— რა დაგიშავა მაინც ამ ბიჭმა? — აღელდა და, — არის თავისთვის, არავის აწუხებს, მაგის აქ ყოფნას ვერცა ვგრძნობთ.

— როგორ თუ ვერცა ვგრძნობ. ჩვენს საჭმელს ჭამს თუ არა?

— დაამადლე ლუკმა...

— შუადამემდე ტელევიზორს უყურებს, არ გვაძინებს...

— რაც შეუძლია ხმას უკლებს...

— ერთი „ტრუსიკი“ რაა, ისიც არ უყიდია ბავშვისათვის. არა, საინტერესოა, სად მიაქვს თავისი ხელფასი, პური რაა... ისიც არ შემოუტანია სახლში...

— სად და... — დამ მორიდებულად ჩაურთო, — ლატარიის და სპორტლოტოს ბილეთებს ყიდულობს, ობლიგაციები აქვს. მითხრა, იქნებ „ვოლგა“ ან დიდი ფული მოვიგო... ნახევარს შენ მოგცემ მოგებულსო.

სიძე წუთით გაჩუმდა, მაგრამ ისევ იფეთქა:

— ვის რათ უნდა მაგის ფული!

— ბინა ხომ გინდა, მაგისი?!

— გასივდა კაცი ამდენი უსაქმურობით... დედამისის საფლავი დაავიწყდა სად არის. ისე ტყუილად მაინც მივიღოდი, დავხედავდი. შე უნდა ვუვლიდე დედამისის საფლავს?

დამ ხმა გაკმინდა.

გელას თავში თითქოს ურო ჩაარტყესო. დარეტიანებულივით, მძიმედ წამოიწია. სამზარეულოში გავიდა. და გაზქურასთან უხმოდ იცრემლებოდა. სიძე ფანჯარასთან იდგა და სიგარეტს აბოლებდა. და შეეცოდა.

უხმაუროდ გამოიხურა კარი.

სასაფლაოს მდუმარებას ქვისმტეხელების ხმამალალი ყაყანი არღვევდა. იქვე, ვილაცის საფლავთან, რკინის მაგიდაზე ღვინის ბოთლები აქეთ-იქით ეყარა. გვარიანად შემთვრალიყვნენ.

გელა დედის საფლავზე გადაემხო.

ლაპა-ლუპით მოსდიოდა ცრემლები. ტირილით გული ვერა და ვერ იჭერა. ყურში ყრუ, დახშული გუგუნი ჩაუდგა.

„ხომ არ ვგოჯდები, რა ხდება?“ — ტირილს გაუძალიანდა გელა.



მერე ერთმა აზრმა შეაერთო: „ახლა, როცა თვალები დახუჭული  
მაქვს, სრულიად აღარ ვარსებობ.

მე ხომ უჩინარი ვარ...

მაგრამ, როგორ არ ვარსებობ, ხომ ვფრქობ, ხომ ვგრძნობ...

ბოლოს და ბოლოს თვალსაც გაეახელ და ხომ ვხედავ...

შენი არც ხედვა ჩანს, არც ფიქრი, არც გრძნობა...

ეგეც მართალია.

მაშ როდის ვარსებობ?

როცა შენ გხედავენ, როცა შენ გგრძნობენ, შენს ფიქრს ანხორ-  
ციელებ...“ — დაატანა თავს ძალა. გულადმა ამოტრიალდა და თვა-  
ლები ფართოდ გაახილა.

წამოდგა. ესამოვნა ოდნავ შეყვითლებული სასაფლაოს ბუნება.  
დედის საფლავს რკინის მოაჯირი ჰქონდა გარს შემორტყმული. იქვე  
მიგდებული ცოცხი აიღო. გულმოდგინედ გადაგავა საფლავი. ჩვარი  
დაასველა და მოაჯირი გადაწმინდა.

„დღეიდან, ყოველთვის ვივლი, დედა!“ — თქვა გულში.

ყავისფრად მოკირწყლულ ბილიკს დაადგა, რომელიც მდიდრულ,  
მარმარილოს საფლავებს შორის იკლაკნებოდა.

ქუჩაში გამოსულს, საათი გაახსენდა.

გამვლელს ჰკითხა. გამვლელმა თითქოს ქვას ფეხი წამოკრაო,  
წაიბორძიკა.

ხალხი ბევრი ჩანდა ქუჩაში. ალბათ სამუშაო საათები დას-  
რულდა.

„ვაიმე, მაგვიანდება!“

გელა ავტობუსის გაჩერებისკენ გაიქცა.

ავტობუსში ხალხის ნაკლებობა არ იგრძნობოდა. ერთი მამაკაცი  
სახელურს ჩასკიდებოდა და პიჯაკის სახელო მაჯას ველარ უფარავ-  
და. გელამ მის საათს დახედა. ექვსს რაღაც წუთები აკლდა. აქედან,  
დაახლოებით ნახევარ საათს მოუწინებოდა დათქმულ ადგილზე მის-  
ვლას. დამშვიდდა. საბილეთო სალაროსთან მოიკალათა და იმდღე-  
ვანდელი თავგადასავლების ქრონოლოგიურად ჩამოყალიბება და-  
იწყა.

„დღეიდან ყველაფერი შეიცვლება. აი, ვნახოთ. მე უჩინრად რაც  
შევძელი, იმას გამოჩინებულიც შევძლებ — უფრო მეტსაც! კაცი არა

ვიყო, ყველაფერს ისე თუ არ მოუუარო, როგორც საჭიროა. არა, მაინც რა მხდალი და ლაჩარი, რა უგულო ვყოფილვარ...”

გელას თავში ციბრუტივით ტრიალებდნენ ფიქრები. იგი საოცარ ალტყინებას, აღმაფრენას გრძნობდა. მთელი მისი არსება ენერგიით გაქლენთილიყო და ეს ენერგია შესატყვის გამოყენებას თხოვლობდა.

„ცოტაც და... მე ისევ კაცად ვიქცევი. მერე ვნახოთ...”

გელამ ნაცნობი შენიშნა ავტობუსში. „ბაჩი... ჭიბგირი ბაჩი...” ხავერდის ქურთუქში და ჭინსის შარვალში გამოწყობილი, შუბლამდე კეპჩამოფხატული ბაჩი „საქმეს“ შესდგომოდა. ვილაცა მანდილოსნის ხელჩანთა უკვე გაეხსნა. „ჰოოპ!..“ — აღნიშნა თავისთვის გელამ და მანდილოსნის საფულე თვალისდახამხამებაში ბაჩის ჭიბეში აღმოჩნდა. ბაჩიმ სწრაფადვე დაუკეტა ხელჩანთა მანდილოსანს და ირგვლივ მყოფ ხალხს თვალი მიმოავლო. არა, გელას გარდა ვერავინ იცნო ბაჩი. ადამიანებს არაფრისმთქმელი, მეოცნებე ან შეწუხებული შხერა ჰქონდათ. ბაჩიმ, ეტყობა შვებით ამოისუნთქა, რადგან სახეზე ოდნავ დამცინავი ღიმი მოეფინა და წინა ჩასასვლელი კარისაკენ გაიწია. მანდილოსანიც მიყვა. ბაჩი წამით შეცბა, მაგრამ როცა ქალის მოქმედებაში ვერაფერი საეჭვო დაინახა, მშვიდად განაგრძო გზა ჩასასვლელისაკენ.

„ოპ, ბაჩი, ბაჩი... შენ არ იყავი სკოლაში ისტორიისა და ქართული ლიტერატურის ცოდნაში რომ ვერავინ გჯობდა, შენზე არ იყო, რომ ლაპარაკობდნენ, მსოფლიო კლასის ფეხბურთელი დადგებო?! „დინამოს“ დუბლშიც კი გითამაშია... აყვეი უბნელ ხულიგნებს, მორფინისტებს... და ციხის კარიც გაიღო შენთვის. მერამდენედაა ახლა, ამ „საქმიანობაზე“ რომ შეგესწარი? ბეწვის ხიდზე რომ დადიხარ, განა თვითონ არ იცი? ნუთუ ასე შეისისხლხორციე ქურდობა... ისევ გენატრება ციხე... კოლონია?.. არა, ძმაო! უნდა შეეშვა ქურდობას. ეგ შენი საქმე არ არის...”

ბაჩი და მანდილოსანი წინა კარიდან ჩავიდნენ, გელა უკანიდან.

— ბაჩი, ეხლავე დაუბრუნე ფული იმ ქალს! — უჩიურჩულა გელამ.

ბაჩი დაფრთხა. გაქცევა მოინდომა. გელამ მკლავში მაგრად ჩასჭიდა ხელი. არ უშვებდა. ბაჩი გიჟივით იხედებოდა აქეთ-იქით, ეს რა ამბავია ჩემს თავსო.

— ბაჩი, ჯერ კიდევ გვიან არ არის. დაუბრუნე თავისი ფული იმ ქალს! — ბაჩიმ ირწმუნა, მამაზეციერი მარიგებს ჭკუასო.

— ღმერთო!.. — თქვა სასოწარკვეთილმა.

— დაუბრუნე! — გელამ ხელი გაუშვა.

ბაჩი მანდილოსანს გასტრონომთან დაეწია.

— ქალბატონო, ავტობუსში საფულე დაგივარდათ! — თავაზიანად მიმართა ქალს. დაბნეულმა ქალმა ჯერ გამოწვდილ საფულეს დახედა, მერე ხელჩანთა გახსნა, შიგ ჩაიხედა და კინალამ ჩაიკეცა.

ბაჩიმ ხელი შეაშველა.

— დიდი მადლობა, დედიკო... — ქალმა ფული გადათვალა. — რამ დამაბნია ასე? მთელი თვის ბიულეტენის ფულს ვკარგავდი. შენ გაიხარე შეილო, შენმა მშობლებმა იცოცხლონ დიდხანს. შენ გაიხარე... ამ ფულით უნდა მეცხოვრა მთელი ეს თვე... — ლულულღებდა ქალი.

— კარგად ბრძანდებოდეთ! — არანაკლებ დაბნეული ჩანდა ბაჩი.

— შენ გაიხარე, შენ იცოცხლე, ღმერთო, დალოცე! — მისდევდა ბაჩის ქალის ლოცვა.

ქურდმა პატარა მანძილი გაიარა და იქვე სადარბაზოში შეუხვია. კედელს თავი მიაყრდნო და გულამოსკვნით აზლუქუნდა.

— ტირილი ვაუკაცს არ შეშვენის, ბაჩი. თუმცა რადგანაც ტირი, ყველაფერი არ დაგიკარგავს! — დაუყვავა გელამ.

ქურდი გაშეშდა.

— ჰო, ჯერ ყველაფერი არ დაგიკარგავს. შენ კეთილი გული გაქვს, ნიჭიერი ბიჭი ხარ. ადრე ყველას უყვარდი...

ბაჩი მკვეთრად შემოტრიალდა.

— ახლა? ახლა რომ აღარავის ეუნდივარ, ნაციხარი და ნაუბედურალი. მე ხომ ქურდი ვარ. ორი „სროკი“ მაქვს მოხდილი.

— ყველაფერს ეშველება. ხომ ხედავ ერთხელ დამიჯერე და...

— ჩემს ცხოვრებაში კარგა ხანია ასეთი რამ არ ჩამიდენია...

— „ჩამიდენია!“ შენ ყოველთვის დანაშაული ნუ გაკერია ენაზე. კი არ ჩაიდინე, კეთილი საქმე მოიმოქმედე. ხომ ხედავ რა შედეგიც მოყვა. იმ ქალის დალოცვა ყველაფერს ჯობია ამ ქვეყნად.

— კაცად მაინც არასოდეს ჩამთვლიან. ყოველთვის ლაქად დამარჩება ქურდის სახელი.

— „კაცად მაშინ ხარ საქები, თუ ეს წესი წესად დარგე: ყოველ დღესა შენს თავს ჰკითხო, აბა, დღეს მე ვის რა ვარგე!“ — გელას

თვითონაც უკვირდა. ასეთი მაღალფარდოვანი და დიდაქტიკოსი არასოდეს ყოფილა. მაგრამ გრძნობდა, რომ ბაჩის ის ღმერთი ეგონა და ღმერთს კი მხოლოდ ასე უნდა ელაპარაკა მისი წარმოდგენით.

— ილია... — თქვა ჩაფიქრებით ბაჩიმ.

— დღეები ბევრი გაქვს წინ, ბაჩი. მიიდი, მისი: დიე ამ დღეებს! ლაქაზე ნუ ფიქრობ. დრო ყველაფრის მკურნალია... დრო გავა და ყველას თვალში ამოიშლება შენი ლაქა. შევთანხმდით?

— შევთანხმდით! — თქვა მტკიცედ ბაჩიმ.

გელამ თავისი კეთილი მისია დამთავრებულად ჩათვალა.

ოცი წუთით ადრე მივიდა დათქმულ ადგილას.

ის კაცი ჯერ არ იყო მოსული.

გელას დრო კიდევ ჰქონდა. ვიტრინის გვერდით კედელს მიეყრდნო. მას უკვე თავში ათასი განსახორციელებელი აზრი უტრიალებდა. უჩინარ კაცს თუ ამდენი შესძლება, სახიერი ხოშ უფრო მეტის გამკეთებელია და ამის დამამტკიცებელ მრავალ არგუმენტს იშველიებდა.

თავის თავს დასცინოდა, რა დედალი ვყოფილვარ ადრეო. გამოჩენის საამო წინათგრძნობა ღვინოსავით უღიტინებდა სულში. ბედნიერი შესცქეროდა ხალხს. ერთ დედაბერს სანოვაგით გატენილი ჩანთის ავტობუსში ატანაშიც მიეხმარა. დედაბერმა სულ სხვა კაცს უთხრა მაღლობა. იმ კაცმა უხერხულად — არაფერსო, — მიუგო და იქვე ავტობუსში იმ დედაბრისათვის ახალგაზრდა პორტფელიან წვეროსანს ადგილი დაათმობინა.

შვიდი საათი შესრულდა.

ის კაცი არ გამოჩნდა.

გელა ანერვიულდა. ვიტრინის წინ ბოლთის ცემა დაიწყო. მაღალი ქუჩის საათს გაპყურებდა.

ასე გაიარა ნახევარმა საათმა. ცახცახი დააწყებინა.

კიდევ რამდენიმე წუთიც და გელა გაიღურსა ვიტრინასთან. „დღეიდან ყველაფერი შეიცვლება, ოღონდ მოდი ჯადოქარო, ოღონდ მოდი! ყველაფერი შეიცვლება!.. მე... მე... მე... ვიქნები — მეეე!!!“

გელა განწირული ხმით აღრიალდა, ადგილზე ბტოდა, ვიღაცას მუშტებს უღერებდა, თმებს იგლეჯდა...

სინათლე აინთო.

ნათელა გაკვირვებული შესცქეროდა თვალდაქეცილ, სულ მთლად ოფლში გაწურულ ძმას.

— რა იყო, რა მოგივიდა?

გელა ასე ადრე არასოდეს არ მისულა სამსახურში.

მეტაბელემ გაკვირვებისაგან პირი დააღო.

ახლა თავის სახაზავ დაფასთან იდგა და წუხანდელ თავგადასავალზე ფიქრობდა.

მერე ჯიბიდან „სპორტლოტოს“ ბილეთების მთელი დასტა ამოიღო. შუაზე გადახია და სანაგვე ყუთში ჩაყარა. შავი, სქელი ფლომასტერი აიღო. ერთხანს დაჰყურებდა დაწყებულ ნახაზს.

მერე მთელ სიგრძე-სიგანეზე გადახაზა პროექტი.

უფროსის მაგიდასთან სავარძელში ღრმად ჩაჯდა და მოთმინებით დაელოდა ბატონი სანდროს გამოჩენას.

გელას ხმამაღლა გაეცინა პირველი თანამშრომლის გაკვირვებულის სახის დანახვაზე.

## მზე... და ზამთრის იეზი

თბილისი რის თბილისია, თუ რაიმე სასიამოვნო სიურპრიზით არ გააცილა ძველი წელი.

დალოცველს! — ბუნებაც რომ მხარს უჭერს?!

დეკემბრის შუა რიცხვებში ისეთი კვირა დილა გათენდა, ისეთი მზე გადაგორდა ცის კამკამა კაბადონზე, რომ მაისსაც კი შეშურდებოდა.

აღელდა, ახმაურდა, ამჩატდა დედაქალაქი.

შნოიანად გაუსწორა თვალი ბუნებას.

მხოლოდ გატიტვლებული ხეები იდგნენ მხრებჩამოყრილნი და დარცხვენილნი...

ჩემი ბიჭუნა დილიდანვე ცქმუტავდა, ვერ ისვენებდა.

— წამიყვანე, რა, მამა, გამასეირნე რა! — მეხვეწებოდა ყელგა-

ბოწყევით. მე, მე კი რა, არ მინდოდა გარეთ გასვლა? გადასარევედ ლამაზი დღე იყო, მაგრამ გული მაინც მეთანალრებოდა, რალაცა მაწუხებდა. ალბათ ის, რომ გაზაფხულამდე ძალზე შორს იყო, ჭერ ზამთარი უნდა გაგვეტარებინა. ეს დღე კი... ეს დღე დივერსანტივით იყო შემოპარული „მტრის ზურგში“.

ფეხით შევეუყევით მთაწმინდას.

გია წინ მივბოდა. გამვლელებს ფეხებში ებლანდებოდა.

ბოლოს, როცა ონავარმა კინალამ მანქანის ბორბლებქვეშ ამოყო თავი, დავეწიე, დამსახურებული „საჯარიმოც“ მივართვი, ხელი მაგრად ჩავკიდე და აღარ გამიშვია.

მზე კარგა გვარიანად გვათბობდა. აღმართში გავოფლიანდი. პალტო ხელზე გადავიკიდე. მაინც დამცხა. მეცოდებოდა თოვლის პაპასავით შეფუთული ჩემი ბიჭუნა, მაგრამ რას ვიზამდი. დედამისმა ისეთი რჩევა-დარიგება გამომატანა მეგზურად, რომ კარგი ბიჭი ვიყავი და მის სიტყვას გადავიდოდი...

— ია!

— ვის გინდათ ია, იები!..

მე ფიქრებში ვიყავი გართული, ნუთუ მომეყურა?

გიამ სახელოზე დამქაჩა.

— მამიკო! — მიმახედა.

— ია, ია! ვის გინდათ ია?!

ფანჯრებგაღებული, ორსართულიანი, ფართო აივნისანი სახლის კარების წინ სკამზე იჯდა მიმჭკნარი, დაჩიავებული მოხუცი ქალი და წინ გამოშვერილ ხელში ლურჯი ყვავილების კონა ეჭირა.

— ის რა უნდა ამ ზამთარში? — გაკვირვებული გია ხან მე მიეყურებდა, ხან იმ ქალს.

მართლაც...

იმ ქალთან მივედი.

ჩვენს მიახლოებაზე უცებ გამოცოცხლდა, მის მიმქრალ, ოდნავ მბუტუტავ თვალებში ნაპერწკლებმა გაკვესეს.

— მოდით, შეიღებო, მოდით, წაიღეთ იები!

იებს შევხედე.

ქალაღის იყო, საკმაოდ ცუდად მიმსგავსებული.

გიაც, ეტყობა, მიხვდა და ის-ის იყო ამის ხმამაღლა თქმას აპირებდა, რომ თვალთ ვანიშნე, გაჩუმებულიყო.

— თქვენ გააკეთეთ, ბებო?

გონებადაფანტული მზერა მომაპყრო და წანსვე ვინანე ჩემი გაუფრთხილებელი სიტყვა.

ხმა აუთრთოლდა.

— როგორ, შვილო?.. ამ დილით დავკრიფე ბალში. გაზაფხულის მოსვლა მათ მახარეს. კიდევ რაღაცა უნდოდა ეთქვა, მაგრამ უცებ ცხვირი დააცემინა და სანამ ცხვირსახოცს იღებდა, მოვასწარი მეთქვა:

— შემეშალა, ბებია, შემეშალა. რა ღირს თაიგული?

მოხუცი ცოტა დამშვიდდა.

— როგორ გეკადრება, შვილო? ეს ხომ გაზაფხულია — თაიგულზე მანიშნა, — გაზაფხული განა იყიდება?

დავიბენი. გი:მ რატომღაც ჩაიხითხითა. თვალები გადაეუბრიალუ.

— აბა? — მიეუბრუნდი ისევ მოხუცს.

— ისე წაიღეთ, გენაცვალეთ, ისე. თუ გინდათ, კიდევ მოგიტანთ. მოხუცი შეფუცხურდა, სკამიდან წამოდგომა მოინდომა, ხელი მივაშველე. ორად იყო წელში გაკეცილი.

— რა კარგი ბიჭია! — კეთილად შესცინა გიას, — „კანფეტი“ მქონდა შენთვის. ჭიბეებში დაიწყო ქექვა და გაზინთულ ქალაღში გახვეული „კოწახური“ იპოვა.

გიას გაუწოდა.

ჩემს ბიჭუნას კი ეხამუშა „კანფეტის“ აღება, მაგრამ მაინც მოწიწებით გამოართვა და ზრდილობიანი მადლობაც გადაუხადა.

— ღმერთმა დაგლოცოს, შვილო! — თავისთვის თქვა მოხუცმა. მესიამოვნა, რომ ბავშვი დალოცა.

უცებ სახლის კარი გაიღო და ვიღაც შუახნის, თმაშეღებილმა ქალმა გამოყო თავი. ჯერ ჩვენ შეგვათვალიერა ექვით, მერე უცებ მოხუცს დაადგა ავი თვალი.

— უყურეთ ერთი ამას? შენ, შენ აქ რა გინდა? რამდენი ხანია გეძებ. აი, სად გამოსულხარ! „А, ну-ка, сейчас-же, марш домой!“ — დაუტატანა უხეშად ქალმა.

მოხუცმა თავი მორჩილად დაუქნია. უნდოდა ჩვენსკენ გამოეხედა, მაგრამ გადაიფქრა. საცოდავად შელასლასდა სახლში. ქალი ქორივით დაჰყურებდა ზემოდან.

— „Ты посмотри, а?!“ — მიაყოლა უკან და მერე ჩვენ მოგვიბრუნდა.

— თქვენ?.. უცებ თაიგული შემნიშნა ხელში.

შემკრთალი გია ჩემს ზურგს ამოეფარა.

— აა! — ეტყობა, მიხვდა ყველაფერს, — ამისათვის წვალობდა. ეს გამოჩურჩუტებული მთელი დილა?

— ქალბატონო... — აღარ მახსოვს, რა მინდოდა შეთქვა.

არ მათქმევინა. უკმეხად შემომიტია.

— რა, ქალბატონო? ნახეთ გასართობი, არა? ჭკუაგამოცლილ ქალს ამასხარავეთ? მიბრძანდით აქედან! — ცოტაც და შემოგვიკურთხებდა კიდევ. კარები ჩახუნით გაიხურა.

მე და გიამ სულ დაკვარგეთ მთაწმინდაზე ასვლის ხალისი...

## „ძველი მინუტიკი“

ჩაფიქრებული და დარდიანი მიუყვებოდა ქალაქის სიციხით გათანგულ ქუჩას ლევან ოსაძე. რატომღაც ეგონა, რომ მის გარდა, ირგვლივ, ყველა გამვლელ-გამომვლელს საქმეზე მიეჩქარებოდა, ან უბრალოდ, საქმეზე მიანიც ფიქრობდა. ის კი, ლევანი, უკვე 80-ს გადაცილებული პარტიის ვეტერანი, საკავშირო მნიშვნელობის პერსონალური პენსიონერი, მთელი ცხოვრება ქვეყნის აყვავებას და აშენებას რომ შეაღია, აღარავის ჭირდებოდა, აღარავინ ენდობოდა საქმეს.

კიროვის ბაღის პენსიონერებმაც კი „მოიშორეს“ თავიდან, — წადი, ლევან, დაისვენე, საავადმყოფოდან ახალი გამოსული ხარო.. თვითონ კი პიონერული ბანაკის საინსპექციოდ წავიდნენ.

ლევანმა მაშინ, ბაღში, საათს დახვდა, უკვე სამი სრულდებოდა. კი, მაგრამ 12 საათიდან აქა ვარ, ასე სწრაფად როგორ გავიდა. დროო, გაუყვირდა, — ჩვენ რომ აქ ვბჭობდით, თავიდან შენც იღებდი მონაწილეობას, მაგრამ მერე უცებ ჩაგეძინა, და აღარ გაგაღვიძეთო, — აუხსნა ყოფილმა ლოტბარმა შოთა ქათამაძემ.

ლევანს შერცხვა. — წავალ სახლში, რაღაც მართლა შეუძლოდ ვგრძნობ თავსო, — გამოაცხადა და ბალიდან გამოვიდა.



შეუძლობას კი არა, ძალების მოზღვავებას გრძობდა ლევანი. კარგად უმკურნალეს ბალნეოლოგიურ საავადმყოფოში. მარილები აწუხებდა, ახლა გაუყუჩდა ის მძაფრი ტკივილი, გულიც მაგარი ჰქონია. პროფესორმა რომ გასინჯა, სწორედ ასე უთხრა: „ნეტა მე მომცა თქვენისთანა გული, კიდეც ეს წელს ვიციოცხლებდიო“...

ლევანმა ტროლეიბუსის გაჩერებაზე წითელსამკლაურიან კაცს მოკრა თვალი. „ეს ხომ ალექსანდრეა, ქეშეშევი?“ — გაიფიქრა და მისკენ გაეჩქარა. — ალექსანდრეს გაუმარჯოს! — მიესალმა ხანში შესულ მელოტ კონტროლიორს, რომელიც ის-ის იყო ტროლეიბუსში ასვლას აპირებდა.

ალექსანდრემ ხელი მაგრად ჩამოართვა.

— რასა იქმ, ლევან?

— არაფერს, ასე უსაქმოდ დავეხეტები. — ნალელიანად მიუგო ლევანმა.

— ბედნიერი კაცი ხარ. მე მოკვდი დილიდან ამ უბილეთობის დევნით, — შესჩივლა კონტროლიორმა და შუბლიდან ოფლი პერანგის სახელოთი მოიწმინდა.

— გინდა მოგეხმარები?! — შესთავაზა ლევანმა.

ალექსანდრემ გამომცდელად ახედ-დახედა.

— წადი, კაცო, დაისვენე, საავადმყოფოდან ახალი გამოსულო ხარ.

— შენ საიდან იცი? — გაკვირვებით ჰკითხა ლევანმა.

— ბალში ვიკითხე, რომ არ ჩანდი... ჰო! თქვენები სად არიან?

— ვაჟა ისევ ენგურზე დაბრუნდა. შვებულება გაუთავდა, ცოლ-შვილიც წაიყვანა. ბავშვებს არდადეგები აქვთ.

— ჰოო. მარტო დარჩი?

— მარტო. კაკოც სოფელში წავიდა. ამოდი ამ საღამოს, ნარდი ვითამაშოთ.

— ამოვალ, ამოვალ... — აჩქარდა ალექსანდრე, რადგან ტროლეიბუსი ჩამოდგა გაჩერებაზე.

— ჰა, წამოგყვე, თუ არა? — შეევედრა ლევანი.

— კარგი, წამოდი, — შეეცოდა ალექსანდრეს, — აი, გაიკეთე! — და ჯიბიდან კიდეც ერთი წითელი სამკლაური ამოიღო.

ტროლეიბუსი ხალხით იყო სავსე. სულის ხუთვა თუ გინდათ, აქ იყო. ლევანი წინიდან ავიდა და რის ვაი-ვაგლახით მიიკვლევდა მეორე ბოლოსკენ გზას. ბედად, უბილეთო არავეინ შეხვედრია, უკა-

ნა კარებთან ჩოჩქოლი ატყდა. ალექსანდრეს აღელვებული ხმა ისმოდა.

ლევანმა სასწრაფოდ იქით მიაშურა.

ალექსანდრეს ვიღაც მაღალ-მაღალი, აპილპილებული ქალი უყვოდა. — დამიხედეთ ამას! — ავიღე-მეთქი ბილეთი და დამივარდა, როგორ გინდა, დააჭერო?

— ქალბატონო, ბილეთი ყოველთვის ხელთ უნდა გქონდეთ, ასეთი წესია, თქვენ რა, პირველად გესმით! — დაუყვავა ლევანმაც

— ეს კიდე ვინ არის? კიდე ერთი გამოყრუებული ჰკუის მასწავლებელი არ გამოჩნდა! — კიდე უფრო გაცეცხლდა ქალი.

— გადაიხადეთ ჯარიმა! — ქვითარს აჩეჩებდა ქალს დაბეჯითებით ალექსანდრე.

— მე დავინახე, რომ ამ ქალბატონმა აიღო ბილეთი. — ჩაერია კათანდარა, მწითური, სახეაფორაჯებული კაცი.

— მერე, ბილეთი სად არის, რატომ არა აქვს? — დაეკითხა ლევანი.

— დამივარდა-მეთქი. ძალიან თუ გინდათ, მოძებნეთ! — დაცინვით უთხრა ქალმა. — ჩემი ჩასვლის დროა.

მართლაც, ტროლეიბუსი გაჩერდა თუ არა, ქალი უკანა ჩასასვლელიდან ჩავიდა.

კონტროლიორებიც ჩაყენენ.

— ქალბატონო!..

გაცოფებულმა ქალმა ხელჩანთიდან მანეთიანი ამოიღო და დემონსტრაციულად გადაუგდო. — აჰა, მათხოვრებო, ჩახეთქეთ! — გესლიანად დააყოლა ხმამაღლა, ისე რომ გაჩერებაზე მდგომ ხალხს გაეგონა და გზა განაგრძო.

— ლევან, დაეწიე 50 კაპიკი და ქვითარი დაუბრუნე, მე აღარ შემიძლია მაგისი ატანა, — სთხოვა ალექსანდრე.

ლევანი მართლაც ასე მოიქცა. მაგრამ, როდესაც ქალს ფულს და ქვითარს აძლევდა, ძალიან ეწინოდა, სახეში არ მომეყაროსო. თუმცა ქალმა რატომღაც ლევანი ჩხუბის ღირსად აღარ ჩათვალა და უხმოდ გამოართვა ყველაფერი. ლევანს ეუცხოვა.

დამნაშავეებივით იდგნენ პენსიონერი კონტროლიორები გაჩერებაზე. ტროლეიბუსი რომ ჩამოდგა, ლევანმა ისევ დააპირა ასვლა, მაგრამ ალექსანდრემ შეაჩერა:

— აღარ შემიძლია, ლევან. გავწამდი კაცი... იცი რა, ცხელა, ხალხი ისედაც განერვიულებულია, წავედი მე სახლში.

ლევანი ისევ მარტო დარჩა...

— „საინტერესოა, მამა, რას აკეთებ, რატომ იკლავთ თავს. ხომ მოგცათ მთავრობამ დამსახურებული პენსია, გითხრათ, რომ თქვენ თქვენი საქმე უკვე გააკეთეთ, ახლა დაისვენეთ, თქვენს ნებაზე იცხოვრეთო. რატომ არ ისვენებთ? სხვებსაც აწუხებთ... აგერ სამი შვილიშვილი გყავს. ამათ ასწავლე, აღზარდე... ესეც საზოგადო საქმე არ იქნება? არა ბატონო... თურმე დილას გადიხარ იმ დასაწვავ ბაღში და ღამე შემოდინხარ... რაო, რას ვხელმძღვანელობო, ბუნების დაცვის ჯგუფისო?..“

— კი, მაგრამ, შვილო, შენს ბავშვებს მე ვინ მანდობს აღსაზრდელად? დილას სკოლაში არიან, მერე ინგლისური, ცეკვა, მუსიკა, ცურვა... ჩემთვის ვის სცალია?

— ახლა ხომ სცალიათ. წამოდი ენგურზე, მშენებლობასაც ნახავ, გაერთობი.

— არ შემიძლია, შვილო, უსაქმოდ...“

...ახსენდებოდა ლევანს შვილთან საუბარი და ექვობდა, ვაითუ სჯობდა მართლაც ენგურზე წასვლა?..

ფიქრებიდან მანქანის დამუხრუჭების ხმამ გამოარკვია...

შოფერმა სულ ლანძღვა-გინებით აიკლო ბავშვიანი ქალი, რომელიც გადასასვლელზე არ გადადიოდა.

— არც შენა ხარ მართალი! — გამოენთო უკან მანქანაში ჩამჯდარ შოფერს ლევანი. — როგორ არის, ქალს რომ ელაპარაკები, შე უზრდელი?!

— კიდევ ერთი გოყი... — ჩაიბურტყუნა შოფერმა და მანქანა დასძრა.

— თქვენც, ქალბატონო, არა გრცხვენიათ, რას ასწავლით ბავშვს? — მიუბრუნდა ლევანი იქვე საცოდავად გაჩერებულ ქალს.

ქალი ჯერ კიდევ გაოგნებული იყო, მერე გონებაგაფანტულმა შეხედა, ამას კიდევ საქმე არა აქვსო, — ვითომ შვილს მიმართა და სწრაფად გადავიდნენ ქუჩის მეორე მხარეს.

„სჯობია სახლისაკენ გასწიო, ლევან! — ეუბნებოდა შინაგანი ხმა. — დღეს რაღაც ცუდ ფეხზე ხარ ამდგარი. გამოყრუებულო, მათხოვარო, გოყო, უსაქმურო, რა ეპითეტებით არ შეამკეს

დღეს, არა, სიმატლელ უნდა ითქვას, მართალია ალექსანდრე, ძალიან ცხელა, ხალხი განერვიულებულია...

ლევანმა გზად პურის მალაზიაში შეიარა. პური იყიდა. მის ქუჩაზე იმდენი ხალხი და მანქანები უკვე აღარ იყო. აი, ეს არის, თვალს ეხამუშა, სახლის კუთხეში, ასახვევთან, სამი პერანგგაღებული ბიჭი იდგა და მზესუმზირას აკნაწუნებდნენ. ჩენჩოს დაგვილ ტროტუარზე ყრიდნენ.

— ახალგაზრდებო, სირცხვილია, ნუ ყრით ქუჩაში მზესუმზირას, ვერ ხედავთ, ტროტუარი რას დაამგვანეთ?

— მიდი, რა ბიძაჯან! — გულგრილად უთხრა გამხდარმა, ქერა ბიჭმა და მზესუმზირას ქაშა განაგრძო.

არც სხვებს უთხოვებიათ ყური. შარვალში გამოწყებილმა გოგონამ ჩაიარა და იმას გააყოლეს დაინტერესებული თვალი. — ლამაზოო! — დაადევნა ერთმა უკან.

— ჰო, აბ, ამან წაილო თქვენი გონება. არ ჯობია, დაჯდეთ სახლში, წიგნი წაიკითხოთ, რადიოს მოუსმინოთ, გაიგოთ, რა ხდება ამ ქვეყანაზე. დარწმუნებული ვარ, არც ერთს დღევანდელი გაზეთი არ გადაგიშლიათ...

კიდევ რაღაცის თქმას აპირებდა ქარმაგი, სიმპათიური მოხუცი კაცი, მაგრამ ისევ იმ გამხდარმა, ქერა ბიჭმა გააწყვეტინა სიტყვა:

— რას გადაგვეკიდე, ბაბუა. შენ თვითონ დაჯექი სახლში, შვილიშვილებს მიხედე. ვინძლო, ისინიც გარეთ დაყილებენ.

ბიჭებმა გაიცინეს.

ლევანმა მშვიდად განაგრძო:

— არ გინდათ, ბიჭებო, სხვისი დაცინვა. ყური მიგდეთ. მე ბევრი მინახავს თქვენისთანა...

ახლა ორმა გოგონამ ჩამოიარა. ჭრელპერანგიანი; ჭინსებიანი ბიჭი წინ გადაუდგა. გოგონებმა გვერდი უქციეს. ბიჭი მკვირცხლად ისევ წინ გამოეკიშათ. დამფრთხალი გოგონები გაიქცნენ და ბიჭებმა სიცილი დააყარეს.

— როგორ, მე, — ამხელა კაცი აქა ვდგავარ და თქვენ მაინც არ იშლით თქვენსას? სულ დაკარგეთ სინდისი? — გაცეცხლდა ლევანი.

— მართლა, აღარ შეგვეშვები, რა გინდა, რას ვაშავებთ? — ბოროტად შეუტია ისევ იმ გამხდარმა.

— ვაა... ეს ვინ ყოფილა? — გაიოცა ჭინსებიანმაც.

— მე ვინ ვყოფილვარ?.. — ლევანს რაღაცის თქმა უნდოდა და უცებ ელდა ეცა...

— წადი რა, წე ძველო მენშევიკო! — გაიცინა მესამემ, ჩასუქებულიშმა, სახეაჭარხლებულმა ბიჭმა, რომელსაც აქამდე სიტყვაც არ დაუძრავს.

— რაოოო! — ამოიღრიალა რაღაც არაადამიანური ხმით ლევანმა — მეე... ძველი მენშევიკი? — ხელები გაასავსაუა. — მეე... ძველი მენშევიკი?.. — უკვე ხრიალებდა.

თვალთ დაუბნელდა, დედამიწა ამოყირავდა, ხეები თავქვე დაეკიდნენ...

სასწრაფო დახმარების მანქანა მალე მოვიდა. ექიმმა უიმედოდ გადააქნია თავი: — მკვდარია! — „rubturo cordis“.

— რაო? — იკითხა ერთმა მოხუცმა ქალმა.

— გული გაუსკდა, ქალბატონო...

## ცივი ოპტომაგარი

უეცრად აცივდა ოქტომბერში.

ადრეულად გამოშრნენ ხეები და მოიბუზნენ ნირწამხდარნი...

ბაღში სკამზე კაცი იჯდა და ტიროდა.

ცოტა ხანს შორიდან შეეყურებდი.

თავი ხელებში ჩაერგო და მხრები უცახცახებდა.

შემეცოდა.

შორი-ახლოს არავინ ჩანდა.

გვერდით მივუჯექი.

გაკვირვებულმა ცრემლიანი თვალებით შემომხედა... ცოტა ხანს მიყურა და მერე თვალი ამარიდა.

შუახანს მიღწეული იყო, მელოტი, საფეთქლებთან მეჩხერად შემორჩენილი თმა გაჭაღარავებოდა.

— რა იყო, რა გატირებს, შველა ზომ არ შემიძლია?

არც გატოკებულა.

მეცდიდი.

— რა გინდა, რას მომეტმასნე?! — განრისხებული წამოიფოფრა, ხელიც მკრა. არ მოველოდი? ვერ გეტყვით. ჰოც და არაც!

შეც წამოვდექი, ოღონდ უფრო დინჯად — ბოდიში-მეთქი, — ვუთხარი და თავი სინანულით გადავაქნიე.

— გაიარე!.. — ცოტა დამშვილდა კაცი და ისევ დაჯდა. ორიოდ ნაბიჯით გავცდი თუ არა, მისი ხმა შემომესმა.

— შეგობარო!..

მივტრიალდი, ხელით მიმიხმო.

უკვე ვორკოფობდი, მივსულიყავი თუ არა. მერე მივედი, თუმცა გვერდით აღარ დავუჭექი.

— აი, შენ... მოდიხარ სრულიად უცნობ კაცთან. მე ჩემთვის ვზივარ და ვტირი, რამეს ვაშავებ? არ შეიძლება, რომ ყველგან არ ჩაეჩხიროთ, ყველგან თავი არ გამოყოთ? მაცაღეთ, მარტოკა ტირილი მაინც... — ისევ აღელდა.

ისევ გაცლა ვამჯობინე.

— ბოდიში, ბატონო, შემეშალა... მე ცუდი არაფერი გამივლია გულში.

— ძალიან საინტერესოა, ძალიან! — ბრაზით ამოილაპარაკა კაცმა, — ჯერ გეჩრებიან... მერე ფეხებზე გიკიდებენ... არა?!

— ბატონო! — სულ დავიბენი.

— აი, მაგალითად, თქვენ რომ ჩემს ადგილას ყოფილიყავით... მე ხომ არ მოვიდოდი თქვენთან, არაფერს გკითხავდით, გულს არ გადაგაშლევინებდით... ტირილს გაცლიდით, — ბოლოს დააყოლა მან.

— აი, სწორედ მაგითი განვსხვავდებით აღამიანები... ყველა ჩემსავით ხომ არ არის.

— საუბედუროდ, თქვენისთანები ბევრია. — ბოროტად გამოსცრა კბილებში კაცმა.

ძალიან უხერხულად ვიგრძენი თავი.

— კარგად ბრძანდებოდეთ...

— არა, — კატეგორიულად განმიცხადა, — ეხლა ვერსად წამიხვალთ, სანამ არ მოგიყვებით ყველაფერს. ხომ ძალიან გაინტერესებდათ რაზე ვტიროდი. კეთილი ინებეთ და მომისმინეთ...

ცოტა ხანს ჩაფიქრდა. მიწას დააშტერდა და ნერვიული, აკანკალებული ხმით დაიწყო:

— დღეს, ქუჩაში, ავტობუსის გაჩერებასთან ერთი ძველი ნაც-

ნობი, უფრო სწორად, თანაკურსელი შემხვდა. კარგა ხანია ერთმანეთი არ გვინახავს ვილაპარაკეთ აქეთური, იქითური... ძველებიც გავიხსენეთ და ახლებიც. ენაკვიმატი და მხიარული ბიჭი იყო ყოველთვის. ანეკდოტის მოყოლაც მოასწრო...

კაცმა თავი ჩემსკენ მოატრიალა.

— რა ანეკდოტი იყო, არ გაინტერესებთ? — კი მკითხა, მაგრამ, რა თქმა უნდა, პასუხს არც დალოდებია. სიმწრის ღიმილით გააგრძელა თხრობა. — ორი მეგობარი შეხვედრია ერთმანეთს. მოიკითხეს ოჯახებით ერთმანეთი. ერთმა უთხრა, ძალიან განერვიულებული ვარ — რაზეო? — ცოლზე ვეჭვიანობო. მგონი, აგრონომი უნდა იყოს ჩემი დამლუპველიო. — რაღა მაინც და მაინც აგრონომიო? — იმიტომ, რომ, სახლში დაბრუნებული საბნის ქვეშ ხელს რომ შევყოფ სულ რაღაცის თესლებს, მარცვლებს, ბალახებს ვპოულობო. — ბიჭოსო! — გაიკვირვა მეორემ. რომ იცოდე, მეც ვეჭვიანობ ჩემს ცოლზეო. — შენ ვილაზეო? — ჰკითხა პირველმა. — მე რკინიგზელზეო. — რაღა მაინც და მაინც რკინიგზელზეო? — რატომ, ბატონო და ვბრუნდები სახლში, გადავწევი საბანს და ლოგინში რკინიგზელი წევს ხოლმეო.

ჩამეცინა.

კაცი ცოტა ხანს გამომცდელად მიყურებდა თვალებში, აბა, რა შთაბეჭდილება მოვახდინეო. — აი, სწორედ ასევე გავიცინე შეც, მერე კი, როცა დავეშორდით ერთმანეთს, შემოვედი ამ ბაღში. ეს უკაცრიელი ადგილი მოვნახე და დავიწყე ტირილი. ამ დროს მომისწარით თქვენ.

— უკაცრავი კითხვაა, მაგრამ... რატომ?... — მორიდებით ვკითხე.

კაცი წამოდგა. ტყავის პალტო ეცვა. გაისწორა. შლაპა დაისხრა. ამ პროცედურას რომ მორჩა, მითხრა: — იცით, რა? გადავწყვიტე... გეტყვით და წავალ. რატომღაც, მინდა გითხრაო.

— ორი შვილი მყავს. ბიჭი უკვე 18 წლისაა, გოგონა — 13-ისა, ცოლი მყავს ათი წლით უმცროსი. სიღვრეთან ვცხოვრობ. ცოლი მღალატობს. უკვე კარგა ხანია, ერთთან.

ვიცი ვისთანაც. მე კი ძალიან მიყვარს. ვერ ვშორდები. თან ამას ისე მოხერხებულად აკეთებს, რომ ჩემს გარდა ვერავინ ვერ მიხვდა. მისი საყვარელიც ცოლ-შელიანია. ასე, რომ მე მგონი, სამარემდე ვერავინ გაიგებს მათს ამბავს. მე კი... ვერ... მოკლედ მიყვარს. ისედაც... ისე იქცევა სახლში, ჩემს წინაშე, რომ ვერ შევღაგებო. ალ-

ბათ ვეცოდები... გულწრფელად მივლის... ღამეც ხშირად მეფერება. ალბათ ლოგინშიც ვეცოდები... იცის, რომ მე არ შემძლია და არც მილატია მისთვის. ვერ შეედავები, გესმით? თუ? — აქ კაცმა ცოტა ხანს იყუჩა — მეც ვერ შემედავები? — შიყვარს... გაიგონეთ?! ბავშვებიც შიყვარს, გესმით?.. გესმით?.. — გამიზეორა სასოწარკვეთილად და დაჟინებით.

მე შეძრწუნებული, თავდახრილი ვიდექი მის წინააგ.

— პოდა, მიშველით რამეს? — დაცინვით შემეკითხა... — წადით რა, ყველამ თქვენს საქმეს მიხედეთ! — დააყოლა გესლიანად და ჩქარი ნაბიჯით, თითქმის სირბილით გასწია ბაღის გასასვლელისაკენ.

მალე თვალს მიეფარა.

იღვა სუსხიანი ოქტომბერი და ბაღში ნელ-ნელა სიბნელე შემოიპარა.

## ღასაწყისი

რეზომ პალტოს ღილები გაიხსნა. პალსტუხი გაიხწორა. ცოტა ხანს კიდევ იღვა კარებთან, აყოვნებდა. როგორც იქნა, ზარი დარეკა.

კარი ახალგაზრდა, სანდომიანი სახის ქალმა გაუღო.

— კიდევ კარგი ვინმე მახინჯი არ შემხვდა, — გაიფიქრა რეზომ და იკითხა:

— მგონი ტელეფონი გაქვთ გაფუჭებული, არა?!

ქალმა ექვით ახედ-დახედა.

— მობრძანდით! — მის ტონში თითქმის ბრძანება ისმოდა.

რეზო შევიდა... მის პირდაპირ უზარმაზარი სარკე ეკიდა და თითქმის მთელ კედელს ფარავდა. სარკის ელვარებამ თვალი მოსკრა. ქალის ხმამ გამოაფხიზლა:

— ეს ტელეფონი კი არა, ჭართია, სად იყავით ამდენ ხანს? თქვენს გამოჩენას არ დაადგა საშველი...

— რა ჩემი ბრალია, ქალბატონო — ეწყინა რეზოს. — დისპეტჩერი გვაძლევს მისამართებს. თანაც მე დღეს პირველად...



— კარგი, კარგი! დამიწყებენ ესლა აქ თავის მართლებას, — შე-  
აწყვეტინა ქალმა, — აგერაა ტელეფონი და შეუდექი საქმეს!

რეზომ ტელეფონთან სკამი მიიჩოჩა და პატარა ჩემოდანი გახსნა.  
ქალი თავზე ადგა და მის საქმიანობას თვალს ადევნებდა.

ბიქს შუბლი ოფლით დაეცვარა. ტელეფონის შეკეთებას კარგა  
ხანი მოუნდა. ყურმილში რომ ზუმერის ხმა გაიგონა, ცოტა გულზე  
მოეშვა. შემდეგ კომპუტატორს დაურეკა...

— ყველაფერი წესრიგშია, — თქვა მან და წამოდგა.

— მოიცა, მოიცა, — ქალი ტელეფონს დასწვდა და რაღაც ნო-  
მერი აკრიფა.

— ალო, ალო, ნინო ხარ?!. ნუ მკითხავ, მეორე დღეა ჩემი  
ტელეფონი არ მუშაობს. თორემ ზომ იცი... რას მეუბნები?! მოიცა  
ერთი წუთით!

ქალმა ხალათის ჯიბიდან სამმანეთიანი ამოიღო და რეზოს მოწყა-  
ლებასავით გაუწოდა.

ამას კი რეზო არაფრით არ ელოდა. უნებლოეუ ხელები ზურგს  
უკან დამალა.

ქალს გაეცინა.

— აილე, აილე! მართალია გაგიჩავრდი, მაგრამ არა უშავს, აილე!..

— როგორ გეკადრებათ, ქალბატონო!

— ფულს არ იღებ?

— არა!

ქალმა გაცვირვებული სახით გაულო კარი. რეზო ელვის სისწრა-  
ფით დაეშვა კიბეზე და ქუჩაში გამოვარდა.

„ჯერ ერთი, პალტო მაინც გაეხდევინებინა. ფული რად მინდო-  
და... მადლობაც კი არ უთქვამს“.

დღეს დილით პირველად გამოცხადდა სამსახურში. სატელეფო-  
ნო სადგურის უფროსი ძალზე გულთბილად შეხვდა. ათასი რჩევა-  
დარიგება მისცა და როდესაც დააპირა ეთქვა, არამც და არამც შე-  
მოძლეული ფული არ აიღო, ბიქის თვალეგმა შეაჩერა. მიხვდა,  
ბიქს გაფრთხილება არ სჭირდებოდა.

— აბა, ყოჩაღად, იცოდე, არ შემარცხვინო.

დისპეტჩერი შუა ხნის ქალი იყო.

— დღეს ახალბედა ხარ, მხოლოდ სამ მისამართს მოგცემ. ესეც  
იცოდე, თუ ბევრს მოიტან, ბევრსაც წაიღებ. რეზო მაშინ ვერ მი-  
უხვდა გადაკრულ სიტყვას და ახლა გაახსენდა.

— ჰმ! აი, თურმე რა ყოფილა!

რეზომ ქუჩა თითქმის ბოლომდე ჩაათავა და ორსართულიან, ჯერ დაუმთავრებელ სახლთან შედგა.

სახლის მეორე სართული დაუმთავრებელი იყო. პირველ სართულს კი წინა ფასადზე არც ფანჯრები ჰქონდა და არც კარები. რეზომ სახლს შემოუარა და ძლივს იპოვა უკანა კარები. ზარი დარეკა. კარი რომ არავინ გაუღო, ხელით ატეხა ბრახუნი. ეს დღე რა ცუდად ამეწყოო, — გაიფიქრა. ბოლოს და ბოლოს ნაბიჯების ხმა გაისმა... კარი წვერგაბურძღვულმა, დაბალმა, ძალზე მსუქანმა კაცმა გააღო. ეტყობოდა, ნამთვრალევი იყო.

— უჰ, ბოდიში. ბევრი გაცდევინეთ, თურმე ზარი რეკავდა. მე კი მეგონა ტვინში რეკავს-მეთქი რაღაცა. კიდევ კარგი, თორემ ჰა... ჰა... ჰა... — უცებ სიტყვა გაწყვიტა და გაჩუმდა. ცოტა ხანს ჩუმად იდგნენ და ერთმანეთს გაკვირვებულნი შეჰყურებდნენ.

მერე ისევ რეზო გამოერკვა.

— მე ტელეფონის თაობაზე ვარ მოსული. მგონი გაფუჭებული გაქვთ.

მასპინძელს სახე გაებაღრა.

— მობრძანდით, მობრძანდით!.. — შინ შეიპატიჟა, — პალტო არ გაიხადოთ, ჯერ არ თბება, აქეთ მობრძანდით!

რეზოს ეგონა მუზეუმში მოვხვდიო, უზარმაზარი ოთახი აჭრელებული იყო ნახატებით, კედლები ფრესკებით იყო მოხატული. აქა-იქ ჰედურობა და ქანდაკებებიც მოჩანდა. ბიჭი პირველად მოხვდა მხატვრის სახელოსნოში და განცვიფრებული იყო.

— აი ტელეფონი, ხმას აღარ იღებს. რა ჭირს არ ვიცი. გასინჯე ერთი თუ ძმა ხარ! — მხატვარი უცბად გადავიდა „შენობით“ ლაპარაკზე.

რეზომ, ექიმი რომ ავადმყოფს სინჯავს, ისეთი ყურადღებით გასინჯა აპარატი და გაიცინა:

— ეს სულ უბრალო საქმეა, — თითით ყურმილზე ანიშნა, — კონტაქტია აი აქ, გაწყვეტილი! — უნდოდა ეთქვა, ამას ბავშვიც კი მიხვდებოდა და გააკეთებდაო, მაგრამ აღარაფერი თქვა. მართლაც ერთ წუთში მორჩა საქმეს.

— როგორ, უკვე შეაკეთე? — მხატვარს სკეპტიკური გამოხედვა ჰქონდა.

— თუ არ გჯერათ, გასინჯეთ.

მხატვარი ტელეფონთან მიიჭრა და ნომერი აკრიფა. ზუმერის ხმა გაიგო თუ არა, პასუხს არ დალოდებია, სასწრაფოდვე დააგდო.

— შენ ყოფილხარ ძმაო, ვინც ყოფილხარ. ერთი კვირაა ამ „ოხერს“ ხმა არ ამოუღია! — მხატვარმა ტელეფონს ბრაზიანად გადახედა. შემდეგ კუთხეში მდგარ კარადასთან მივიდა და კონი-აკის ნაკლული ბოთლი გამოიღო.

— მოდი აქ! — დანჯღრეულ მაგიდასთან მიიწვია რეზო.

რეზოს გაეხარდა. „ეს არ ჯობია ფულის მოცემას. მაინც ეტყობა, რომ მხატვარია, გაგებულა, პატიოსანი“.

— აბა, დავლიოთ! — შეავსო მხატვარმა ჭიქები.

— გაგიმარჯოთ, იხარეთ, იბედნიერეთ, ღმერთმა ხელი მოგიმართოთ! — დაილოცა რეზო.

— აი, ეგ ხელი ვერ მომიმართა ერთი, თორემ სხვა ყველაფერი წესრიგშია. — ჩაიცინა მხატვარმა, — აი, შენს ხელებს არავეითარი მომართვა არ ჭირდება. „ოქროს“ ხელები გქონია, ძმაო. შენი ხელებივით სწრაფად რომ მუშაობდნენ ჩემებიც...

— კი, მაგრამ მე გაფუჭებული ტელეფონები უნდა შევაკეთო, თქვენ კი ახალს, ლამაზს ქმნით. მე, მართალია, მხატვრობაში არაფერი გამეგება, მაგრამ, მგონი, რაც კი კარგია დახატული ან გამოქანდაკებული, ყველაფერი დიდი შრომითა და ჯაფით, თევობით იქმნებოდა.

მხატვარი წაშით ჩაფიქრდა. მერე ისევ დაისხა კონიაკი.

— ჰო, შენ სწორი ხარ. აბსურდია ჩვენი საქმიანობის შედარება, არაფრით არ შეიძლება! — მერე რეზოს ჭიქაზე მიუთითა.

— დალიე, რალა!

რეზომ გადაჰკრა.

მხატვარმა ისევ შეუესო და შეწყვეტილი ლაპარაკი განაგრძო.

— მაგრამ ახლა, შენ — მე მჯობიხარ, — მხარზე ხელი მეგობრულად დაჰკრა, — იმიტომ რომ შენ სასარგებლო საქმეს აკეთებ, მე კი... აი უკვე რამდენი ხანია, — იქვე დაყრილ დაუმთავრებელ ნახატებზე მიუთითა, — არაფერი არ გამომდის. ხომ ხედავ, ამ მომენტში შენ მჯობიხარ. — მხატვარს შეეტყო, რომ კონიაკმა სიმთვრალე შეუბრუნა.

— მოდით, დავლიოთ სადღეგრძელო იმისა, რომ თქვენ მართო ჩემთვის კი არა, ბევრისთვის გეჯობნოთ, მათივე სიამოვნებისათვის! — გულწრფელად წარმოსთქვა რეზომ და კონიაკი გადაჰკრა.

— რამდენი წლისა ხარ?

— თვრამეტის.

— აბა, ნახვამდის! — მხატვარმა ჯიბიდან ხუთმანეთიანი ამოიღო და რეზოს გაუწოდა.

— როგორ გეკადრებათ! — ძლივს წამოიღულულულა ბიჭმა და კარისაკენ წავიდა.

— მოიცა, სად მიდიხარ? ფული აიღე!

მაგრამ რეზოს მისი უკვე აღარ ესმოდა. მთვარეულივით გამოვიდა მხატვრის სახლიდან.

„როგორ მოვტყუედი. მხატვარმაც კი ვერ გამიგო“. რეზომ პალტოს საყელო აიწია.

„შენ მე მჯობიხარო... ვჯობივარ, აბა რა? ეგ მე ვერც ვერასოდეს მაჯობებს... მადლობის მაგიერი ახლა ფული გამხდარა“.

რეზოს დილიდან არაფერი ექამა. კონიაკმა მოაშია და სადმე სასაუბრეში შესვლა გადაწყვიტა. ჯიბეში სულ ორი მანეთი აღმოაჩნდა. ამითი ნეტავ რამდენ დღეს გავძლებო, გაიფიქრა...

ახლა ერთი მისამართილა ჰქონდა დარჩენილი...

კბილის ექიმში ელიავა ოთხსართულიან სახლში ცხოვრობდა. სწორედ მასთან, უფრო სწორედ, მის ტელეფონთან ჰქონდა რეზოს საქმე. კარი ექიმის ქალიშვილმა გააღო.

— მამა ავადმყოფებს 7 საათის შემდეგ იღებს! — განუცხადა მან.

— მე ავად არა ვარ, ტელეფონის შესაკეთებლად მოვედი.

— ბოდიში, მაგრამ ისეთი შეშინებული სახე გქონდათ, რომ ვიფიქრე, ნამდვილად კბილი ტკივა-მეთქი. მობრძანდით!

პალტო გაახდევინა და ოთახში შეიყვანა.

სანამ რეზო ტელეფონს ჩაჰკირკიტებდა, გოგონა იქვე დივანზე იჯდა და წიგნს კითხულობდა. რეზოს ხნისა იქნებოდა, ლამაზი და კობტა გოგო იყო. ძალიან მოკლე კაბა ეცვა და რეზოს მისკენ მიხედვისა რცხვენოდა.

ტელეფონი შეაკეთა და წამოდგა.

გოგონას წიგნიდან თავი არ აუღია.

— რა წიგნს კითხულობთ?

გოგონამ დაფანტული მზერა მიაპყრო.

— უკვე მორჩით?

— დიახ, — წაუხდა საქციელი რეზოს.

— რა მკითხეთ? — გაახსენდა გოგონას.

— არაფერი.

— ერთი წუთით თუ შეიძლება, ეხლავე მოვალ! — გოგონა წინკარში გავიდა. „ფულის მოსატანად გავიდა“, მიხვდა რეზო.

გოგონა მალევე შემობრუნდა. სახეზე დარცხვენა ეტყობოდა. „ერიდება ალბათ ფულის მოცემა. ნუ წუხნდება, მაინც არ ავიღებ“.

მაგრამ გოგონა სწორედ რეზოს ფიქრების საწინააღმდეგოდ მოიქცა.

— ძალიან დიდი მადლობა. თქვენ ნამდვილად „ოქროს“ ხელე-  
ბი გქონიათ.

„ოქროს“ ხელები გაქვთ“ გაახსენდა რეზოს მხატვრის ნათქვამი და ჩაიცინა.

— ნამდვილად!

გოგონა პალტოს ჩაცმაში მოეხმარა.

— მგონი არაფერს არ მაძლევს, — ეხლა კი დაეჭვდა რეზო. გოგონამ კარები გაუღო.

„ნუთუ მართლა არაფერს არ მაძლევს?!“

— ძალიან დიდი მადლობა! კარგად ბრძანდებოდეთ! — მომხიბ-  
ლავი ღიმილით დაემშვიდობა გოგონა.

— ნახვამდის!

რეზო ზეიმობდა. ღილით ჩაირბინა კიბე და ქუჩაში გამოვი-  
და. გაზაფხულის პირველი დღეები იყო, მაგრამ მაინც ძალიან ციოდა.

რეზომ ჩემოდანი იღლიაში ამოიღო და ხელები პალტოს ჭი-  
ბეებში ჩაიწყო.

გულმა რეჩხი უყო.

— ფუი, შენი! — შეიკურთხა ხმამაღლა, ხელში სამშანეთიანი ექირა.

ჰალსტუხი მოიგლიჯა კისრიდან და მოისროლა. ისედაც ბოღმა აზრით...

ასიოდე მეტრი გაიარა და სახლის კუთხეში, კედელთან ატუზუ-  
ლი ყოჩივარდების გამყიდველი ბიჭი შეამჩნია.

თავში რაღაც აზრმა გაუელვა...

რამდენიმე წუთის შემდეგ აქოშინებული რეზო კვლავ კბილის ექიმის კარებზე რეკდა ზარს.

გოგონამ, მისკენ გამოწვდილი ყოჩივარდების დიდი კონა რომ დაინახა, შეცბა.

— ეს თქვენ, ჩემი უდიდესი პატივისცემის ნიშნად!

მერე რეზო მხედრულად შემოტრიალდა და კიბეზე დაეშვა. გულში რა უტრიალებდა ღმერთმა იცოდა.

## ერთის დღის ქრონიკა

### მოთხრობა

ვესტიბიულში, განცხადებების დაფაზე, შავი არშიით შემოვლებული სურათი მოხვდა თვალში. შემოსულები გულდასმით აკვირდებოდნენ და მერე წრფელი სინანულით თავს აქნევდნენ, ოხრავდნენ. სახტად დარჩა: საკმაოდ მხიარული სახე ჰქონდა გარდაცვლილს... რა იცოდა, რომ ამ ფოტოს გამოაქრავდნენ მისი სიკვდილის მაუწყებლად, თორემ ალბათ უფრო ნაღვლიანი გამოხედვა ექნებოდა. ეწყინა. ახლავა მიხვდა, რომ თვე იქნებოდა, რაც ეს კაცი თვალში დააკლდა.

ხელის მაგარი ჩამორთმევით ესალმებოდა. ფეხბურთის ქომაგი გახლდათ... „უნდა დავრეკო მის განყოფილებაში და ვიკითხო, რამ მოკლა“. თათბირზე კიდევ ერთხელ გაახსენდა, მაგრამ მინისტრმა სწორედ მაშინ დაიწყო დავალებების ჩამორიგება.

თათბირიდან გამოსული გზადაგზა, ღერეფანშივე ანალიზებდა დავალებებს. მერე კანცელარიიდან განყოფილებაში დარეკა. დავალება აუხსნა მოადგილეს. არა, სამინისტროში მოხსენებითი ბარათის მიტანას ვეღარ მოასწრებს, ბუნების დაცვის კომიტეტში დააგვიანდება. ბოლოსდაბოლოს რა მოხდა, იქ ვინმეს გაგზავნის, რომ მღივანს დაუტოვოს მოხსენებითი ბარათი. მისი მისვლა სულაც არ არის აუცილებელი. ვესტიბიულში შემობრუნდა და ისევ დაურეკა მოადგილეს. ჩამოვიდა სიმპათიური ახალგაზრდა ქალი. მოთმინებით მოუსმინა და სამინისტროში წასაღები ფურცლები გამოართვა.

როდესაც ბოლო აბზაცი ჩაათავა, ცნობისმოყვარედ გადახედა შოთათბირებს. თავმჯდომარემ თავი დაუქნია, ხნიერი აკადემიკოსი. რომელიც აქამდე თელემდა, გამოფხიზლდა:

— შე მგონი, საკითხისადმი საკმაოდ ორიგინალურ მიდგომასთან გვაქვს საქმე.

— ყველა გამოსულ ამხანაგს მოვესმინეთ. თბილისის გარშემო მწვანე ზოლის შექმნა ფრიალ საპასუხისმგებლო, სამწუხაროდ, გაკიანურებული და სადღეისო ამოცანაა. არავინ გვაპატიებს მისდამი ზერელობას და კამპანიურობას. გთხოვთ, ამხანაგებო, დღეიდანვე აქტიურად ჩაებათ საქმეში! — თქვა დასასრულს ბუნების დაცვის კომიტეტის თავმჯდომარემ.

ყველას საამო ღიმილი დაეფინა სახეზე.

„... ესეც ასე... ახლა რაიკომში წავალ... მერე ძეგლების დაცვის კომიტეტში“. რალაც ჩაინიშნა წიგნაკში და წამოდგა.

გარეთ წვიმდა. ქუჩის მეორე მხარეს, ტროლეიბუსის გაჩერებასთან, ბავშვი ჯერ კიდევ მაშინ დაინახა, სანამ მიწისქვეშა გადასასვლელში ჩავიდოდა. ქოშინით მიიბრინა.

— გამარჯობა! — გულში ისე ჩაიკრა, თითქოს ვიღაცისგან იცავდა. ბავშვს არც აღტაცება გამოუხატავს და არც სინანული.

ხელი გაუშვა. მუშტარივით ახედ-დახედა. შეათასა თითქოს. მოეწონა მოვლილი, ასაკთან შეუფერებლად სერიოზული შვილი.

— ჩემი ტროლეიბუსია! — თქვა ბავშვმა მშრალად.

— მოიცა ცოტა ხანს... იქნებ ერთი გაჩერება ფეხით გაგვესვინა?

— წვიმს! — ირონიულად წარმოთქვა ბავშვმა. — თანაც რას მოგვცემს ეს რამდენიმე წუთი? — მტრულად, ოლონდ დასწავლილივით გამოუვიდა.

„დედამისის სკოლა“.

— დიდი ხანია მარტო დაიწყე სკოლაში სიარული? — მეტი ველარაფერი მოიფიქრა აშკარად გაწბილებულმა.

— რაც ჩვენ ერთად აღარა ვართ! — გესლიანად მიუგო ბავშვმა.

— როგორ გშენის ტყავის ქურთუკი?! — არ გაიტეხა მაინც იხტიბარი.

— მალე „დუბლიონკაც“ გექნება. შემპირდნენ.

— კარგი იქნება! — თავი დაუქნია ბავშვმა; მისი ფერმკრთალი სახე არ მოეწონა.

როდესაც ფრთხილად აიყვანა ტროლეიბუსში, გულიც კი აუჩვილდა.

„ფუჰ, შე ბებერო!“ — გაუწყრა ზიზღით საკუთარ თავს.

წვიმს... აგონდება: ოთხი წლის იყო, მამამისი რომ გარდაიცვალა. მქრქალად მხოლოდ ერთი მოგონება შემორჩა მის ხსოვნას: ტელეფონმა დარეკა. გაიქცა, ყველას დაასწრო ყურმილის აღება. ამ დროს უკან მსუბუქი პანლური ამოჰკრეს. მამამ სიცილით ყურმილი წაართვა. ის კი განადგურებული დარჩა. ახლაც არ გაუვლია იმ წყენას.

კაბინეტში იჯდა და კოლეგიაზე გასატან საკითხს სწავლობდა. წვიმის წვეთები მონოტონურად, წკაპუნით ეცემოდნენ ფანჯრის მინას. ქარი უბერავდა.

ის კი ისევ ქალაღებებს ჩაღრმავებოდა. რამდენი ხანია, კადრების ღენადობა აწუხებთ. გამოსავალი? უცებ მანქანის დამუხრუჭების ღმა და ვიღაცის პირმოხეული ყვირილი გაისმა. ფანჯარას მივარდა. აქედან არ ჩანდა, სახლის კუთხეს იყო მოფარებული შემთხვევის ადგილი.

ნელ-ნელა ერთმანეთს მიაწყდნენ მანქანები და გაქვავდნენ. აქყვიტინდნენ მოუთმენელი საყვირები. რა გნისია!.. ამ ქალაქში უკვე ყურთასმენა აღარ არის. ზვალ კომისიაზე იხილავენ საკითხს: „როგორ ვებრძოლოთ ხმაურს“. სულ დაავიწყდა, აუცილებლად უნდა დაესწროს, სავალდებულოა!

ესევე წვიმს... ნაცრისფერი, მოსაწყენი ღლებია. ზამთარიც მალე დადგება...

ტელეფონის ზარმა დარეკა.

— ალო!

ამ დროს კარიც შემოაღეს:

— შეიძლება?

— მობრძანდით!

— გისმენთ! — საათს ახედა. ორი შესრულებულიყო: „დაიწყა“...



— დაბრძანდით! გისმენთ, გისმენთ... დიახ...

— მე თქვენთან გადმომიყვანეს.

— ერთი წუთით?! — გადახედა ქალს და შეცბა. კინალამ ყურმილი დადო.

— ილაპარაკეთ! — შესთავაზა ქალმა.

— რომელ საათზე? თერთმეტზე?! თვის გეგმაც წამოვიღო? აჰა, კვარტლის და თვის ერთად! კი, ბატონო, ნახვამდის... არა მიშავს. შენ როგორა ხარ?..

— კარგად!

— იქნებ არ გცალიათ? — ზრდილობიანად მოუბოდიშა ქალმა. გაწითლდა. დიდი ხანია იცნობდა, მაგრამ მხოლოდ „გამარჯობა-გაგიმარჯოს.“ ურთიერთობა მოახერხა. მეორე კორპუსში მუშაობდა ინფორმაციის განყოფილებაში. ყოველთვის ლამაზად, გემოვნებით იცვამდა, ზომიერად იყო შეღებილი, ფართო, სქელტუჩებიანი პირი ჰქონდა და ოდნავ დამცინავად უღიმოდა ყოველთვის. რატომღაც ისეთ შთაბეჭდილებას ტოვებდა, თითქოს ეს-ესაა თეატრიდან გამოვიდაო ან პირიქით. თითები? ლამაზი გრძელი თითები ახლა რატომღაც მაგიდაზე ნერვიულად აუკაკუნა.

— მე გადავწყვიტე... თქვენთან გადმოვივიარ სამუშაოდ.

— ჩვენთან? — გაუკვირდა.

— იცით, იქ რამდენად უინტერესო გახდა ჩემი მუშაობა... მერე თქვენთან ძალიან მინდოდა.

„ოცდაათი წლის იქნება. უჰ! ბიჭიკოს შეუღლეც ოცდაათი წლის ხდება.“

შაბათს დაპატიებულნი ვარ! საჩუქარი? ახლა ცოტა ქესეტად კი ვარ. რამეს მოვიფიქრებთ!“ — კალამს დასწვდა. კალენდარზე შაბათის ფურცელს მიაწერა ეს ღირსშესანიშნავი თარიღი.

— თქვენ მე არ მისმენთ?

— პირიქით.

— როგორ „პირიქით“? — წარბი ასწია ქალმა.

„ამას მგონი მამა ჰყავს აკადემიკოსი. უცნაურად ლამაზი ქალიკია“.

— მე ისე მინდოდა თქვენთან გადმოსვლა. — ცოტაოდენი ყოყმანის შემდეგ კვლავ გააგრძელა ქალმა.

დარეკა ტელეფონმა.

„დიდი ხანია არ დაურეკავს“ — გაიფიქრა. შინაარსიანად ისაუბრეს მან და რელიგიის საქმეთა რწმუნებულმა. ბლოკნოტში იწერდა მოცემულ დავალებებს.

— აი, ასეა! — დამნაშავესათვის გაუღიმა ქალს.

მასაც ლმობიერი ღიმილი გადაეფინა სახეზე. ტელეფონმა მესამედ რომ დარეკა, ქალი დემონსტრაციულად წამოდგა.

— ქალები მეუბნებოდნენ, რომ მოგწონვართ. მეც შემიძინევია თქვენი დაყინებული მზერა, მართალია? — ძიახალა მოულოდნელად. კაცი გაოგნდა. ყურმილიანი ხელი ჰაერში გაუშეშდა. მერე ყურმილში წყვეტილი ზუმერი გაისმა. ნელა დაუშვა. მართლაც, საკმაოდ საეჭვოდ ადვილად გამოუტყდა ქალი.

სასწრაფოდ რაიმე უნდა ეღონა. რა?.. ბოლოს, ძალზედ გაკვირვებული, ნასიამოვნები სახე მიიღო.

— რა ვქნა? დიდხანს უნდა დავლოდებოდი, როდის მოიცილით ჩემთვის?

ხმა არ ამოუღია.

„მაღალია, შეიძლება ჩემზე მაღალიც... თავნება“.

— მე... მე სიტყვები არ მყოფნის... — უნდოდა ცოტა სარკასტულად გამოსვლოდა.

— ამ საღამოს თუ მოიცილით, დამირეკეთ! — არ შეიმჩნია მისი დაცინვა ქალმა.

ტელეფონი ისევ აწკრიალდა. ყურმილი გადადო. მერე მეორე ტელეფონის ყურმილიც გადადო. დაბნეულად გაუღიმა: „ხომ ხედავთ, რა ჩემი ბრალიაო“!

ქალმა მისი მაგიდიდან კალამი აიღო და კალენდარზე წაუწერა ტელეფონის ნომერი.

— მიდიხართ?

— სამზე კოლეგიაა, არ დაგაგვიანდეთ! — ალერსიანად დაუყვავა და კარი გაიხურა.

ბედნიერი, თვინიერი წამოდგა სავარძლიდან. ტუალეტში სარკესთან შეყოვნდა. არცთუ მოღუშული, ოღონაც მოკუტუთული თვალები, ინტელიგენტის ნაკეთები, ქერა, სწორი თმა... რომ გაიცინებს, ჯანსაღი კბილები უელავს. რითაა ცუდი ბიჭი? ჯერ ხომ ოცდაცამეტისაა. მერე ხელი აუქნია თავის თავს...

კოლეგიაზე გამოიყვანეს. მერე მინისტრის მოადგილემ დაუძახა, ტელეტაიპი იყო ბაქოში გასაგზავნი....

ვესტიბიულში კვლავ შეყოვნდა შავარშიიან სურათთან. შეამჩნია, ბევრი უკვე ზედაც აღარ უყურებდა ფოტოს...

დღის ბოლოს მინისტრისგან მითითებები მიიღო და თავქუდ-მოგლეჯილი გავარდა მილიციაში.

— თქვენგან ექვსი რაზმელი უნდა ყოფილიყო, მაგრამ მხოლოდ სამნი მოვიდნენ! — უსაყვედურა მორიგე ლეიტენანტმა.

— მეც მეოთხე!.. ვინ მოვიდა, თუ შეიძლება, მათი გვარები მაინტერესებს.

— ჭილაძე, ზარდალიშვილი და კვალიაშვილი.

„გია და ბესო არ მოსულან“...

საბურთალოს ქუჩაზე ლამპიონები ჯერ არ აენთოთ. სკვერში ბავშვები თამაშობდნენ. იდგა, ხელზე წითელი სამკლავურით და გამვლე-გამომვლელებს აკვირდებოდა: ბიჭებს ვერსად მოჰკრა თვალი. კინოში თუ შევიდნენ.

ორმა ჩამოსულმა სასტუმროს როგორ მივაგნოთო, ჰკითხა. თავაზიანად აუხსნა.

„მოსკოვში აუცილებლად ამანათი უნდა გავუგზავნო ბორის მიხეევს. სულ გადამვიწყდა“.

საიდანღაც მთვრალი გამობანდალდა, შუა ქუჩაში ქანაობდა.

„გაუჩიერეთ რა ვინმემ?!“

ვილაც ლეთისნიერი შოფერი გამოჩნდა მართლაც...

დედები და ბებიები ბავშვებს სკვერიდან ნელ-ნელა ელალებოდნენ.

კვლავ წამოწვიმა. „ნატა როგორ მკაცრი ბავშვია!“ „მკაცრის“ გაფიქრება ეხამუშა.

— ამხანაგო!

მოიხედა.

შლაპიანი ხანშიშესული კაცი სთვალისადაც უნდოდ შესცქეროდა.

— გი. მენტ, ბატონო.

— ამხანაგო, თქვენ რისთვის დაგაყენეს აქ, წესრიგის დასაცველად ხომ?! — უხეშად მიმართა მოხუცმა.

— რა გნებავთ, ბატონო? — კვლავ თავაზიანად ჰკითხა.

— აი იქ, ეზოში, — მოპირდაპირე სახლის ალაყაფზე მიუთითა, — ვილაც ვიგინდარები გოგონას აწვალდნენ... ელაბუტებიან... სახლში არ უშვებენ.

— აბა, წამომყევით, მანახეთ...:

— კეთილი ინებეთ, ამხანაგო და... თუმცა წამოვალ! — გადაწყვიტა მოხუცმა.

... ახლოს რომ მივიდა, რაც მყისვე დაინახა, ქალიშვილის შეძრწუნებული, გაფართოებული თვალები იყო. ისინი-ღა უჩანდა, ვიღაცის ზორბა ზურგს მთლიანად დაეფარა კუთხეში მიმწყვდეული. ორნი იყვნენ. ზორბა უხეშად ეჯაჯგურებოდა ქალიშვილს და რაღაცას დაუინებით უმტკიცებდა. ქალიშვილი ტიროდა. მეორე კი, სუსტი ხმელ-ხმელი ბიჭი გამოთაყვანებული, პირდაღებული, იდიოტური კეთილმოსურნე ღიმილით უყურებდა მას და შლაპიან მოხუცს.

— ამხანაგო, მე თქვენ მოგიწოდებთ წესრიგისაკენ! — წამოიკნავლა მოხუცმა.

— რაო! — მოიხედა მოძალადემ. მის გაღებულ სახეს კაცისა არ ეთქმოდა, უფრო პირუტყვს ჰგავდა.

შეკრთა. გულმა რეჩხი უყო.

— ეხლა აქედან „მოხიეთ“ დროზე! — თვალი დაადგა მის წითელ სამკლავურს... — ეს ჩენი საცოლუა, რასაც მინდა იმას ეუზამ! — გამოსცრა კბილებში ბოროტად. ქალიშვილმა დრო იხელთა და ხელი ჰკრა. ბეჭებქვეშ უნდოდა გამოსძრომოდა, მაგრამ მოძალადე კვლავ შემოტრიალდა და ქალიშვილი უკვე მის მკვალეებში აფართხალდა უმწეოდ.

— მიდი რა, ძმაკაც!.. დიმა თვითონ მოუვლის თავის საქმეს. — დაეჭყანა სუსტი.

— ამხანაგო, მე მილიციას დაუუძახებ! — აღშფოთდა მოხუცი.

— ვისაც გინდა დაუძახე! — არც კი გამოუხედია დიმას.

მოხუცმა ასაკთან შეუფერებელი სისწრაფით მოკურცხლა.

მარტო დარჩა. ამდენი ხანი ხმა არ ამოუღია. შეიძლება იმიტომაც, რომ ეგონა, არცთუ ისეთი საგანგაშო და ჩასარევი სიტუაცია იყო.

გოგონამ განწირულად იკივლა. დიმას ერთი ხელით გაეკავებინა, მეორე კი უბეში ჩაეყო და რაღაცას ელულულულებოდა.

— ე... შე ნაძირალავ, რას შევბი! კაცი არა ხარ?! — სისხლმა აასხა ტვინში. ქეჩოში ჩაავლო ხელი მოძალადეს და უკან გამოქაჩა.

— ნაძირალაო?! — უცებ გადმოღვარა იმან თვალებიდან ბალამი და მუშტი გამოაქნია.

ოდნავ გასწია თავი. მუშტმა შხუილით ჩაიჭროლა და სადღაც

მარცხენა ყურთან ჩამოეკიდა. თავით გაქანდა და პირდაპირ გუ-  
ცელში დაეტაკა. ღიმა ღმუილით ჩაიკეცა, მაგრამ მუცელში შერ-  
გულ თავს ახლა ნიკაპს ქვემოდან აძგერა მუხლი და ჯახანი გაადე-  
ნინა. ზრილით უკან გადაქანდა და ვეება ლოდივით დაეხეთქა.

გასწორდა და უეცრად ფერღში ბასრი ეკალივით შეესო რაღაც.  
„უუხ!“ — აუტანელი ტკივილისაგან იყვირა და შემობრუნდა.  
სუსტს ხელში დანა ულაპლაპებდა.

— ეს რაა... შენი! — სასოწარკვეთილმა ამოიკენესა. ამ დროს  
გოგონას კივილმა გაკაწრა ჰაერი. ველარ მოასწრო თავის გაწევა.  
გავეშებული ღიმას გამანადგურებელი ფუთიანი მუშტი დაეცა კე-  
ფაზე და მოკვეთილივით ჩაიკეცა.

თვალთდაუბნელდა. მხოლოდ შეძახილს მოკრა ყური: „ავითე-  
სოთ დროზე!“.

მერე სასტვენის ხმაც გაისმა შორიახლოს.

გოგონამ მოასულიერა. წამოაჯინა. მტვერი ჩამობერტყა. თმაზე  
ეფერებოდა. ამასობაში შლაპიანმა მოხუცმა მოირბინა. „ეს ხალ-  
ხია, ამხანაგო?“ — სინანულით მიუთითა გარშემო შემოკრებილ  
ცნობისმოყვარეებზე. მოწყალედ გაეღიმა.

— სასწრაფოს გამოვეუძახოთ! — შეეხვეწა გოგონა.

მძაფრ ტკივილს უკვე აღარ გრძნობდა ფერღქვეშ. — „ალბათ  
იმდენი არაფერია“. — გაიფიქრა და წამოდგა.

— არა, არაფერია, მე წავალ! — თქვა და მოხუცს ხელი გაუ-  
წოდა.

— ეაჟაკი ყოფილხართ, ამხანაგო! — ჩამოართვა ხელი მო-  
ხუცმა.

გოგონას თვალი ჩაუკრა სანუგეშებლად.

გოგონა სლუკუნებდა: „ლაჩრები... ველურები...“

ცდილობდა მტკიცედ გადაედგა ნაბიჯი.

ფერღქვეშ სისველე ახლა წებოვანი გახდა. ასიოდე მეტრის  
გავლის შემდეგ კვლავ მოუმატა ტკივილმა. ინანა, გოგონას რომ არ  
დაუჭერა.

ნება-ნება ინთებოდნენ ლამპიონები...

სადღაც ცნობიერებაში ამოტივტივდა და ველარ მოიშორა ვეს-  
ტიბიულში გამოკრული გარდაცვლილის ფოტო. მერე იმავე ადგი-  
ლას შავ არშიაში უკვე საკუთარი სახე წარმოიდგინა. გული  
აუჩუყდა.

„მთვრალია!“ მიადწია მისდამი ვილაციის მწარე რეპლიკამ.

„არა ვარ მთვრალი, ბატონებო... მე დაჭრილი ვარ...“ თავის გულში ლაპარაკობდა.

წვიმდა... „რატომ არ გამახსენდა, რომ დამერეკა და გამეგო, რამ მოკლა ის კაცი... მაინც რამდენ ხანს ჩამოკიდებენ ჩემს სურათს? სჯობია პირველივე დღის მერე ჩამოხსნან, თორემ მერე...“

თვითონვე შეეშინდა იმის გაფიქრების, თუ რა მოხდებოდა მერე...

ასფალტი ფეხქვეშ რის ვაი-ვაგლახით მიიზლაზნებოდა. წვიმა უთქაშუნებდა სახეზე. მთავარ ქუჩაზე მექანიკურად გამობარბაცდა. სადარბაზოს კარების წინ შედგა. სცადა ღრმად, ხარბად შეესუნთქა ჰაერი...

— შენ რა, მთვრალი ხარ? — კინალამ კარი მიუხურა ნანამ.

— არა, დაჭრილი!.. — და უღონოდ მიეყრდნო კარს.

— დაჭრილი?

— ნატას მინდა შეეხედო.

— როგორ გალუმპულხარ, შე საცოდავო!..

— ნატა!.. — ჩურჩულით თქვა და პირქვე წაიქცა...

ანაზღად მოვიდა გონს. თავზე თეთრხალათიანები ადგნენ.

— ნატა...

ბავშვი მოვიდა, სიბრალულით ჩახედა თვალებში. ერთხანს უყურა. მერე გაერიდა.

— მიეფერე, შვილო! — დაუყვავა დედამ.

ნატა ისევ მივიდა, დაიხარა და ლოყაზე აკოცა.

დედას თვალები დაენამა, მერე ცრემლიც ჩამოუგორდა ლაწვზე.

ახლად მიხვდა, იმ ქალიშვილის თვალები საოცრად ჰგავდნენ მისი ყოფილი მეუღლისას...

## ერთხელ...

(ნოვალა)

ავვისტოს საღამო დგება. მას შემდეგ, რაც საათის ისრებმა წელიწადში ორჯერ ხან წინ და ხან უკან დაიწყეს გადაწევა-გადმოწევა-

ვა, შესაბამისად იცვლება დღე-ღამის მონაცვლეობის ზუსტი კურსი. ზამთარში ეს ფაქტი სულაც არ გვსიამოვნებს, (ყოველ შემთხვევაში, მე...), ზაფხულში კი — პირიქით.

აი, ამ „პირიქით“ განწყობილებით ვუახლოვდები კიროვის სახელობის ბაღს.

ცოლ-შვილი სოფელშია, დედას ჩემი ასე ადრე მისვლა ალბათ მხოლოდ გააკვირვებს და შეაშფოთებს... (ცუდი ხომ არაფერია მისი შვილის თავს სამსახურში?!).

სამწუხაროდ „კიროვის ბაღელი“ ფეხბურთის გულშემატკივართათვის ეს დრო ალიონს წააგავს, ამიტომაც ჯერ არ შეკრებილან, თორემ აქ ყოფნას და მათთან მასლაათს რა სჯობია.

... ესეც სატიოს უბნისაქენ მიმავალი ოღრო-ჩოღრო გზა... ნურას უკაცრავად, ასეთი დანგრეული ადრე არ ყოფილა ეს გზა, უზარმაზარ ბიბლიოთეკას აშენებენ და იმიტომაა ასე. ბიბლიოთეკის გულისთვის მოითმენს კაცი...

აი, სატიოს უბნელი ბიჭებიც.

ყველანი პირზე კოცნით და, ცოტა არ იყოს, მოწიწებითაც კი მხვდებიან. მეხამუშა?! სულაც არ მინდა „ოფიციალური პირი“ ვჩანდე და ამიტომ მყისვე ანეკდოტს ვუყვები. ზურა და ვანიჩკა სიცილით „იხოცებიან“, ალიკა მხარზე ხელს მიტყაპუნებს „შე, ძველო!..“

ერთი წუთით ჩვენი ყურადღება გოგონებმა მიიპყრეს, რომელთაც ჟრიაშულით და უდარდელად ჩაგვიარეს.

„პო მართლა, მოსკოვის თვითმფრინაზე მინდა სამი ბილეთი ამ დღეებში, მიშველი?“

„ხვალ დამირეკე“ — გაწერინებ ტელეფონის ნომერს.

როგორც კი ბილეთებზე ჩამომიგდო სერგომ სიტყვა, მაშინვე გამიფუჭდა ხასიათი.

სკვერში, ქვის სკამებზე ვიყავით ჩამომჯდარნი და წამოვდექი. შებინდებულა კიდევ.

ამ დროს ზემოდან, ლამბაშიძის ქუჩიდან, სამმა ბიჭმა გადმოჭრა ქუჩა და ჩვენსკენ წამოვიდნენ.

„იმას ხომ იცნობ, გახსოვს, მახარაძელი, რეზო? — ქურდია! — მიხსნის კოტე.“

„რაო?“

„პო, ის ორნიც! ქუთაისლები არიან“.

ქურდების წინ, უცებ „ჟიგული“ გაჩერდა. სამნი გადმოვიდნენ. ერთ-ერთმა, ბუმბერაზმა მილიციელმა რეზო მიიხმო.

„ქურდი“ მისკენ წავიდა. წამებში მოხდა ყველაფერი.

იგივე ღამბაშიძის ქუჩიდან ანთებული ფარებით და გაბმული სირენით „ვოლგა“ ჩამოიჭრა, ქუჩა გადმოკვეთა და „ჟიგულის“ ცხვირწინ ღრპილით დაამუხრუჭა. „ვოლგიდან“ ვერც კი მოვასწარი დათვლა, (ექვსნი მაინც იქნებოდნენ, ყველანი სამოქალაქო ტანსაცმელში), გადმოხტნენ და იმ სამეულს შემოერთებენ გარს. საკმაოდ გაუძნელდათ გაკალება, — ჯიკავ-ჯიკავით მანქანებში ტენიდნენ.

ზურამ მკლავში ხელი გამიყარა და თითქმის ძალით გამომარიდა იმ ადგილს. მერე, ანაზღად, ჯიბეში პატარა რევოლვერი ჩამიღო. „წადი, შენ ხელს ევრაეინ გასლებს...“ — დააყოლა და უკან გაბრუნდა. ცივმა ოფლმა დამასხა. უკან აღარ მომიხედავს, ანგარიშიშუცემლად ნელა წავედი ვერის დაღმართისაკენ და იქ, სადაც ბიბლიოთეკის მშენებარე ნაგებობას ტროტუარისგან ღობე ჰყოფს, ბინდ-ბუნდში გამორღვეული ადგილი შევნიშნე. თვალისდახამხამებაში მივიღე გადაწყვეტილება და შიგნით შევევარი. თავქუდმოგლეჯილი გავრბივარ. რაღაცას ფეხი წამოვდე, გავიშხლართე ძირს. ამომვარდნოდა მაინც იარაღი, შენც არ მომიკვდე. გული კი, მე შგონი, ამომივარდა... უკვე, ისეთი სისწრაფით ვეღარ მივარღვევ ათასგვარ მავთულებიან, ბეტონის უზარმაზარ ფილებიან, აქა-იქ დაყრილ ფიცრებიან სიბნელეს. დიახ, ბნელა უკვე. ეს სად ჩავვარდი?.. რაღა დღეს?

უცებ წინ კაცი დავლანდე. გავჩერდი. ჩამოვიფერთხე შარვალი და ქვეშეცხეულად ვიგრძენი, რომ საფრთხე მომიასლოდა... თუ შე მივეუახლოვდი, ამას რა მნიშვნელობა აქვს. გავუარე. ხმა არ გაუტია. ჩაიარა?..

— ამხანაგო!

— გისმენთ! — შემოვტრიალდი. სახეს ვერ ვარჩევ, ყმაწვილის ხმა კი აქვს.

— აქ რას დაეძებთ?

— იგივე კითხვით შემიძლია მოგმართოთ! — ვგრძნობ, რომ არც ისე დამაჭერებლად ვამბობ.

— მობრძანდით აქეთ, — სინათლისკენ მეპატიჟება, ქუჩასთან ახლოს.



— ვინა ხართ?

— მე, ორგანოს მუშაკი ვარ!

— რაო, მერე რა გინდათ? — ვერ ვიტყვი, რომ ხმაში სიმტკიცე გამრეოდეს.

— მე, ქუჩის მეორე მხრიდან გითვალთვალებდით, რატომ შემოვარდით, აქ?

მეცხეულად მივაყურადე იქით, სადაც ერთი წუთის წინ ის ინციდენტი მოხდა. არაფერი მესმოდა საეჭვო. რატომღაც გულმა მიგრძნო, რომ იქ... ყველაფერი დასრულდა. „ოპერაციამ წარმატებით ჩაიარა“. იმედი მომეცა, რომ მარტო იყო და თავისი ინციდენტივით გამოშვებდა.

— გამიკვირდა და იმიტომ შემოვედი, რა, არ გაგვირეებიათ?!

— ეგ ზღაპრები ბებიაშენს მოუყევი! — (აი, ეს უკვე ჰგავს მათ...) — უხეშად მომმართა და იმას, რომ შენობით დამიყვავა, ხაზი გაუსვა.

ინსტინქტურად ხელი ჯიბისკენ წავიღე.

— ამოვიღე ხელი!

ჯიბიდან ხელი ამოვიღე და შუბლში დავუმიზნე ალაპლაპებული რევოლვერი.

— ეეე... — უცებ ხრინწი ამოუშვა და ძლივ-ძლივს ამოილულულა. — რას მიშვებ, ბიჭო, არ მომკლა.

— წადი ეხლა, შეტრიალდი! — ხმადაბლა ვუბრძანე. — ხელები უკან შემოიწყევე და კედელთან მიდი!

— არ მესროლო, ბიჭო, არ დამლუპო! — შემეხეწა იგი.

— რაც გითხარი, ის გააკეთე. დადექი კედელთან. ასამდე დაითვალე და მერე შემოტრიალდი. შენი ხმა არ გავიგო. არა, ორასამდე დაითვალე — გასაგებია!

— ათასამდე დავითვლი! — შემევედრა.

— წადი!

— მორჩილად მიბოროძიკდა ბიბლიოთეკის ბეტონის კედელთან.

— არ მესროლო!

— ნუ გეშინია, თუ ჰკვივანად მოიქცევი, არ გესვრი. ჩვენ ორივენი შემთხვევის მსხვერპლნი ვართ.

— მეც ეს მინდოდა მეთქვა... — წამოიკნავლა.

— ჩუმაღ. ათასამდე დაითვალე გულში... თავის მოტრიალება არ გაბედო. ხელები, ხელები უკან!..

— არა, ბატონო!..

მივხვდი, რომ უკან გამომხედი კარგა ხანს არ იყო. გავიქეცი. აქედან უკვე ადვილად გავაგენი სამშვიდობოს. ლობეს გადავევლე და ქუჩაზე გამოვედი. საბედნიეროდ იქვე ავტობუსის გაჩერებასთან ტაქსი იდგა თავისუფალი.

— ჩელიუსკინელების ხიდზე!

— სად?

— სადგურისკენ! — გამოვერკვიე ტაქსისტის შემობრუნებული, ვაკვირებული სახის დანახვაზე.

და მაინც, კინალამ ყელი გამოვიღადრე, ისე ვთხოვე, მანქანა ხიდზე გაჩერებინა. „ვიცი, რომ არ შეიძლება, ერთი წამით-მეთქი“, და... მართლაც, წამში რევოლვერმა მტკვარში „ამოყო თავი“.

უკან დავაბრუნებინე მანქანა.

სკვერთან ჩამოვედი. კაცის ჭაჭანება აღარ იყო.

ქვის სკამზე ჩამოვჯექი და თავი ჩავეჩინდრე (ეხლათ ადვილი გასახსენებლად, თორემ მაშინ...) სიზმარივით მინდოდა აღმედგინა ყველაფერი ის, რაც ღროის იმ მცირე მონაკვეთში გადამხდა..

მანქანა გაჩერდა. ნომრებზე ვიციანი, მილიციის მანქანა იყო. ორნი ჩამოვიდნენ. ერთი ხანობა ექვის თვალით მიმზირეს.

წამოვდექი. სინათლისკენ წავედი...

ერთ-ერთი ნამდვილად ის იყო. ინტელიგენტური გარეგნობის ახალგაზრდა.

ჯიქურ მიყურებდა. მეც არ დამიხრია თვალი.

„მერე მერემ რაღაც გადაულაპარაქა.“

ჩასხდნენ მანქანაში და წავიდნენ.

„მანქანა სანამ თვალს არ მიეფარა, ფეხი არ მომიცვლია.“

„ნუთუ, ვერ მიცნო?“

„რომ ვეცნე?“

„რა?!“

## მუხანათები

(ნოველა)

— არა, არა!.. ასე, არ გამოვა. — გადაჭრით გადავაქნიე თავი. — თვითონ მოყვეს ამირანი, ერთმანეთს არ აცდით და აბა როგორ გავიგო?

— ამირანმა, რა იცის, ჭირიმე! — გადაიხარხარა კუკამ. — გელვიძა და მაშინ მიხვდა, ცოლი რომ მოვუყვანეთ.

— აბა, აბა! — გაწყრა ამირანი, მალალ-მალალი, ხმელი, სუფთად გაპარსული ვაჟაკი. — დამუწეთ პირები, ნუ იგონებთ რალაცებს. მე მოგიყვები, გენაცვალე, რა მოხდა ასეთი... არ გადრჩია ეს ხალხი?! — კიდევ ერთხელ გადაუბრიალა თვალები სუფრის წვევრებს.

ნელ-ნელა ისინიც დაშოშმინდნენ.

— მოკლედ მოგიყვები, ძვირფასო... (რაც შემეძლო, სტილი მისი მონაყოლისა დავიცავი, მეგრულად მიამბობდა და შეიძლება ზოგი „ხატოვანი“ ნათქვამი ვერ ვთარგმნე. უნდა მომიტყეოთ).

— ჰოდა, შენ ხარ ჩემი ბატონი... მიყვარდა ჩემო კარგო, ლეილა. არაფრით არ მომყვებოდა ცოლად. მოგიტაცებ-თქვა, დავეჭადნე. ვერ მომიტაცებო! — მომიგო. მაგასაც ვნახავ-თქვა და ასე დავშორდათ ერთმანეთს. ჩვენი სოფელი და მაგის სოფელი ანლოსა ერთმანეთთან, კი იცი შენ; ჩვენთან, სკოლში მუშაობს ექთანად და აქამდე საღამოობით ავტობუსით მიდიოდა სახლამდე. მე რომ დავემუქრე, რმის შერე, სახლში შეუტყობინებია და ძმა აკითხავდა ხოლმე, ის მიაცილებდა. ძმამ ოქტომბერში ტექნიკუმში დაიწყო ჩხოროწყუში სიარული და შეწყვიტა გაცილება. რა ექნა, შენ ხარ ჩემი ბატონი. დეიდა ყავს აქ გათხოვილი და იმასთან რჩებოდა. ძალიან იყო შეშინებული, მაგრამ როდესმე ხომ უნდა წასულიყო სახლში?! შესაფერ მომენტს ვეძებდი, კარგი გეგმა მოვიფიქრე.

— შენ მოიფიქრე, არა? — ირონიულად ჰკითხა რეზომ.

(იცით, რა კარგები არიან ჩემი დედულეთელი ბიჭები, ჩაყლაპავთ. ერთმანეთზე უკეთესები სამეგობროდ, ჭირშიც და ლხინშიც გამტანები; არავეითარი უზრდელობა მათგან არ გამიგია არასოდეს. ეს არის ცოტა, ტრაზახი უყვართ, მაგრამ, საამისო არგუმენტებიც რომ აქვთ?!).

— ჩვენ, ერთად მოვიფიქრეთ! — აღარ გააწბილა მეგობარი ამირანმა.

ესიამოვნათ და აღარ შეუწყვეტინებიათ თხრობა.

— რა გეგმა? — ახლა მე გამოვიჩინე ცნობისმოყვარეობა.

— გიყვები, რაღა!.. — და გააგრძელა. — მოკლედ, თქვენებურად, ქალაქურად რომ ვთქვათ „შევეკრეთ“ ერთი მაგის თანასოფლელი მეზობელი ბიჭი, მოვარდა ლეილასთან და აუწყა სასწრაფოდ:

სახლში წადი, ბებიაშენი უკანასკნელ წუთებშია და გეძახიანო. გამოვიდა ესეც გარეთ და დაუწყო ავტობუსს ლოდინი. ყველაფერი გათვალისწინებული გქვონდა. ავტობუსი იმ დღეს, ადრე გაუშვით რაიონულ ცენტრში, ვთხოვეთ. მეორე საღამომდე აღარ ჩამოვიღლიდა. ჩაჯდა ჩვენი კუკა თავის მანქანაში და გაუჩერა ცხვირწინ. სად მიდიხარ, წაგიყვანო. არაფრით არ ჩაუჯდა, ფრთხილია ეს მამაძალი. მარცხ რალაცა ხიფათი იყნოსა. დავიღუბეთ, რა გვექნა აღარ ვიცოდით. თანაც, ადგა და შებრუნდა უკან სკოლაში. ცოტა ხნის მერე ისევ გამოვიდა. დავდექით მოსახვევში, მოფარებულში. ყველა მანქანას ვაფრთხილებდით, რომ მისთვის არ გაეჩერებინათ. უცებ ორადგილიანი ფურგონიანი „მოსკვიჩი“ არ გამოჩნდა?! ჩვენებური ბიჭი, მურადი, იცნობ შენ.

— ფეხბურთს რომ თამაშობდა, სკოლის დირექტორის ბიჭი?

— ჰო, სწორედ ის.

— მერე?

— ვიფიქრეთ, რომ ორადგილიან მანქანაში აუცილებლად ჩაჯდებოდა.

— მერე?

— ასეც მოხდა. წამოვიდა მურადი და აუწია ხელი. ჩვენ აქედან ვუთვალთვალებთ. და ჰოი, საკვირველებავ, რას ვხედავთ. გაღლებინა უკან ფურგონი და შიგ არ ჩაჯდა. თუ-კი ამირანი სადმე უნდა დამხვდეს, ზომ დანახავს რომ ამ „მოსკვიჩში“ არა ვზივარო.

— კინალამ არ გადათქვა ამირანმა? — დაცინვით თქვა კუკამ. — მე რომ არ ვყოფილიყავი...

— შემეცოდა, ეტყობა, მაგრად ეშინოდა ჩემი. მურადისთვისაც იმდენი უხვეწნია, შენი ჭირიმე, არ გაუჩერო არავის, არ დამღუპოო.

— მაშინ, შენ ეგ რა იცოდი! — გაუწყრა ბესო, რომელიც აქამდე ჩუმად იჯდა.

— ვგრძნობდი! — მოუჭრა ამირანმა.

— ამათ ნუ უსმენ, განაგრძე თუ ძმა ხარ! — შევეხვეწე მე.

— აწი, ამგენმა განაგრძონ! — დაღონებულმა თქვა ამირანმა.

— მოკლედ, ახლა ამირანის ჩასმა გაჭირდა მანქანაში, — დაასწრო ყველას ისევ კუკამ. ჩავტენეთ მაინც ძალით და გამოვეკიდეთ ფურგონიან „მოსკვიჩს“. ასე, საპატიო ექსკორტით მივააცილეთ ჩვენი ვანიას სახლამდე კურხულში. იქ ფართოდ გაღებულ ქიშკარ-

თან გველოდნენ. გავუღეთ ფურგონის კარი ლეილას და ასე აღმოჩნდა იგი ამირანის მკლავებში..

... ამიტყდა სიცილი. ახარხარდნენ ბიჭებიც. ამ დროს გაიღო კარი და ლეილამ ცხელ-ცხელი ხაჭაპურები შემოიტანა. მის დანახვაზე სიცილ-ხარხარი უმაღლეს რეგისტრში ავარდა.

ლეილა რაღაცას მიხვდა.

— რა გაცინებთ, თქვე მუხანათებო! — არ იცოდა თვითონაც გამხიარულებულიყო თუ გამწყრალიყო.

— ბიჭებო, ესეც თქვენი მოფიქრებული გეგმაა, ტყუპი გოგობიჭი რომ აჩუქა ლეილამ ამირანს?! — წამოვდექი ფეხზე და ალტაცებულმა ჭიქა მიუუჯახუნე კუკას!

— აბა, რა, ერთი რომ დაბადებულყო, ვაითუ გაქცეოდა. ეიცით ჩვენ ლეილას ამბავი! — ამაყად შესძახა რეზომ.

— ყოჩაღ! — არც ახლა დავმალე ალტაცება. — ასეც იყო საჭირო! მომწონს თქვენი საქციელი, ძმებო!

— შენც კარგი მუხანათი ხარ, გეტყობა! — როგორც იქნა, გაიცინა ლეილამ...

## ჯიღილი

ავგისტოს მზე სამხრეთისაკენ გადაიხარა. მარინემ ხიღისკენ წაიყვანა ქალაქელი სტუმარი. დათოს სახლთან ახლოს ერჩია, მაგრამ არ დაანება გოგონამ, იქ ჯობია, თუ ცურვა იციო... ფოსტასთან მარინეს თანაკლასელი შემოხვდათ. უცხო ბიჭის დანახვაზე ცოტა დაიმორცხვა.

— ეს დათოა, ნანული, — ჩემი შამიდაშვილი. თბილისიდან გვესტუმრა. ჩვენი ტოლია, იცნობდეთ!

ხიღამდე მასლაათით მიუყვებოდნენ გოგონები. დათო ჩამორჩებოდა ხოლმე და მაშინ მარინე შემოტრიალდებოდა, — ცოტა ჩქარაო! ბიჭი კი ორივეს ფარული ინტერესით აკვირდებოდა. მოსწონდა ლერწამივით ტანაყრილი გოგონები. სოფელში ორი წელია არ ყოფილა. რატომღაც ეგონა, დიდი განსხვავებაა ქალაქელებსა და სოფლელებს შორისო. პატარაობიდანვე მიეჩვიო ამას. ახლა კი...

მაგალითად, რას დაუწუნებდი მარინეს და ნანულის თბილისში? გარეგნობას? — ვერა! ჩაცმულობას? — ვერა! თავდაქერას? — ცოტა მორცხვია ნანული. მერე რა? „უუაჩკას“ ვერ ღეჭავს, ამიტომ, თუ რა?!

თეთრი, მაღალი ხიდი ორად გაყოფილ სოფელს აერთებს. მის ქვეშ ნაპირი ფართოდ შეუსილავს მთის ანკარა მდინარეს. მართლაც ჩინებული საბანაო ადგილია და მთელი სოფლის ბიჭებიც აქ იყრიან თავს. დილიდანვე. მათი „მხარულისაგან“ დგაფუნობს და „დულს“ ჩამოვაკებული წყალი, არის ერთი ყიყინა და ურიაშული. ხიდიდან მაკქერალი გამვლელ-გამომვლელი საკმაოდაა, მანქანებსაც კი აჩერებენ, რათა ხარბი მზერა შეავლონ ნჩქეფარე, უღარდელ ყმაწვილობას, საქმით და ყოველდღიური საფიქრალით გათანგული თვალი და ყური ერთი წუთით დაასვენონ, ასიამოვნონ...

ხიდზე გოგონების გამოჩენამ დიდი აჟიოტაჟი გამოიწვია. რამდენიმე ბიჭი ყიყინით წყალში გადაეშვა. უფრო მოზრდილებმა ბურთი უმცროსებს დაუთმეს, თვითონ ქვიშაზე, ნაპირზე გადმოინაცვლეს, წამოგორდნენ და თვალები ზემოთკენ გამოექცათ.

— ზაურიც აქ ყოფილა?! — შეიცხადა რატომღაც ნანულიმ. მარინე უფრო დინჯად იყო და გულგრილად გადასცქეროდა მობანავეებს.

— ჩადი დათო, იბანავე, ჩვენ აქ დაგელოდებით, — შესთავაზა სტუმარს.

ის ორქოფობდა. ცოტა არ იყოს, ეჩოთირებოდა ამდენ უცნობებში გარევა.

ამ დროს ხიდზე ტრუსების ამარა ამოირბინა ბიჭმა.

— „გაუმარჯოს!“ გაუცინა გოგონებს. მერე წამში ხიდის მოაჯირზე შეხტა.

„ამპრედუზო მედუზო!“ — ასწია ხელი და ჰაერში კამარა შეკრა. წყლიდან საოცრად სწრაფად ამოყვინთა და ნაპირისაკენ სულ ყივილით გასცურა.

დათოს გულიანად გაეცინა.

— ერთხელაც იქნება, კისერს მოიტებს! — გადასძახა ზემოდან ნანულიმ და მერე დათოს მოუბრუნდა, — თავისი ვაჟკაცობა გვანახა, ვითომ.

შორს, მთის გადაღმა ღრუბელმა გამოყო ბომბორა თავი. მაშინვე სუსტმა ნიაემაც ჩამოიქროლა.

— ჩადი რა, ჩადი. მალე სადილობის დროც მოვა. — შეწუხდა მარინე.

ნანული ცნობისმოყვარეობით შესტკეროდა ქალაქელ ბიჭს.

— ეეჰ! — გადაწყვიტა დათომ.

ნაპირზე მის გამოჩენას ერთსულოვანი ღუმილით შეხედნენ. მის წინსებს აშკარა შურით უყურებდნენ და უხერხულად იგრძნობთ თავი, აუჩქარებლად იხდიდა.

მერე სწორედ ის, ხიდიდან რომ გადმოხტა, მიუახლოვდა და მცოდნე მუშტარავით ჰკითხა: „სუპერებია?“

— არა, „ლევისია“! — თითოთ ეტიკეტზე უჩვენა.

იმედგაცრუებულს კიდევ რაღაც უნდოდა ეთქვა, მერე გადაიფიქრა, ისევე ქვიშაზე გაგორდა და შემთხვევით თუ ძალად ფეხი მუცელში მოარტყა გარუჯულ ქერათმიან ბიჭს.

— დიდს ბოდიშობანას მოვიხდით, ზაური!.. გადაიქირქილა ცინიკურად.

— ფრთხილად, მერაბ, თორემ ჩაგარტობ თავით სილაში!.. — დამეუქრა ზაური. მერაბმა დათოსკენ გამოიხედა. შეიშშუშნა.

— თვითონ არ ჩაერტო... — ბოლო სიტყვები გაუბედავად წაიბურტყუნა.

— რაო?! — წამოიწია ქერათმიანი.

მერაბი, ყოველი შემთხვევისათვის, ცოტა მოშორებით გაიწია.

— რაც გაიგე!

— არ მომაკიდებინო ხელი...

— ყურებზე ხახვი არ ღამაქრა! — იხტიბარი აღარ გაიტეხა ამანაც.

ხელად ჩამოხტნენ ბიჭები. „ჭიდილობას რა უნდა. ფეხის გამოკერა უნდა?!“ — ერთი უკვე ფეხით ქვიშაზე წრეს ხაზავდა.

— გინდა? — წამოდგა ზაური და საკმაოდ მხარბეკიანი გამოჩნდა.

მერაბიც წამოიზღაზნა. ზაურიზე მაღალი, მაგრამ თხელი ტანის ბიჭი იყო. ზურნის სმას ნიბაძეს უცებ შეგროვილმა სეირის მაცურებლებმა, თუმცაღა დიდი ხანი აღარ დასცალდათ ჭიდაობის ყურება.

მართალია, გაურბოდა მერაბი ჭიდაობას, მაგრამ ერთხელაც დაიქირა ზაურმა, ზემკლავით აიტაცა და ლავაშივით გააკრა ქვიშას ვაი-მოჭიდავე.

დამარცხებულს ყველამ სიცილი დააყარა.

ზაური ისევ წამოწვა და თავმომწონედ ახედა ხიდს.

— ყოჩაღ, ზაურ! — გადმოსძახა ნანულიმ.

მერაბი წამოდგომას აღარ ლამობდა. მერე, წამოიჩოქა, — შაგარი ხარ, არა?! თუ ვაუკაცი ხარ, აი, იმას ეჭიდავე! — გესლიანად ჩაილაპარაკა, ისე, რომ ყველას გაეგო.

ცნობისმოყვარე მოყურადღე ბევრი იყო და ზაურის თავმოყვარეობა შეელახა.

— სტუმარს თუ უნდა!.. — და ვითომ აქ არაფერიო, გვერდზე გადააპურჭყა.

— გახვალ, სტუმარო?

მხრები აიჩეჩა.

ზემოთ, მარინე მიხვდა გუმანით, რაღაც სასიკეთო არ ჩაიფიქრესო და დათოს გადმოსძახა:

— ჩქარა, დათო, იბანავე, გველოდებიან!

ნაპირზე აქა-იქ გაიციინეს.

— არა, თუ გეჩქარებთ... — ქირქილებდა მერაბი.

— შენ რა ყველას უნდა „ეიაზვო“? — ბიჭმა, რომელიც მსაჯობდა, მკაცრად შეუტია წამქეზებელს. მერე დათოს მიმართა: — ამას ნუ უდგებთ ყურს!

კიდევ ერთხელ გადაუბრიალა თვალები მერაბს, მაგრამ იმან მაინც მოასწრო ეთქვა, ახლა უკვე ზაურის მისამართით:

— შენც ხომ არ გეჩქარება?

— რა, თუ არ უნდა, ძალას ხომ არ დავატან? — ეერ მიუხვდა დაცივნას ზაური. დათოსაც ყოყმანი დაეტყო, მაგრამ გადაწყვეტილება უცებ მიიღო. ჯერ ერთი, რომ ამდენი თვალი ცდიდა მის გაბედულებას, ხიდზეც გაიგებდნენ...

დაიწყეს ისევ ბავშვებმა ზურნასავით ჭყვიტინი.

— ვაიმე, რა ვქნა? — შეწუხდა მარინე.

— რა მოხდა, ხომ არ მოკლავს, იცის შენი მამიდაშვილი რომაა. — გაეცინა ნანულის.

მარინე გაბრაზდა: — წააქცევს აუცილებლად ზაურის. რა გგონია, — ძიუ-დღისტია, მოსწავლეთა შორის რესპუბლიკის ჩემპიონი. არ იჩხუბონ, მერე, მეშინია! — ვაი! — უნდა გავაფრთხილოთ! — მაგრამ უკვე გვიანი იყო. ბიჭები წრეში იდგნენ.



სტუმარი მართალია ტანად უფრო მომცრო იყო, მაგრამ ელასტიური, ზამბარასავით დაჭიმული ჩანდა.

ზაური ქორივით წამოადგა თავზე და ერთი შეხედვით ჭიდაობის ბედი გადაწყვეტილი იყო, მაგრამ...

ხელის წაწელება ვინ აცალა, ფეხით ჩაუტარა იღეთი და ანხელა ბიჭი ნაფოტივით ისროლა.

ხმა გაკმინდეს „მეზურნეებმა“, გაოცებისაგან პირი დააღეს. თვითონაც გაოგნებული იყო ზაური, ვერაფერს მიმხვდარიყო. სკოლაში — „ბეჭდაუდებლად“ იცნობდნენ და... ვაი სირცხვილო!.. მარინე მაინც არ უყურებდეს.

მერე გამოერკვა და ფეხზე წამოვარდა.

— ბეჭი არ დამიკრიაო! — შესძახა და „კუჭატნელივით“ ჩიქურ ეტაკა მეტოქეს.

დათომ ახლა „კისრულით“ წამოიღო და შეუპოვარი მოწინააღმდეგე ისევ ძირს გაშხლართა.

ამას კი აღარავინ მოელოდა.

ჩამოვარდნილი ცივი ღუმილი მარინეს წკრიალა სიცილმა დაარღვია.

— უხ, ჩემი!.. — დაიგმინა ზაურმა.

— მოიცა, ერთი წუთით, — ხელით ანიშნა მსაჯს და ბანცალით მდინარესთან მივიდა. ნატკენ მხარს იშუშებდა ცივი წყლით.

ამასობაში, მსაჯი დათოს მიუახლოვდა და ხმადაბლა უთხრა:

— არ გინდა მთლად ეგრე... ნუ! — მრავალმნიშვნელოვნად ზემოთ, გოგონებისაკენ თვალით ანიშნა.

აიხედა.

ხიდზე საკმაოდ მოეყარა ხალხს თავი, მარინე აღარ იცინოდა. შეწუხებული ზაურის ადევნებდა თვალს.

ის კი მშვიდად შემობრუნდა წრეში.

— მოჭიდავე ხარ?.. — უცებ ჰკითხა, ალაღად გაუღიმა და ხელები საჭიდაოდ შემართა.

— კიდევ აგრძელებთ? — შუაში ჩადგა მსაჯი, მაგრამ ზაურმა გვერდზე გასწია.

— ეჭიდაობთ, შე კაცო, ხომ არ ვჩხუბობთ! — ისევ გაუღიმა დათოს.

ერთხანს, თვალით ზომავდა მეტოქეს.

მერე წელში შეუვარდა და გადალუნვა დაუწყო... დაძაბულო-

ბისაგან ძაგძაგებდა, თითქოს ძალამაც უღლატა, მაგრამ უცებ იგრძნო, რომ მეტოქე მინებდა.

მიხვდა... წამში ბეჭებზე უნდა დაედო, მაგრამ ხელი უშვა. და-  
თო სწრაფად პაერშივე შეტრიალდა და მუცლით დაეცა ქვიშაზე.  
ჩაიმუხლა.

— ხომ არ გეტკინა, რამე?

— არა... — გაუღიმა დათომ.

— ყაიმი! — გამოაცხადა მსაჯმა.

ერთბაშად გაქრა დაძაბულობა.

ბავშვები ყიჟინით გადაეშენენ მდინარეში.

— არ ვიბანაოთ? — მოვიდა მსაჯი.

— წავედით! — თვალი ჩაუკრა ზაურმა სტუმარს.

ეამათ ბიჭებს გრილი წყალი.

მერაბს ჩაეცვა და ფერდობს შესდგომოდა.

ნანულის მთელი ყურადღება ჭიდაობას მიეპყრო და ეხლად  
გაახსენდა თავისი მეგობარი. მიიხედ-მოიხედა, მაგრამ თვალი ვერ-  
სად ჰკიდა.

მარინე კი იქვე მოსახლის სიმინდებში შემალულიყო და გულ-  
ამოსკვნით სლუკუნებდა.

## ს ა რ ა ჩ ე ვ ა

„ოუბილე“	3
გატაკება	14
ცული სიზმარი	22
ბავშვობიდან	30
პეტრე	31
სიყვარული	33
ჯარისკაცი და ძალი	34
უჩინარი	35
შზე... და ზამთრის იეზი	53
„ძველი მენშევიკი“	56
ცივი ოქტომბერი	61
დასაწყისი	64
ერთი დღის ქრონიკა	70
ერთხელ	78
მუხანათები	82
კიდილი	85

# ДАРАСЕЛИ ЗАЗА ИВАНОВИЧ

Человек-невидимка

РАССКАЗЫ

(На грузинском языке)

Издательство «Мерани», пр. Руставели, 42  
Тбилиси, 1985

ს. ბ. — 2527

რედაქტორი ლ. თურმანიძე  
მხატვარი თ. კობრეიძე  
მხატვრული რედაქტორი ნ. ნარიმანიძე  
ტექნიკური რედაქტორი დ. რაზმაძე  
კორექტორი ნ. ლომაძე  
გამომშვები ნ. კვატაშიძე

ჩაბარდა წარმოებას 29.05.85 წ. ხელმოწერილია დასაბეჭდად 24.09.85 წ. უე 11603-  
ფორმატი 60X84<sup>1/16</sup>. საბეჭდი ქაღალდი № 2. გარნიტურა ჩვეულებრივი. ბეჭდვა  
მალალი. პირობითი ნაბეჭდი ფურცელი 5,35. სააღრიცხვო-საგამომცემლო ფურ-  
ცელი 4,42. პირობითი საღებავვატარება 5,58. ტირაჟი 5 000 ეგზ. შეკვ. № 587.

ფასი 40 კაპ.

გამომცემლობა „მერანი“, რუსთაველის გამზ. 42, თბილისი, 1985

საქართველოს სსრ გამომცემლობათა, პოლიგრაფიისა და წიგნის ვაჭრობის  
საქმეთა სახელმწიფო კომიტეტის № 1 სტამბა, თბილისი, ორჯონიკიძის ქ. 50

Типография № 1, Государственного комитета Грузинской ССР по делам  
издательств, полиграфии и книжной торговли, Тбилиси, ул. Орджо-  
ннидзе, 50